

# Íyi ulitane e' wì tkënewami

## Génesis

Si'kuaie yëkkuö i' kiè *Génesis*, e' wà kiane chë, *íyi ulitane e' wì tkënewami*. Yëkkuö i' blatëule böt tsjní. Et tsjní e' dör capítulo et dò capítulo dabom eyök kí et (1-11). Iët tsjní e' dör capítulo dabom eyök kí böt dò capítulo dabom skeyök (12-50). Et tsjní e' tò se' a íyi kòs e' wì pakè. Ká jai ena ká i' e' yöne kewe. Ñies ñiwe, nañewe, diwö, si'wö ena bëkwö e' yöne tsawe. Es ñies dayë, ká sí, iyiwak, se' wëpa ena alakölpa, e' kòs yö' Skëköl tò, e' pakè yëkkuö et tsjní tò. Ñies wës s'ditsö tsá e'pa tò ì sulu wamblë' ena ì o' Skëköl tò ie'pa tsatkoie inuí yöki, e' tso' kitule yëkkuö et tsjní ki. Ñies wës s'ditsö pone'mi ká wa'ñe senuk ditséwö wa ditséwö wa ena ì kuëki s'ttò tso' taië ku'ki ku'ki, e' kòs pakè yëkkuö et tsjní tò.

Yëkkuö iët tsjní tò ikkachë se' a tò wës Israel aleripa e'pa dë'bitu wëm eköl kiè Abraham e' wa. Israel aleripa wa Skëköl tò ibikeitsétke ká ulitane wakpa tsatkök inuí yöki. As e' wà tkò, e' kuëki Skëköl tò Abraham klöo' iwák a. Abraham erblë' Skëköl mik buaë, e' kuëki Skëköl tò ittè me' ie' a. E' tso' kitule yëkkuö iët tsjní ki.

Ttè me' Skëköl tò Abraham a, e' è me'itö Abraham alà Isaac ena Isaac alà Jacob e'pa a. Jacob ñe' è kiè ñies Israel. E' kuëki ie' aleripa kièsö Israel aleripa. Yëkkuö iët tsjní è ki itso' kitule tò wës Skëköl tò Abraham, Isaac ena Jacob, e'pa tsatkë'bitu ibolökpa kòs yöki as ttè me'itö ie'pa a e' wà tkò wake'.

### Skëköl tò íyi ulitane yö'

**1** <sup>1</sup>Tsawe tã ká jai ena ká i', e' yö'at Skëköl tò. <sup>2</sup>Mik ie' tò íyi ulitane tsá yö'mi, etã ká wa'ñe kè ki ì ku' yës. Ká sí kè tã!. Di' è me'r iskië. Ká dör ttsettseë. Erë Skëköl Wiköl shkòar di' tsaka.

<sup>3</sup>Etã Skëköl tò iché: “iKá ñinú!”

Etã ká ñine. <sup>4</sup>Ie' tò isué tò ká ñiwe e' dör buaë, e' méatitö ñiweie. Ká ttsettse, e' méatitö nañeweie.

<sup>5</sup>Ñiwe, e' kiéitö ñiwe. Ká ttsettseë, e' kiéitö nañewe. Ekkë kanewéitö ká tsawe a.

<sup>6</sup>E' bule es tã ie' tò iché: “iIyönú wës skátke kkò dapee es di' shua iblatoie as kè iwöiërwane ñi a!”

7 Etā es iyuéitō di' blatoie. Es di' atē kā jaishet ena kā i' kī. 8 Ì yuéitō, e' kiéitō kakölttō. Ekkē kanewéitō etā kā de böt.

9 E' bule es tā ie' iché: “iDi' atē kā i' kī, e' e' dapa'úka ek tsiní ème as íyök poppo dōka!”

Etā es iyöne. 10 Wé íyök poppo deka, e' kiéitō íyök. Wé di' dapaneka, e' kiéitō dayë.

Ie' isué tō e' kōs dör buaë. 11 E' ukuökī tā ie' tō iché: “íYök kī íyi kuá ulitane tskinú! Kākō wör tā' ese, ñies kal ulitane wör tā' ese kōs tskinú iwakmik iwakmik.”

Etā es ekkēpa tskine. 12 Es íyök kī íyi kuá ulitane tskine kākō wör tā' iwakmik iwakmik, ñies kal wör tā' iwakmik iwakmik. Ie' tō isué tō ekkēpa kōs, e' dör buaë. 13 Ekkē kanewéitō etā kā de mañat.

14 E' bule es tā ie' iché: “ì dalöburta' yönú kā jai a! Ekkēpa dör buaë kā blatoie ñiwe nañewe, ñies ikkachoie mik tā diwö de kawö tköwoie, ñies kā shta'woie ena duas tköke e' jchënoie. 15 Ekkēpa kōs dalöburke tajë kā i' kī.”

Etā es iyöne. 16 Es ie' tō ì dalöburta' tajë ese yuëat bök. Ikibiie dör kā ñiwoie ñiweie. Wéne dalöbur diöshet e' dör olo'bunoie nañeweie. 17 Ekkēpa méatitō kā jai a dalöbunoie kā i' kī 18 ñië nañëë, ñies kā ñiwe kā nañewe e' blatoie. Ie' tō isué tō ekkēpa dör buaë. 19 Ekkē kanewéitō etā kā de tkël.

20 E' bule es tā ie' tō iché: “iYiwak serke di' a dayë a, e' kōs yönú tajë! ÌÑies dù ulitane yönú as iur kashuk a!”

21 Etā es iyiwak blubluë serke dayë a, ekkēpa yuéitō. Ñies iyiwak

kōs serke di' a ena dayë a ekkēpa yuéitō iwakmik iwakmik. E' sù dù ulitane yuéitō, iwakmik iwakmik.

Ie' isué tō ekkēpa kōs dör buaë. 22 Etā iyiwak yuéitō e'pa a ie' er buaë ché ttè i' wa: “a' alönú tajë, di' kōs, dayë kōs, e' wà ióka tajë. Ñies as dù alör tajë kā wa'ñe.”

23 Ekkēpa kanewéitō etā kā de skël.

24 E' bule es tā ie' tō iché: “iYiwak serke kā sí kī, e' ulitane yönú iwakmik iwakmik! iYiwak uru, iyiwak kañiru, iyiwak e' kuke iski, ekkē kōs yönú iwakmik iwakmik!”

25 Etā es ie' tō iyiwak ulitane yué kā sí kī iwakmik iwakmik. Ie' tō isué tō ekkēpa kōs dör buaë.

26 E' ukuökī tā ie' tō iché: “Ditsö yuösö wës se' es as ie'pa tkökasö kā i' kōs wökirie. Nima, dù, iyiwak uru, iyiwak kañiru, iyiwak e' kuke iski, ekkē kōs tso' kā i' kī, e' atdaë ie'pa ulà a.”

27 Mik Skököl tō s'ditsö tsá yö', etā iyuéitō wës ie' es; Ie'pa yuéitō wëm eköl ena alaköl eköl.

28 Ie' er buaë ché ie'pa a i' es: “A' ala'r kóka tajë, a' alönú tajë kā ulitane kī. Kā i' kōs e' kané ú a' tō. Nima, dù, ena iyiwak ulitane ekkēpa kōs wökir a' dör, e' wà ú.”

29 E' ukuökī tā Skököl tō iché ie'pa a: “Ye' ttò ttsó. Íyi kuá kōs wörtā' ñarta', ese méatyö a' a ñë. Ñies kalwö ulitane katarta'

ku'yarta' ese kōs méatyō a' a katè ku'yè. <sup>30</sup>Erè iyiwak kañiru, iyiwak uru ena dù, ekkēpa kōs a kākō méatyō katè.” Etā es iatē. <sup>31</sup>Ie' isué tō ekkē kōs dōr buaē shūte. Ekkē kanewéitō etā ká de teröl.

**2** <sup>1</sup>Es ká jai ena ká i', ñies íyi ulitane tso' iki, e' yöne one se. <sup>2</sup>Ká de kul etā ì kōs yö'bitūitō e' yöne one, e' kuēki diwō e' wa ie' kè kanēblēne. <sup>3</sup>E' diwō wa kè ie' kanēblēneia ká i' yuök e' kuēki ie' iché tō diwō e' dōr buaē. Ñies ie' iché tō semana bit e' diwō bata e' dōr batse'r se' a.

#### Skököl Jehová tō s'ditsö tsá yué

<sup>4</sup>I' dōr ká jai ena ká i' tsá yöneat, e' pakè.

Mik Skököl Jehová tō ká jai ena ká i' e' yö', <sup>5</sup>e' kēwō ska' tā kām ie' tō kālī patkò ká i' kī, ñies kè yi ku' ká kanēuk. E' kuēki kām kal kuá tskir ena kām kākō tskir. <sup>6</sup>Erè di' tskirke íyök a, e' tō íyök kōs nuweke. <sup>7</sup>Etā Skököl Jehová tō íyök yué s'ditsöie eköl wák dōr wēm. Etā ie' tō iwöiké iyik a tā iyöne se'ie ttsē'ka.

<sup>8</sup>E' ukuökī tā ie' tō ká buaala yué ekwōki diwō tskirke e' ēka, ká kiè Edén eē. Etā wēm yö'itō, e' méatitō ká buaala e' a senuk. <sup>9</sup>Eē ie' tō kal ulitane wēr bua'buāē, ñies iwō dōr buaē katano ese tské. Ká buaala e' shūshā, ie' tō kal tské bōlka. Kal elka dōr sene michoē e' kéli. Kal iēlka e' dōr íyi buaē ena íyi suluē ese jchēnoie e' kéli.

<sup>10</sup>Edén ká shūā di' tskirke etō, e' tō ká buaala nuweke. Wé ká e'

kkò dōwā eē di' e' ulà jchērke dōka tkētō. <sup>11</sup>Di' ulà etō kiè Pisón. E' tkökemi ká kiè Havilá, e' kōs a. Ká e' kī oro tso'. <sup>12</sup>Oro e' dōr oro bua'buā. Ñies kiò masmas bua'buā, ese tso' ena ák bua'buā kiè ónice ese tso'. <sup>13</sup>Di' ulà etō tkökemi ká kiè Cus, e' kōs a. E' kiè Guihón. <sup>14</sup>Iulà etō skà mir ká kiè Asiria diwō tskirke, e' ēka. E' kiè Tigris. Etā di' ulà bataie, e' kiè Éufrates.

<sup>15</sup>Mik Skököl Jehová tō wēm tsémi méat ká buaala atē Edén e' shūā as ikaneütō, as ikkō'nütō, <sup>16</sup>etā ie' tō ttè dalöiēno i' mé iā: “Ká buaala e' kéliwō ulitane katēmibō. <sup>17</sup>Erè íyi buaē ena íyi suluē ese jchēnoie e' kéliwō kè katar. Mik kal e' wō katébō, etā be' duōwāraē. E' kuēki kè ikatar.”

<sup>18</sup>E' ukuökī tā ie' tō iché: “Kè idōr bua' wēm a senuk ekōrla. Súyō ie' a wapie yuē eköl ikimuk buaē.” <sup>19</sup>Etā iyiwak yö'itō íyök wa ekkē kōs debitū iwā wēm a suē tō ima ie' tō ikiè mekāmī. Tā wes wēm tō ikiè méka es iatē. <sup>20</sup>Es wēm tō iyiwak uru ena iyiwak kañiru, ñies dù, ekkē kōs kiè méka. Erè kè ie' kīmuk kune buaē ie' wapieie.

<sup>21</sup>Etā Skököl Jehová tō wēm kapōwēwā taiē, e' dalewa ie' tō ichane yéttsā etō, e' chkà wöiēwāneitō. <sup>22</sup>Ichane e' yuēitō alakölīe tā idebitū iwā wēm a.

<sup>23</sup>Mik wēm tō isué, etā ichéitō:

“i' je' dōr ye' wák dichéwō ena ye' wák chkà! Alaköl dē'ka wēm wa, e' kuēki ikirdaē alaköl.”\*

<sup>24</sup>E' kuēki wēpa kè serpaia iyé ena imì e'pa dapōmik, iserdawā

\* 2.23 Hebreoie ttè kiane yēnuk wēm e' dōr ish ena ttè kiane yēnuk alaköl e' dōr isha.

alaköl ta. Ie'pa bøl serdaë ñita, ta imía wes wák eköl è es.

<sup>25</sup>E' késka' ta wëm ena alaköl iëter sume, erë ie'pa kè wä jaë jcher.

### S'ditsö tö Skëköl ttò dalösewéwa

**3** <sup>1</sup>Tkabè tso' etö, e' erbikò taië s'kìtò'woie iyiwak kañiru yö' Skëköl Jehová tö, ekkè kos tsata. Ká et ta ie' tö alaköl a ichaké:

—¿Mokì Skëköl tö iyë'at a' a tö ká buaë shüa kal ulitane tso', e' wö kè katar yës?

<sup>2</sup>Alaköl tö iiüté:

—Au, e' kè dör es. Ie' tö sa' a iché tö kal ulitane wö katarmi. <sup>3</sup>Erë kal àr ká i' shushäë, e' wö kè katanuk, kè e' kanuk sa' a. E' wamblé sa' tö, etä sa' duöralur.

<sup>4</sup>Etä tkabè tö iché alaköl a:

—Au, e' dör kache. A' kè duòpawä. <sup>5</sup>Ie' wä ijcher buaë tö mik kalwö e' katéwa a' tö, etä ì dör buaë, ì dör suluë e' jcherdaë a' wä wes ie' wák wä ijcher es.

<sup>6</sup>Etä alaköl isué tö kalwö e' wër buaë katè. Ie' éna ikatak íyi jchënoie buaë. E' kueki ie' tö kalwö batsée, katéwaitö. E' ukuökì ta ie' tö imé iwëm a, etä iwëm ikatéwa ñies. <sup>7</sup>E' bet ta ì dör sulu, ì dör buaë ese ane ie'pa éna, etä ie'pa wä ijchënewä tö ie'pa iëter sume. Etä ie'pa tö kal kiè higuera, e' köyök yué banoie e' wa ie'pa e' patrëwä.

<sup>8</sup>Siwä' bitsirke tsáli, etä wëm ena ilaköl tö Skëköl Jehová shkokedur ká buaë shüa, e' ttsé. E' yöki ie'pa e' blélur kal tso' taië ese shüa.

<sup>9</sup>Erë Skëköl Jehová tö wëm kié ta ichaké:

—¿Wé be' tso'?

<sup>10</sup>Wëm tö iiüté:

—Ye' tö ittse tö be' shkokedur ká buaala shüa. Ye' dur sume, e' kueki ye' suane be' yöki. E' kueki ye' e' bléwä be' yöki.

<sup>11</sup>Etä Skëköl tö ie' a iché:

—¿Yi be' a iché tö be' dur sume? Ichó ña tö kalwö yë'yö be' a tö kè ikatar ¿e' katébö?

<sup>12</sup>Ie' tö iiüté:

—Be' tö ye' a alaköl me', ye' wapieie, e' tö ye' a kalwö mé katè. E' katéwayö.

<sup>13</sup>Etä Skëköl Jehová tö alaköl a ichaké:

—¿Iók bö iwamblé?

Ie' tö iiüté:

—Tkabè tö ye' kitéka, e' kueki ye' tö kalwö e' katéwa.

<sup>14</sup>Etä Skëköl Jehová tö tkabè a iché:

—Ì wamblé be' tö, e' kueki ye' tö be' a iché tö iyiwak kos shüa be' è weirdaë michoë. Këkraë be' shkoraë e' kuule be' batsi' kì ta be' kkò a ká po mirawä. <sup>15</sup>Be' ena alaköl meraatyö ñi bolökie. Be' aleripa kos ena alaköl aleripa kos, e'pa ate ñi bolökie ñies. Alaköl aleri eköl tö be' wökir shkä'wëraë ena be' tö ie' klò kaniñak shkä'wëraë.

<sup>16</sup>E' ukuökì ta ie' tö iché alaköl a:

—Mik be' alà kurketke etä be' weirdaë siarë, idalë'r taië e' ttse-raëbö. Erë be' kì be' wëm kiardaë ena ie' döraë be' wökirie.\*

\* 3.16 Mik be' alà kurketke...ie' döraë be' wökirie: Ñies ttè e' mane'wëmisö i' es: Be' éna e' alakka be' wëm kì, erë ie' e' alörakä be' kì.

17 E' ukuökḱi ṭa ie' tö iché wēm a:  
—Be' tö be' alaköl ttò iuté, kalwö  
yë'yö be' a tö kè ikatar, e' wà  
katébö. E' kuëkḱi be' weirdaë ñies.  
Be' kuëkḱi íyök sulu'wërawayö. Be'  
kaneblöraë darërëë be' chkè yuloie.  
18 Íyök kḱi dika'chka ena kākō sulusi,  
alördaë. Ñies kalwö kañiru katera-  
bö. 19 Be' kḱawötḱa kaneblök darërëë  
chkoie dō mik be' duowa, míane  
íyökie wës be' dör kuaë es etḱa. Be'  
yöne íyök wa, e' kuëkḱi be' dörane  
íyökie.

20 Wēm tsá yöne, e' kiè Adán. Ila-  
köl dör se' mì tsá. E' kuëkḱi Adán tö  
ikiè mékḱa Eva.\*

21 Etḱa Skëköl tö datsi' yué ie'pa a  
iyiwak kkuölit wa, ṭa ie'pa paiéitö.  
22 Etḱa ie' tö iché: “Íñe ì dör buaë  
ena ì dör suluë, e' jcher ditsö wḱa  
wës se' wḱa ijcher es. E' kuëkḱi dō'  
ie'pa mi', sene michoë e' kéli wöba-  
tsök katè ṭa iser michorak.”

23 E' kuëkḱi ie' tö wēm ena ilaköl  
yéttsḱa kḱa buaala tso' Edén e' a, ṭa  
ipatkémiitö íyök wakanéuk. Íyök  
wa wēm yöne e' kḱi ipatkémi kane-  
blök. 24 Ie' tö itrë'wëshka, e' ukuökḱi  
ṭa ì ttsë'ka pik ṭa' tso' kḱa jai a kiè  
kérub, e'pa tuléwḱitö kḱa buaala  
e' ñalé ska' diwö tskirke e' ëkḱa  
ikkö'nuk. Ñies tabè wõñarke dalö-  
löë ratkear siwḱa' kḱi, e' méatitö ḱs kè  
yi dōwḱaiḱa sene michoë kéli ska'.

**Caín tö iël kiè Abel, e' ttéwḱa**

**4** 1 Etḱa Adán sené Eva ṭa. Eva  
dunekḱa ṭa ilà kḱune wēm. Ikiè  
mékḱitö Caín.\* Mik alà kḱune, etḱa

Eva tö iché: “Jehová tö ye' kímé, e'  
kuëkḱi ye' alà kḱune eköl wēm.” 2 E'  
ukuökḱi ṭa ilà skà kḱune ek, e' kiè  
Abel, Caín ël tsirla. Abel tö obeja  
alöweke. Caín tö dali kuatkeke.

3 Kḱa et ṭa, Caín wḱa idali wöne,  
ese kak mí mè Jehová a idalöioie.

4 Etḱa Abel wḱa ie' icha mí ñies. Ie'  
obeja tsá bua'buwa, ese kak mí ie' wḱa  
mè Jehová a. Abel ena ì méitö e'  
wër buaë Jehová wa. 5 Erë ie' kè wḱa  
Caín ena ì méitö e' sune es, e' kuëkḱi  
Caín ulunekḱa taië, iwö yée suluë.

6 E' kuëkḱi Jehová tö Caín a ichaké:  
“ÍIök be' ulune wö yée sulu? 7 Be' tö  
ì bua' úpa, e' ma be' jañuke tsuleë.  
Erë ì sulu wamblébö, e' kuëkḱi ì  
sulu e' métër bër be' panuk namuie  
e' alokḱa be' kḱi. Erë be' ké e' alökḱa  
iki.”

8 Kḱa et ṭa, Caín tö iël Abel kiémi  
kañikḱa. Mik ie'pa demi kañikḱa,  
etḱa eë Caín ñippékḱa iël ṭa etḱa iël  
ttéwḱitö. 9 E' ukuökḱi ṭa bet, Jehová  
tö Caín a ichaké:

—¿Wé be' ël Abel?

Caín tö iuté:

—Ye' kè wḱa ijcher. Ye' kè dör ie'  
kkö'nukwak.

10 Skëköl tö ie' a iché:

—¿ÍIök bö iwamblé es? Be' ël  
ttéwḱbö, e' pé tene taië íyök kḱi, e'  
nuí tso' be' kḱi. E' kḱi ye' kḱawötḱa be'  
we'ikök. 11 E' kuëkḱi be' weirdaë  
íyök kḱi wé be' tö be' ël pé tkö'wé, e'  
kḱi be' yerattsayö. 12 Be' kaneblömi  
taië, erë kè wà wörpa buaë. Be'  
kḱawötḱa shkök kḱa wa'ñe, kè a eno  
ṭa' yës.

\* 3.20 Eva: Hebreoie s'kiè e' wà kiane chë ttsë'ka.

\* 4.1 Caín: Hebreoie s'kiè e' wà kiane chë ye' ulà a ide.

<sup>13</sup>Età ie' tò Jehová iüté:

—E' darëré ye' a. Kè ye' a idalë'ttsënu. <sup>14</sup>I'ñe be' tò ye' uyéttsa ká i' ki, e' ukuöki ta ye' kawöta shkök ká wa'ñe kamië, kè a eno ta'. Be' kè ku'ia ye' ta, e' kuëki yi ye' kuéwa, ese tò ye' tterawa.

<sup>15</sup>Erë Jehová tò iüté:

—Yi be' ttéwa, ese kí weirdaë siarë taië iskéie.

Età Skëköl tò iwakyuée iwà kkachoië as yi tò ikuéwa, ese kè tò ittöwa. <sup>16</sup>Età Caín e' yéttsa Jehová wörki ta imia ká kiè Nod ee, ká e' atë Edén diwö tskirke e' kke.

<sup>17</sup>Età Caín sené ilaköl ta. Iduneka ta ilà kune wák dör wëm, e' kiè Enoc. E' ukuöki ta Caín tò ká yué et, kiè mékaitö ilà kiè wa Enoc.

<sup>18</sup>Enoc dör Irad yé. Irad dör Mehujael yé. Mehujael dör Metusael yé. Metusael dör Lámece yé.

<sup>19</sup>Età Lámece senéwa alakölpa böl ta. Eköl kiè Adá, eköl kiè Silá. <sup>20</sup>Età Adá dë' aläë kiè Jabal. E' aleripa dör iyiwak alöukwakpa e' serke úla yöule datsi'tak wa ese a. <sup>21</sup>Ie' ël kiè Jubal. E' aleripa dör ma'ma kicha ta' guitarra sù ena ma'ma pulë sù ese bla'ukwakpa. <sup>22</sup>Silá dë' aläë ñies kiè Tubal-Caín. E' aleripa dör tabechka kiè bronze ena hierro ese sté. E' kutà kiè Naamá.

<sup>23</sup>Ká et ta Lámece tò iché ilakölpa a:

“A Adá, a Silá, ye' ttò ttsó:

Wëm eköl duladula tò ye' shkaö', e' kuëki ye' tò ikötwa.

<sup>24</sup>Yi tò Caín ttéwa, e' tò iské tuëraë siarë,

erë yi tò ye' ttéwa, e' tò iské kí tuëraë jaishet shute.”

<sup>25</sup>Adán alà skà kékane ilaköl ta wák wëm. Eva tò iché: “Skëköl tò ye' a alà ské mé eköl, Caín tò Abel kötwa, e' skéie.” E' kuëki ie' tò ikië méka Set.\*

<sup>26</sup>Ñies Set de aläë wák wëm kiè mékaitö Enós. E' kéwö ska' ta s'ditsö tò Skëköl a iyi tsá ki'mi ena idalöie'mi ikië Jehová e' wa.

### Adán aleripa

**5** <sup>1-2</sup>Mik Skëköl tò s'ditsö tsá yö', età iyueitö wes ie' wák es. Ie'pa yueitö wëm ena alaköl. Ie' er buaë ché ie'pa a. Ie' tò ie'pa yué, e' diwö shà ta ikië mékaitö s'ditsö. I' dör Adán aleripa e'pa kiè.

<sup>3</sup>Mik Adán kí duas de cien eyök kí dabom mañayök (130), età ie' alà kune eköl, e' dör wes ie' wák es, ikië mékaitö Set. <sup>4</sup>E' ukuöki ta ie' kí seneia duas cien paryök (800). E' shua ie' ala'r kí kune wëpa ena alakölpa. <sup>5</sup>Es ie' kí duas deka seraa cien suliyök kí dabom mañayök (930) età ie' blënewa.

<sup>6</sup>Mik Set kí duas de cien eyök kí skel (105), età ie' alà wëm kiè Enós, e' kune. <sup>7</sup>E' ukuöki ta ie' kí seneia duas cien kuryök kí kul (807). E' shua ie' ala'r kí kune wëpa ena alakölpa. <sup>8</sup>Es ie' kí duas deka seraa cien suliyök kí dabom eyök kí bök (912) ta iblënewa.

<sup>9</sup>Mik Enós kí duas de dabom suliyök (90), età ie' alà wëm kiè Cainán, e' kune. <sup>10</sup>E' ukuöki ta ie' kí seneia duas cien paryök kí

\* 4.25 Set: Hebreoie s'kiè e' wà kiane chë ie' tò imé.

dabom eyök kî skel (815). E' shua ie' ala'r kî kune wëpa ena alakölpa. <sup>11</sup>Es ie' kî duas deka seraä cien suliyök kî skel (905) ta iblënewa.

<sup>12</sup>Mik Cainán kî duas de dabom kuryök (70), eta ie' alà wëm kiè Mahalalel, e' kune. <sup>13</sup>E' ukuökî ta, ie' kî seneia duas cien paryök kî dabom tkëyök (840). E' shua ie' ala'r kî kune wëpa ena alakölpa. <sup>14</sup>Es ie' kî duas deka seraä cien suliyök kî dabom (910) ta iblënewa.

<sup>15</sup>Mik Mahalalel kî duas de dabom teryök kî skel (65), eta ie' alà wëm kiè Jéred, e' kune. <sup>16</sup>E' ukuökî ta, ie' kî seneia duas cien paryök kî dabom mañayök (830). E' shua ie' ala'r kî kune wëpa ena alakölpa. <sup>17</sup>Es ie' kî duas deka seraä cien paryök kî dabom suliyök kî skel (895) ta iblënewa.

<sup>18</sup>Mik Jéred kî duas de cien eyök kî dabom teryök kî bök (162), eta ie' alà wëm kiè Enoc, e' kune. <sup>19</sup>E' ukuökî ta, ie' kî seneia duas cien paryök (800). E' shua ie' ala'r kî kune wëpa ena alakölpa. <sup>20</sup>Es ie' kî duas deka seraä cien suliyök kî dabom teryök kî bök (962) ta iblënewa.

<sup>21</sup>Mik Enoc kî duas de dabom teryök kî skel (65), eta ie' alà wëm kiè Matusalén, e' kune. <sup>22</sup>Ie' tö Skëköl ttò è dalöieke. Matusalén kune, eta ie' kî seneia duas cien mañayök (300). E' shua ie' ala'r kî

kune wëpa ena alakölpa. <sup>23</sup>Es ie' kî duas deka seraä cien mañayök kî dabom teryök kî skel (365). <sup>24</sup>Ie' sene' buaë Skëköl ta, e' kuëki ká et ta Skëköl wa ie' mítser ttsë'ka, e' kuëki kè ie' ku'ia.

<sup>25</sup>Mik Matusalén kî duas de cien eyök kî dabom paryök kî kul (187), eta ie' alà wëm kiè Lámeç, e' kune. <sup>26</sup>E' ukuökî ta, ie' kî seneia duas cien kuryök kî dabom paryök kî bök (782). E' shua ie' ala'r kî kune wëpa ena alakölpa. <sup>27</sup>Es ie' kî duas deka seraä cien suliyök kî dabom teryök kî sulitu (969) ta iblënewa.

<sup>28</sup>Mik Lámeç kî duas de cien eyök kî dabom paryök kî bök (182), eta ie' alà kune wëm. <sup>29</sup>E' kiè mékaitö Noé. \* Mik ie' tö ilà kiè méka, eta ie' tö iché: “Jehová tö íyök sulu'wa. E' kuëki se' kawötä kanëblök darë-rë ikuatkoie; erë alà i' tö se' keraë enuk.” <sup>30</sup>Noé kune, e' itökî Lámeç kî seneia duas cien skeyök kî dabom suliyök kî skel (595). E' shua ila'r kî kune wëpa alakölpa; <sup>31</sup>Es ie' kî duas deka seraä cien kuryök kî dabom kuryök kî kul (777) ta iblënewa.

<sup>32</sup>Noé kî duas de cien skeyök, e' itökî ila'r kune mañal. Ikibi kiè Sem. Ishu ék kiè Cam. Ibata ék kiè Jafet.

### S'ditsö ì sulu è wambleke kekraë

**6** <sup>1-2</sup>Mik s'ditsö alönémi tajë ká i' kî, eta Skëköl ala'r\*

\* 5.29 Noé: Hebreoie s'kiè e' wà kiane chè enuk.

\* 6.1 Skëköl ala'r: Kè s'wa ijcher mokî tö yi chéitö es. Welepa tö ibikeitsè tö e' dör Skëköl biyöchökwakpaie ö aknamaie erë Jesús tö iché tö esepa kè a senukwa s'ditsö ta (Marcos 12.25). Welepa skà tö ibikeitsè tö e' dör s'ditsö wésele ser suluë. Ì wambleke-rakitö ese kè wër buaë Skëköl wa, e' è jcher se' wa.

tö isué tö s'ditsö alà busipa dör bua'buuāa. E' kueki ie'pa tö busipa wa ie'pa wöbatse ese tsélur. <sup>3</sup>Eré Jehová tö iché: “Ditsö dör duöta'wa ese wakpa. I'ñe ta ye' kè tö kawö mepaiā ditsö a seno ká taië. Es iserdaë duas cien eyök kī dabom böyök (120), ekkē ulat.”

<sup>4</sup>Mik Skököl ala'r bak senuk s'ditsö alà busipa ta alà koka ie'pa ta, eta e' késka' ta wēpa blubluë, kākkeë, esepa wēlepa bak ká i' kī. Nies e' ukuökī wēpa esepa bakia. E'pa dör pē' darerē kkeauleka taië ia'chki ta ese.

<sup>5</sup>Jehová tö isué tö s'ditsö tö i sulu è wambleke taië shute. I suluë è bikeitseke ie'pa tö kekraë. <sup>6</sup>E' kueki Skököl er a idalēnene taië. Ie' tö ibikeitsé: “Kè yö ditsö yuöpa.” <sup>7</sup>Eta ie' iché: “Ditsö yö' ye' tö ká i' kī, súyö e'pa ewēwa. Nies iyiwak kos serke ká sí kī, e' ewerawayö. ¿Iie ye' tö ie'pa yö'?” <sup>8</sup>Eré wēm tso' eköl kiè Noé, e' sueke Jehová tö er bua' wa.

### Noé tö kanò bērie yuë

<sup>9</sup>Ttè ikkē dör Noé pakè.

Noé dör wēm yēsyesē Skököl wörki. Kekraë ie' tö Skököl ttö dalöieke buaë. Ie' eköl è serke wēs Skököl kī ikiane es. <sup>10</sup>Ie' ala'r dör mañal wēpa kiè Sem, Cam, ena Jafet.

<sup>11</sup>Skököl wörki s'ditsö tso' e' wamblök sulu ème, ñippök taië shute. <sup>12</sup>Ie' tö isué tö taië iyi suluë è tso' iyök kī. <sup>13</sup>E' kueki ie' tö Noé a iché: “Ye' tö ibikeitsétke tö ditsö kos tso' ká i' kī e' ewerawayö se. Ie'pa ñippöke taië shute ká i'

kī. E' kueki ye' tö ditsö kos tso' ká i' kī e' ewerawa seraā di' taië wa. <sup>14</sup>E' kueki kanò yuó etö bērie kal bua'buuā ese wa, e' shū blató. Kanò wōar tso' ipamik, e' wötó kiöchka dalolo bötsböts ese wa u'rki ena ishūā as di' kè tkōwāia. <sup>15</sup>Kanò yuó batsī metro dōka cien eyök kī dabom mañayök kī skel (135 metros) ekkē. Nies ishöló yuó metro dōka dabom böyök kī böt kī shāböts (22,5 metros) ekkē. E' sū ispe yuó metro dōka dabom eyök kī mañat kī shāböts (13,5 metros) ekkē. <sup>16</sup>Kanò kī u yuōka, eré kanò kkò kī iulat múat metro shāböts. Kanò shū blató mañat kuö. Nies iwékkö yuó et kanò spé mik shko-wāie kanò a. <sup>17</sup>Di' patkerayö iyi tso' ttsē'ka ká i' kī e' kos ewōwa. Ekkē duōrawā seraā ká wa'ñe. <sup>18</sup>Eré ye' ttè meraë be' a tö be' tsatkerayö kanò a di' yöki. Be' ala'r ena be' alaköl ena be' yakpa, e'pa tsúmi e' ta kanò a. <sup>19</sup>E' sū iyiwak kuā'kī kuā'kī tso' ká sí kī, e' iómi kanò a etö wē'ñe etö alaki as itsatker wēs be' es. <sup>20</sup>Iyiwak kos ió kanò a. Iyiwak kuā'kī kuā'kī urta', iyiwak uru, dò iyiwak e' kuke iski, e' kos iómi kanò a, etö wē'ñe etö alaki, as kè iduölur. <sup>21</sup>Nies chkè ulitane dapa'ú bló be' a ena iyiwak a katè.” <sup>22</sup>Eta ekkē kos wakanewé Noé tö se wēs Skököl tö iché ia es.

### Di' bak taië ká i' kī

**7** <sup>1-4</sup>E' ukuökī ta Jehová tö Noé a iché: “I'ñe kuiki ta ye' tö kalī patkeraë ká i' kī dōka ká dabom tkéyök (40) ñië nañeë. Ie' wa iyi ulitane yö' ye' tö tso' ttsē'ka ká sí



ki, e' kōs ɛwɛrawayō yēs! Erē ye' tō isuē tō ditsō ulitane shuā be' è serke buaē yēsyesē wɛs ye' kī ikiane es. E' kuēkī be' e' iōkā kanò a be' yamipa kōs tã. Ñies iyiwak batse'r\* kōs ese tsúmi dōkā kuktō wēñe kuktō alaki. Erē iyiwak kē dōr batse'r, ese tsúmi etō wēñe etō alaki. E' sù ñies dù kuā'kī kuā'kī tsúmi dōkā kul wēñe kul alaki as kē ierwa. Kōs ttè chéyō be' a, e' wakaneú es.”<sup>5</sup> Etã e' kōs wakanewé Noé tō yēsyesē wɛs Jehová tō ie' a iché es.

<sup>6</sup>Mik di' bak taijē ká i' kī, etã Noé kī duas tso' cien teryök (600).<sup>7</sup> Ie' e' iéka kanò a ila'r ena ilaköl ena iyakpa e'pa kōs tã e' tsatkök di' alörke taijē e' yökī.<sup>8-9</sup> Iyiwak batse'r, e' sù iyiwak kē dōr batse'r, iyiwak e' kuke ibatsi' kī ñies dù, ekkē kōs dewã kanò a Noé tã bölka bölka wɛs Skököl tō iché ia es.

<sup>10</sup>Ká de kul, etã di' tō ká katémitke.<sup>11</sup> Noé kī duas de cien teryök (600), kī si' et kī ká dabom eyök kī kul (17). E' diwō shà tã íyök tskirólone tã di' tso' idikiã e' deka taijē ká wa'ñe. Ñies ká jaishet kköburo-lone tã di' biteshka taijē kalije ká i' kī.<sup>12</sup> Etã kalij yēne darērēē dōkā ká dabom tkëyök (40) ñiē nañeē.<sup>13</sup> Kalij yēnemi, e' diwō shà tã Noé e' iéka kanò a ila'r tã. Ila'r kiè Sem, Cam ena Jafet. E' sù ilaköl, iyakpa mañal, e'pa e' iéka ñies ie' tã kanò a.<sup>14</sup> Ie'pa tã iyiwak ulitane dewã kanò a, iyiwak uru, iyiwak kañiru, iyiwak e' kuke iski kī ena dù ulitane. Ekkē kōs dewã kanò a ie'pa


tã.<sup>15</sup> Iyiwak kōs ekkē dewã kanò a bölka bölka.<sup>16</sup> E' shuā imí wēñe etō alaki etō, wɛs Skököl tō iché ia es. E' one yēs tã, Skököl tō kanò wékkō wötéwã.

<sup>17</sup> Etã kalij yēnemiie dōkā ká dabom tkëyök (40). Wɛs di' alör mirka es kanò batsemirkaitō.<sup>18</sup> Es di' kī alönemi taijē tã kanò batsemirkaitō buaē.<sup>19-20</sup> Es di' alöneka taijē kabata kōs blubluē, e' tsatã jaishet dō metro kul ekkē.<sup>21</sup> Es kōs íyi tso' ttsë'ka ká sí kī, ekkēpa duolur di' a sɛ. Dù kōs, iyiwak uru kōs, iyiwak kañiru kōs, iyiwak e' kuke iski kōs, ñies s'ditsō ekkēpa kōs duolur yēs.<sup>22</sup> I' kōs tso' ká sí kī ttsë'ka, e' enewa sɛ.<sup>23</sup> Erē Noé ena ì tso' ie' tã kanò a, e'pa è tsatkēne. Etã imalepa kōs e' enewa. Es ñies iyiwak ulitane ewéwa di' tō. Dù ulitane, iyiwak uru, iyiwak kañiru dō iyiwak e' kuke iski, ekkē kōs enewa sɛraã.<sup>24</sup> Es di' atɛ íyök kī ká dōkā cien eyök kī dabom skeyök (150) ekkē.

### Di' sinewãne

**8** <sup>1</sup> Erē Skököl kē éna Noé ché'wa. Ñies iyiwak ulitane tso' Noé tã kanò a e' kē ché'wa ie' éna. Ie' tō siwa' patké as itō di' siuwãne ká wa'ñe. Etã di' pasine-mine enaena.<sup>2</sup> Íyök tskirólone e' wötēnene. Ñies ká jaishet kköburo-lone e' wötērulunene. Etã kalij wöklönewã kē yërku'ia.<sup>3</sup> Di' tso'ia e' pasirmirne enaena. Ká de cien eyök kī dabom skeyök (150), etã di'

\*7.1-4 *Iyiwak batse'r*: E' wà kiane chē iyiwak kē dōr ñã ie'pa a. Se' welepa tō ichè iyiwak skítane.



*Skëköl tō Noé tsatkée kanò a di' taië e' yöki. (Génesis 7.23)*

sirmir ème. <sup>4</sup>E' k<sub>i</sub> si' de teröl (6) diwö de dabom eyök k<sub>i</sub> kul (17), etä erpa kanò sineka kabata kiè Ararat e' k<sub>i</sub>. <sup>5</sup>Etä di' pasinemiie. Si' de dabop (10), e' tsá diwö, etä kabata kakkeë ese wënemitke.

<sup>6</sup>E' k<sub>i</sub> ká de dabom tkëyök (40), etä Noé tō kanò wëkkö tsitsir kköppée. <sup>7</sup>Ie' tō dù öló sù, e' émi et. Erë dù e' kè dë'iane kanò a ie' urke wışwışh dò mik di' sine etä. <sup>8</sup>E' ukuök<sub>i</sub> tã ie' tō nuböl émi et isuöie tō ká sinene. <sup>9</sup>Erë di' tso'ia iyök k<sub>i</sub>, kam isirwa, e' kueki nuböl dene kanò a. Kè ie' wa ká ulat poppo kune e' tkowá. Noé tō nuböl kló'wéwa ulà wa tã itséwaneitö kanò a.

<sup>10</sup>Ie' tō iskà pané döká ká kul, etä ie' tō nuböl skà émine. <sup>11</sup>Ká tui-nemitke tã nuböl dene, e' wá kal ulatska debitu ikà k<sub>i</sub>. Es Noé éna iane tō iyök k<sub>i</sub> sirmir. <sup>12</sup>Ie' tō iskà pané döká ká kul, etä ie' tō nuböl skà émine. Nuböl e' kè dë'iane.

<sup>13</sup>Mik Noé k<sub>i</sub> duas tso' cien teryök k<sub>i</sub> et (601), etä iyök pasinene. Etä si' kewe, e' tsá diwö, ie' tō kanò k<sub>i</sub> u tso' e' kléttsá. Etä ie' isué tō iyök pasinene. <sup>14</sup>Kawö de si' et k<sub>i</sub> diwö dabom böyök k<sub>i</sub> kul (27), etä ie' isué tō iyök pasinene seraá. <sup>15</sup>Etä Skëköl tō ie' a iché: <sup>16</sup>“Be' e' yóttssá kanò a, be' alaköl tã, be' ala'r tã, be' yakpa tã ñies. <sup>17</sup>Es iyiwak ulitane yölurbö sę. Dù ena



*I' dör ák katatëule ka'ie iyi ña'woie Skëköl a ese. (Génesis 8.20)*

iyiwak uru ena iyiwak e' kuke iski e' kos yólurbö kanò a, as imi' ká wa'ñe alönuk tajë ká wà iökne.”

<sup>18</sup>Es Noé alaköl ena ila'r ena iyakpa, e'pa e' yélur kanò a. <sup>19</sup>Es ñies iyiwak ulitane, uru ena kañiru ena iyiwak e' kuke iski, ñies dù e' kos e' yéttsa kanò a se. <sup>20</sup>E' ukuöki ta ie' tö ák kataté ka'ie\* et Jehová a. E' bata ki ie' tö iyiwak batse'r ese jché ña'wéitö etö etö Jehová dalöioie. Ñies dù batse'r jchéitö ña'wéitö Jehová a etk etk. <sup>21</sup>Mik ishklé alar buaë, e' demi Jehová ska' ta ittseitö ta ibikeitséitö: “Eré ditsö ià duladula döka këchke, eta ì sulu è bikeitsekeitö. Erè kè yö ká sulu'wepawaiä ie'pa kueki. Es ñies kè yö ì kos tso' ttsë'ka e' ewëwaiä wes yö iewéwa es.

<sup>22</sup> “Ká i' tso'ia,

eta dalì kuatkërmi, iwà wörmi; kaba tso', kase tso' ñies; kalì tso', duas tso' ñies; ká ñiwe tso', ká nañewe tso' ñies.”

#### Skëköl Jehová tö ittè mé Noé a

**9** <sup>1</sup>Eta Skëköl er buaë ché Noé a ñies ila'r a ta ichéitö ie'pa a: “A' alönú tajë. Ká wa'ñe wà iöne a' ala'r wa. <sup>2</sup>Ditsö yöki iyiwak ulitane suardaë. Iyiwak ulitane urke kashuk a ena iyiwak serke ká sí ki ena iyiwak serke dayë a, e' kos ate a' dikia. <sup>3</sup>Iyiwak ulitane ena kalwö ena kakö e' katèmi a' tö wé kiane a' ki ese. E' kos méatyö a' a katanoie. <sup>4</sup>Chkè ulitane katèmi a' tö, erè kè ikatar ipé ta, se' serke s'pé mik e' kueki. <sup>5</sup>Se' serke s'pé mik, e' kueki kè se' meneat ñi ttökwa, e' nuí ta'.

\* 8.20 Ák kataté ka'ie: E' wà kiane ché si'kuaie altar.

Yi tö eköl ttéwā, ese kichatërdaë. E' sù iyiwak wé tö s'ttéwā, ese kawöta ttéwā ñies. A' wé tö s'ttéwā, ese nuí patuëraëitö ye' a.

6 “Skëköl tö s'ditsö yö' wës ie' es, e' kuëkî yi tö se' ttéwā, ese wák kawöta' ttéwā wake'.  
7 Erë a' alönú tajë, ká wa'ñie wà ió ala'r wa.”

8 Ñies Skëköl tö iché Noé a ena ila'r a: 9-10 “I'ñie ye' ttè mukeat a' a ena iyiwak e' yéttsa kanò a a' ta, e' kôs a. 11 Mokîë ye' tö a' a ichè tö ye' kè tö ditsö ena iyiwak tso' ká wa'ñie, e' kôs ewëpawaiä di' wa. Di' kè döpaia ká wa'ñie sulu'ukwā wës itka es.” 12-13 Ye' tö shkaba' tkekear mò shuā iwà kkachoie a' a ena ditsö ulitane a tö ye' ttè méatyö a' a ena iyiwak kôs a këkraë. 14 Mik ye' tö mò patké ta e' shuā shkaba' tkëne e' wërmi, 15 etā ye' éna iane tö ye' ttè me'atbak a' a ena iyiwak kôs a tö kè ye' tö ditsö ena iyiwak ulitane ewëpawaiä di' wa. 16 Es mik shkaba' tkëne mò shuā e' suéyö, etā bet ye' éna idaā tö ye' ttè me'at ditsö a ena iyiwak kôs a michoë këkraë. 17 E' dör iwà kkachoie tö ye' ttè me'atbak ditsö ulitane a ñies iyiwak tso' ká i' kî e' kôs a.” Es Skëköl tö Noé a iché.

**Noé alà kiè Cam  
e' kè wā iyé dalò ta'**

18 Noé ala'r e' yè'lur kanò a, e'pa kiè Sem, Cam ena Jafet. Cam dör Canaán yé. 19 E'pa mañal dör Noé ala'r. Ie'pa aleripa tö ká wà iéne.

20 Noé dalì kuatkëmi. E' shuā uva kuatkëitö. 21 Ká et ta ie' tö uva diò

shköshkö e' yé ta e' tö ie' ttéka tajë. Ie' datsi' yéttsa ta ianewa iškî sume iu a. 22 Cam dör Canaán yé, mik e' tö iyé sué sume, etā ie' míā ibiyó chök iëlpa böl e'pa a. 23 Erë Sem ena Jafet e'pa kè éna iyé tër sume e' suak. E' kuëkî ie'pa tö datsi' klö'wéwā, imékarakitö e' o' bata-kî ta ie'pa shkëmi tsikka iwötrélur bánet dò wé iyé tër eë ta ipabakéwā datsi' e' wa.

24 Noé tté tajë blo' tö e' tî'neka. Mik ie' wā ijchenewā ilà tsirla ék kè wā ie' dalöiëne', 25 etā ichéitö:

“iAs Canaán kawö tkò suluë!  
ie' weirdaë siarë shute klöulewā iëlpa böl e'pa kanè mésoie!”

26 E' ukuökî ta ikî chéitö:

“iJehová dör Sem Këköl as e' kikarka!

As Canaán aleripa kanëblö Sem aleripa a ikanè mésopaie.

27 As Skëköl kawö buaë mù Jafet a as ie' alör michoë.

As Jafet ditséwöpa ser Sem yamipa ska'.

As Canaán aleripa kanëblö ie' a klöulewā ikanè mésopaie.”

28 Di' bak tajë ká i' kî, e' ukuökî ta Noé sene'ia duas cien mañayök kî dabom skeyök (350). 29 Mik ie' blënewā, etā ie' kî duas tso' cien suliyök kî dabom skeyök (950).

**I' dör Noé aleripa kiè**

**10** 1 Noé ala'r kiè Sem, Cam ena Jafet. Di' bak tajë e' ukuökî ta ie'pa wák ala'r kune. Ikkëpa dör Noé aleripa kiè.

<sup>2</sup>Jafet ala'r wëpa dör Gómer, Magog, Madai, Javán, Tubal, Mésec, ena Tirás. <sup>3</sup>Gómer, e' ala'r wëpa dör Asquenaz, Rifat, ena Togarmá. <sup>4</sup>Javán e' ala'r wëpa dör Elisá, Tarsis, Quitim ena Rodanim. <sup>5</sup>E'pa kōs dör Jafet aleripa. Ie'pa ñi blatérak ulawa ulawa. Es iká yuérakitō tseë iwakpa a dayë kkōmik. Ittō kuá'kī kuá'kī iwakpamik.

<sup>6</sup>Cam ala'r wëpa dör Cus, Misraim, Fut, ena Canaán. <sup>7</sup>Cus ala'r wëpa dör Sebá, Havilá, Sabtá, Raamá ena Sabtecá. Raamá ala'r wëpa dör Sebá ena Dedán. <sup>8</sup>Cus dör wëm kiè Nimrod, e' yé. Nimrod de keweie blu' darërëë ká i' kī. <sup>9</sup>Jehová ttò wa Nimrod dör yëria poë. E' kuëkī ttè i' meneat se' a: “Be' dör yëria poë Skëköl ttò wa wës Nimrod es.” <sup>10</sup>Mik Nimrod bak ká kiè Sinar, e' wökirie etá ká e' shuá ká tso' tkël kiè Babel, Érec, Acad, ena Calné. E' kōs dör ká bua'ie ese. <sup>11</sup>Wëm e' yéttsá Sinar a eköl kiè Asur. E' mía ká bánet. Etá eë ie' ká yué tkël kiè Nínive, Rehobot-ir, Quélah ena Resen. <sup>12</sup>Resen dör ká bërie. E' atë Nínive ena Quélah, e' shushá.

<sup>13</sup>Etá Misraim aleripa mía ie'pa ikkë wakpaie: ludeowak, ana-meowak, lehabiwak, naftuhiwak, <sup>14</sup>patruseowak, casluhítawak, ena caftoritawak. Filisteowak datse caftoritawak wa.

<sup>15</sup>Canaán dör Sidón yé. Sidón dör ie' alà tsá. Ie' alà skà kiè Het. <sup>16</sup>Canaán aleripa mía ie'pa ikkë wakpaie: jebuseowak, amorreowak, gergeseowak, <sup>17</sup>heveowak, araceowak, sineowak, <sup>18</sup>arvadeowak,

semareowak ena hamateowak. Ká taië tá e' wakpa kōs ñi blabatsérak ponemi ká kuá'kī kuá'kī. <sup>19</sup>Canaán-wak ká atë ká kiè Sidón döwá ká kiè Gaza. Gaza atë ká kiè Guerar e' kke. Nies ie'pa ká atë döwá ká kiè Lesa diwö tskirke e' kke. Lesa atë ká tkël kiè Sodoma, Gomorra, Admá ena Seboím e' kke. <sup>20</sup>E' wakpa kōs dör Cam aleripa. Ie'pa ñi blabatsérak ulawa ulawa. Es iká yuëitörak tseë iwakpa a. Ittō kuá'kī kuá'kī iwakpamik.

<sup>21</sup>Nies Sem dè' alàë, e' dör Jafet ël kibi ék. Heber ala'r kōs dör Sem aleripa. <sup>22</sup>Sem ala'r dör Elam, Asur, Arfaxad, Lud ena Aram. <sup>23</sup>Aram ala'r dör Uz, Hul, Guéter ena Mas. <sup>24</sup>Arfaxad dör Sélah yé. Sélah dör Heber yé. <sup>25</sup>E' ukuökī tá Heber alà de böl. Eköl kiè Péleg. \* E' kèwö ska' tá sulitane ñi blabatsérak, e' kuëkī ikiè mékãitō es. Iëköl kiè Joctán. <sup>26</sup>Joctán ala'r dör Almodad, Sélef, Hasar-mávet, Jérah, <sup>27</sup>Hadoram, Uzal, Diclá, <sup>28</sup>Obal, Abimael, Sebá, <sup>29</sup>Ofir, Havilá, ena Jobab. E'pa kōs dör Joctán ala'r. <sup>30</sup>Ie'pa serke ká micho ká kiè Mesá tkörö ká kiè Sefar e' shuulat a. Sefar atë kabata a, wé diwö tskirke, e' kke. <sup>31</sup>E' wakpa kōs dör Sem aleripa. Ie'pa ñi blabatsérak ulawa ulawa. Es iká yuérakitō tseë iwakpa a. Ittō kuá'kī kuá'kī iwakpamik.

<sup>32</sup>Pè' kōs ekkëpa dör Noé aleripa kiè kitule wës iditséwö kuá'kī kuá'kī ena wé iserke ká kuá'kī kuá'kī es. Di' bak taië, e' ukuökī tá se' alöne-ne taië e' ñi blabatsérak ká wa'ñe.

\* 10.25 Péleg: Hebreoie s'kiè e' wà kiane chè ñi blabatsè.

Skëköl tö s'ditsö ké  
ttök kua'ki kua'ki

**11** <sup>1</sup>Kuaë ta sulitane ttöke ttè etökicha è wa. <sup>2</sup>Mik ie'pa míyaldak diwö tskirke, e' ëka, demirak kakkue kiè Sinar ee, eta ee ie'pa e' tséat senuk. <sup>3</sup>Ká et ta ie'pa iché ñi a: “Mishkarak skauchka yuök blok sù, e' kukuèsö bö' a as imi'a darërë u yuoie.” Es iwakanewérakitö ák skéie. Ñies kiöchka dalolo bötsböts ese wa ibatsérakitö ì tso' shutuule ese skéie. <sup>4</sup>E' ukuöki ta iskà chénerakitö ñi a: “Mishkarak ká blublu yuök. E' shua u yuösö kakkëë döka ká jai a. Es se' e' chömi buaë kékëpa taië ena kè se' kawöta ñi blabatsök ká wa'ne.”

<sup>5</sup>Erë Jehová e' éwa isaukrak tö ie'pa ká blublu yueke ena u kakkëë yuekerakitö. <sup>6</sup>Eta ie' tö ibikeitsé: “Ie'pa dör ká etkè wak ena ittörak etkè ñies, e' kuëki ie'pa tö kanè i' kékami. E' ukuöki ta kè ì a ie'pa wöklönuk. Ie'pa sermi wes ie'pa ki ikiane es. <sup>7</sup>E' kuëki súyö ie'pa kè ttök kua'ki kua'ki as kè ñi ttö ania.”

<sup>8</sup>Es Jehová tö iblabatsérak ká wa'ne. Ee ie'pa ká yué e' kané wöpanere. <sup>9</sup>Ká e' ki Jehová tö ie'pa ké ttök kua'ki kua'ki ena iblabatsérakitö ká wa'ne. E' kuëki ká e' kinewa Babel.\*

**Sem aleripa**

<sup>10</sup>I' dör Sem aleripa kiè. Di' bak taië, e' ukuöki duas bök, e' kèwö ska' ta Sem ki duas tso' cien eyök (100). Eta ie' alà kune wëm kiè

Arfaxad. <sup>11</sup>Arfaxad kune, e' ukuöki Sem kí seneia duas deka cien skeyök (500), eta ie' ala'r skà kune wëpa ena alakölpa.

<sup>12</sup>Mik Arfaxad ki duas tso' dabom mañayök kí skel (35) eta ie' alà kune wëm, e' kiè Sélah. <sup>13</sup>Sélah kune, e' ukuöki ta Arfaxad kí seneia duas cien tkëyök kí mañal (403), eta ie' ala'r skà kune wëpa ena alakölpa.

<sup>14</sup>Mik Sélah ki duas tso' dabom mañayök (30), eta ilà kune, e' kiè Heber. <sup>15</sup>Heber kune, e' ukuöki ta Sélah kí seneia duas cien tkëyök kí mañal (403), eta ie' ala'r skà kune wëpa ena alakölpa.

<sup>16</sup>Mik Heber ki duas tso' dabom mañayök kí tkël (34), eta ilà kune, e' kiè Péleg. <sup>17</sup>Péleg kune, e' ukuöki ta Heber kí seneia duas cien tkëyök kí dabom mañayök (430), eta ie' ala'r skà kune wëpa ena alakölpa.

<sup>18</sup>Mik Péleg ki duas tso' dabom mañayök (30), eta ilà kune, e' kiè Reú. <sup>19</sup>Reú kune, e' ukuöki ta Péleg kí seneia duas cien böyök kí sulitu (209), eta ie' ala'r skà kune wëpa ena alakölpa.

<sup>20</sup>Mik Reú ki duas tso' dabom mañayök kí bök (32), eta ilà kune, e' kiè Serug. <sup>21</sup>Serug kune, e' ukuöki ta Reú kí seneia duas cien böyök kí kul (207), eta ie' ala'r skà kune wëpa ena alakölpa.

<sup>22</sup>Mik Serug ki duas tso' dabom mañayök (30), eta ilà kune, e' kiè Nahor. <sup>23</sup>Nahor kune, e' ukuöki ta Serug kí seneia duas cien böyök (200), eta ie' ala'r skà kune wëpa ena alakölpa.

\* 11.9 Babel: Hebreoie s'kiè e' wà kiane chè chilineka.

<sup>24</sup>Mik Nahor k<sub>i</sub> duas tso' dabom böyök k<sub>i</sub> sulitu (29), etä ilà k<sub>u</sub>ne, e' kiè Térah. <sup>25</sup>Térah k<sub>u</sub>ne, e' ukuök<sub>i</sub> t<sub>a</sub> Nahor k<sub>i</sub> seneiä duas cien eyök k<sub>i</sub> dabom eyök k<sub>i</sub> sulitu (119), etä ie' ala'r skà k<sub>u</sub>ne wëpa ena alakölpa.

<sup>26</sup>Mik Térah k<sub>i</sub> duas tso' dabom kuryök (70), e' ukuök<sub>i</sub> t<sub>a</sub> ie' ala'r k<sub>u</sub>ne mañal. Ala'r e'pa kiè Abram, Nahor ena Harán.

### Térah ala'r

<sup>27</sup>E'pa dör Térah ala'r. Térah dör Abram, Nahor ena Harán, e'pa yé. Harán, e' dör Lot yé. <sup>28</sup>Harán blënewa kewe iyé Térah e' yöki ká kiè Ur ee. Ká e' atë Caldea. Ie' blënewa wé ie' k<sub>u</sub>ne ee.

<sup>29</sup>Abram senéwa alaköl kiè Sarai, e' t<sub>a</sub>. Nahor senéwa alaköl kiè Milcá, e' t<sub>a</sub>. Milcá dör Harán alà busi ena Iscá kutà. <sup>30</sup>Sarai kè döt<sub>a</sub>' alàè.

<sup>31</sup>Térah e' yéttsa Ur, dör caldeawak ká e' a. Ie' alà Abram ena itala kiè Lot dör Harán alà ena iyäk kiè Sarai e'pa mía ie' t<sub>a</sub>. Warma ie'pa m<sub>i</sub>rö döká ká kiè Canaán ee, erë ie'pa demi ká kiè Harán, etä ee ie'pa e' tséat senuk. <sup>32</sup>Eë Térah blënewa. Ie' k<sub>i</sub> duas tso' cien böyök k<sub>i</sub> skel (205).

### Jehová tté Abram t<sub>a</sub>

**12** <sup>1</sup>Mik Abram bak senuk ká kiè Ur ee, etä Jehová tö ie' a iyè': "Be' ká ena be' ditséwöpa ena be' yé yamipa, e' múat t<sub>a</sub> be' yúshka senuk, ká kkachekeyö be' a ee. <sup>2</sup>Ká e' k<sub>i</sub> ye' tö be' aleripa alöwëraë taië. Ie'pa döraë ká taië wakpaie. Ye' er buaë chöraë be'

a. Ye' tö pë' taië keraë be' kkeökka taië. Nies be' er buaë chöraë pë' taië a. <sup>3</sup>Wépa er buaë ché be' a, esepa a ye' er bua' chöraë. Wépa tö alibché be' k<sub>i</sub>, esepa we'ikerayö. Be' batamik ye' er buaë chöraë ká ulitane wakpa a."

<sup>4</sup>Etä Abram e' yéttsa ká kiè Harán wes Jehová tö ie' a iyè' es. E' këska' t<sub>a</sub> ie' k<sub>i</sub> duas tso' dabom kuryök k<sub>i</sub> skel (75). Ie' mía Canaán. <sup>5</sup>Etä ie' wä iyamipa mítser seraä. Ilaköl kiè Sarai ena ilayök kiè Lot ena iyi ulitane tso'rak iwä, ekkë kos mítserak iwä. Nies Harán wakpa welepa tso' ie' wä kanè mésoie, e' mítser ie' wä. Mik ie' demi Canaán, <sup>6</sup>etä ie' tkami ká kos ekkë dõmi ká kiè Siquem atë Canaán ee. Eë ká atë kiè Moré. Eë kós klò àr elka. Canaánwakpa a ká e' dör ká dalöiërta' ese. (E' kèwö ska' t<sub>a</sub> Canaánwakpa serkeia ee.) <sup>7</sup>Etä ee Jehová e' kkaché Abram a t<sub>a</sub> ichéitö ia: "Ká i' meraëyö be' ditséwö a."

Etä Abram tö ák kataté ka'ie et iyiwak jchoie Jehová dalöioie ee Jehová e' kkayë' ie' a e' kuëki. <sup>8</sup>E' ukuök<sub>i</sub> t<sub>a</sub> imía ká dör kabataie atë Betel diwö tskirke e' ëka. Etä ee ie' sené ekuölö. Ká e' atë Betel ena ká kiè Ai e' shuulat a. Eë ie' tö ák skà kataténe et. Eë ie' tö Jehová dalöié. <sup>9</sup>E' ukuök<sub>i</sub> t<sub>a</sub> Abram mía enaena Négueb kke.

### Abram mía Egipto

<sup>10</sup>E' kèwö ska' t<sub>a</sub> ketba tkënewa poë ká e' k<sub>i</sub>. Kè ì t<sub>a</sub>' katè wé Abram serke ee. E' kuëki ie' mía Egipto senuk ekuölö. <sup>11</sup>Abram dökemitke

Egipto etā ilaköl Sarai, e' a ichéitö: “Ye' ttò ttsó. Ye' wā ijcher buaë tö be' dör buaala. <sup>12</sup>Mik Egipto wakpa tö be' sué tö be' dör buaala, etā ie'pa tö ichèmi: ‘Wì dör wëm wì alaköl.’ Etā ye' tterawā ie'pa tö be' kuëkì erè ie'pa be' meraat senukwā ie'pa tā. <sup>13</sup>E' kuëkì, be' we'ikèyö, ichó ie'pa a tö ye' dör be' akè as kè itö ye' ttöwā be' kuëkì as ye' kawö tkò buaë.”

<sup>14</sup>Mik Abram demi Egipto, etā Egipto wakpa isué tö Sarai dör alaköl buaala. <sup>15</sup>Ká e' blú kuëblupa tö isué ñies tö Sarai dör alaköl buaala. E' kuëkì ie'pa míā ichök blu' a tö alaköl e' dör buaala. Etā imítserak iwā blu' wé a.

<sup>16</sup>Etā Egipto blú tö Abram kkö'né buaë Sarai dalërmik. Tajë ie' tö Abram a iyiwak uru kakmé. Obeja, baka, burro ena kameio e' kakméitö ie' a. Se' ñies kakméitö ie' a kanè mésoie wëpa ena alakölpa. <sup>17</sup>Erè Sarai kuëkì Jehová tö Egipto blú ena iyamipa we'iké tajë. Duè mékajä tajë ie'pa kì. Kawö darërèé mékajitö ie'pa kì. <sup>18</sup>E' kuëkì Egipto blú tö Abram tsuk patké tā ichéitö iā: “¿Iók bö iwamblé ye' tā es? ¿Ì kuëkì be' kè wā ye' a iyène tö alaköl i' dör be' alaköl? <sup>19</sup>Be' tö ye' a iyè' tö ie' dör be' kutà. E' kuëkì tsir etā ye' senéwā ie' tā. I' be' alaköl, itsúmine tā be' yúshka.” <sup>20</sup>Etā Egipto blú tö ishkèkipa patké Abram yöktsā kā e' kì ilaköl tā ena i kōs tso' ie' wā ekkëpa tā.

#### Abram ena Lot ñi blabatsélor

**13** <sup>1</sup>E' ukuökì tā Abram ena ilaköl e' yélur Egipto míāne Négueb. Ie' íyi kōs mítserak iwā sēraā. Ie' alayök Lot e' míā ie'pa

tā ñies. <sup>2</sup>Abram dör íyi blu' tajë. Ie' wā oro tso'. Ie' wā inuköl tso' tajë. Ñies ie' wā iyiwak tso' tajë. <sup>3</sup>Négueb eē tā ie' míāne enaena dō Betel. Betel eē tā ie' míāne tkörö wé ie' bak senuk kewe eē. Ká e' atē Betel ena Ai e' ulat shushā. <sup>4</sup>Ká e' a ie' wā ák katatëulebak ka'ie, eē ie' tö Jehová dalöiéne.

<sup>5</sup>Lot dör ñies íyi blú tajë wēs iyëla Abram es. Iyiwak tso' tajë ie' wā obeja ena baka. Se' tso' ie' wā ñies kanè mésopaie. <sup>6</sup>Erè wé ie'pa serke ká e' kì kākō kè ku'ia ie'pa iyiwak kōs a katè. Ie'pa kè chë'kaia ñi o'mik. <sup>7</sup>Abram ena Lot e'pa iyiwak kkö'nukwakpa ñippöke, ñi wõnatkōke. Ñies pè' tso'tke kenet ká e' kì. E' wakpa dör canaánwak ena fereseowak. <sup>8</sup>Ká et tā Abram tö iché Lot a: “Se' dör ñi yami. Kè imène buaë tö se' ñippò. Ñies se' iyiwak kkö'nukwakpa ñippöke ème e' kè dör buaë. <sup>9</sup>Ká saú wì ká bua' tso'. Be' ishushtó wéne wa be' wöbatse, e' a be' yúshka. Be' mí wì ëkā, e' tā ye' mí dià ëkā. Etā be' mí dià ëkā, e' tā ye' mí wì ëkā.”

<sup>10</sup>Etā Lot ká kì sué kamië, etā kōs di' kiè Jordán, e' kkömik ká buaë tso', e' kì sué ie' tö. Etā ie' tö isué tö ká e' dör buaë dō ká kiè Sóar eē. Buaë di' tso' wēs ká buaë yò' Jehová tö es ena wēs Egipto es. (E' kēwö ska' tā kam Jehová tö ká kiè Sodoma ena ká kiè Gomorra, e' böt eüwa.) <sup>11</sup>Etā kakkue tso' Jordán di' kkömik e' shushaté Lot tö, etā e' wa ie' míā. Es ie'pa ñi blabatsélor. <sup>12</sup>Abram e' tséat senuk Canaán. Lot míā senuk Jordán kakkue kì, eē ká tso'tseë. Ie' sené tsinet ká kiè



Sodoma e' o'mik. <sup>13</sup>Sodoma wakpa, serke suluë. Ie'pa ì sulu è wamble-ke kekraë Jehová wöa.

<sup>14</sup>Lot mía e' ukuökì tã, Jehová tö iché Abram a: "Wé be' tso' ee ká kî saú bua'ie shkit wówí wöiá dià éka jaì éka ká wa'ñe tö ÷is idör? <sup>15</sup>Ká kos kî suébö, e' meraëyö be' a ena be' aleripa a kekraë. <sup>16</sup>Ye' tö be' aleripa alöweraë taië wes íyök po taië es. Wes íyök po kè shtarpa' es be' aleripa alördaë kè ishtarpa yi a. <sup>17</sup>Ká i' kos meraëyö be' a. E' kuekì be' yú iweblök seraq."

<sup>18</sup>Etã Abram e' yéttsã tã imía senuk kós klò wökir àr taië dör wëm kiè Mamré e' icha ee. E' ate tsinet ká kiè Hebrón ee. Eë Abram tö ák skà kataté ka'ie Jehová dalöioie.

#### Abram tö ilayök Lot, e' tsatké

**14** <sup>1</sup>E' kéwö ska' tã blu'pa tso' tkël. Eköl kiè Amrafel, e' dör ká kiè Sinar, e' blú. Iëköl kiè Arioc, e' dör ká kiè Elasar, e' blú. Iëköl skà kiè Quedorlaómer, e' dör ká kiè Elam, e' blú. Etã ibata ék kiè Tidal, e' dör ká kiè Goím, e' blú. <sup>2</sup>Blu'pa skà tso' dökã skël e' eköl kiè Bera, e' dör ká kiè Sodoma, e' blú. Iëköl kiè Birsá, e' dör ká kiè Gomorra, e' blú. Iëköl kiè Sinab, e' dör ká kiè Admá, e' blú. Skà kiè Seméber, e' dör ká kiè Seboím, e' blú. Ibata ekkë e' dör ká kiè Bela, e' blú. Ká e' kiè Sóar ñies. E' kéwö ska' tã blu'pa dökã tkël ñe' e' kékã ñippök blu'pa skà dökã skël ñe' tã. <sup>3</sup>Blu'pa skël e'pa tö ñippök wakpa dapa'wé ek tsiní ñippök blu'pa tkël e'pa tã kakkue kiè Sidim ee.

Eë dayë wölö me'r bërie kiè Mar Muerto.

<sup>4</sup>Blu'pa dökã skël e'pa bak senuk iwakpa tã dökã duas dabom eyök kî bök (12), blu' kiè Quedorlaómer, e' dikia. Mik e' kî duas de dabom eyök kî mañal (13) etã ie'pa kè éna Quedorlaómer ttè dalöiakia. Ie'pa e' kakkã ñippök ie' tã. <sup>5</sup>E' kî duas de ek etã Quedorlaómer e' yéttsã mía ñippök ibolökpa tã. Blu'pa dökã mañal dör ie' klépa, e' míyal ie' tã ñippök. Ie'pa mía ká kiè Astarot Carnaim tã ee ie'pa e' alékã refaítawak kî. E' ukuökì tã ie'pa e' alékã zuzitawak kî, ká kiè Ham ee. E' ukuökì tã ie'pa e' alékã emiwak kî, e' wakpa ká kiè Savé-quiriataim. <sup>6</sup>E' ukuökì ie'pa e' alékã horeowak kî kabata kiè Seír ee. Etã itötiémi ie'pa tö dò tkörö ká kiè El-parán ee. Ká e' atë ká sir poë, e' kkömik. <sup>7</sup>Etã ee ie'pa bitene itò wane dò ká kiè En-mispat. Ká e' kiè Cadés ñies. Ie'pa e' alékã Amalec aleripa kî tã iká klö'wéwarakitö. Ñies ie'pa e' alékã amorreowak kî. E' wakpa ká kiè Hasesón-tamar. E' ukuökì tã ie'pa mi'ke ñippök blu'pa skël tã. E' kuekì blu'pa skël e' dapa'wékã Sidim kékkué kî blu'pa tkël kî nuk ñippoie.

<sup>8-9</sup>Etã Sodoma blú ena Gomorra blú ena Admá blú ena Seboím blú ena Bela blú (Bela kiè Sóar ñies), blu'pa skël ekkëpa ñi dapa'wékã Sidim kékkué kî ñippoie, Quedorlaómer, e' dör Elam blu', e' tã ena blu'pa tso' ie' tã e'pa tã ñies. Blu'pa e'pa dör Tidal, e' dör Goím blu'. Iëköl dör Amrafel, e' dör Sinar blu'. Bata ék dör Arioc, e' dör

Elasar blu'. Es blu'pa tkël míyal ñippök blu'pa skel ta. <sup>10</sup>E' kēwō ska' ta Sidim kēkkue kī kiöchka dalolo bötsböts ese dapé tso' taië. Mik Sodoma wakpa ena Gomorra wakpa tkayal ñippè yökī eta ie'pa shäböts anemi kiöchka dapé tso' taië ese a. Imalepa tkayalmi kabata shua.

<sup>11</sup>Es blu'pa döka tkël e'pa e' aléka blu'pa skel kī. Eta ie'pa tö chkewō ena iyi bua'buatso' Sodoma ena Gomorra e' kos klö'wēwarakitō ta iponemirak. <sup>12</sup>E' kēwō ska' ta Abram alayök Lot serke Sodoma. E' mítserak iwā, es ie' dalì kos e' mítserak iwā ñies.

<sup>13</sup>Eta ñippè shua wēm tka-shkar eköl, e' wā ibiyō mí Abram a. Abram e' dör hebreowak. Ie' serke tsinet wēm kiè Mamré dör amorreowak e' kós klò wökir àr ee. Mamré dör Escol ena Aner èl. Ie'pa wa Abram wër buaë.

<sup>14</sup>Mik Abram tö ibiyō ttsé, eta ie' kanè mésopa kune ie' u a, e'pa dapa'wéitō döka cien mañayök kī dabom eyök kī pàköl (318) ilayök tsatkoie. Eta ie'pa míyal blu'pa tkël itökī döka ká kiè Dan ee. <sup>15</sup>Eta nañewe ie'pa demi me'ie ñippémiie blu'pa ta. Eta ie'pa tö blu'pa töiëmi tkörö ká kiè Hobá ee. Hobá atē ká kiè Damasco e' wöwí. <sup>16</sup>Eta ì kos minetser blu'pa wā, e' kos yélur ie'pa tö blu'pa ulà a. Es Abram tö ilayök Lot e' tsatkée. Ñies ì tso' ilayök wā e' kos dene iulà a. Ñies alakölpa ena pē' malepa tso' klöulewā e'pa kos tsatkée ie' tö.

### Melquisedec er buaë ché Abram a

<sup>17</sup>Mik Abram e' aléka Que-dorlaómer kī, e' sù blu'pa mañal shkōke ie' ta, e'pa kī. E' ukuökī ta ie' bitene de Savé kēkkue kī. Kakkue e' kiè ñies Blu' Kēkkue. Eta ee Sodoma blú de ie' ñaletsuk ie' shke'uk. <sup>18</sup>Ñies ká kiè Salem, e' blú kiè Melquisedec, e' dör Skëköl dör iyi ulitane tsata e' sacerdote. Ie' tö pan ena vino yéttsa. <sup>19</sup>Eta ie' er buaë ché Abram a ttè i' wa:

“Skëköl dör iyi ulitane tsata, e' tö ká jaì ena ká i' yö'.

Ie' tö be' kímè as be' kawö tkò buaë kekraë.

<sup>20</sup>Ie' dör iyi ulitane tsata, e' kīkōkasö.

Ie' tö be' kímé e' alökka be' bolökpa kī, e' kuëkī ikīkōkasö.”

Eta iyi kos de Abram ulà a ñippè shua, e' mú blatèsö döka dabop ta e' tsá eyök yéttsaitō méitō Melquisedec a Skëköl dalöioie. <sup>21</sup>E' ukuökī ta Sodoma blu' tö iché Abram a:

—Sa' yamipa tsatkée be' tö, e'pa múne ye' a. Erè dalì kos e' tsúmi be' tö be' a.

<sup>22</sup>Erè Abram tö iüté:

—Au. Jehová dör Skëköl iyi ulitane tsata, e' tö ká jaì ena ká i' yö', ie' a ye' kablétke <sup>23</sup>tö ì kos dör be' icha, e' kè tsepaatyö yës. Dò be' datsi'takla ö be' klökkuö kicha kè tsepaatyö etkla wē'ia as kè be' ichò tö be' iyi wa ye' blune. <sup>24</sup>Kè ì kiane ye' kī ye' wák a. Chkò kos ñétke ye' kanè mésopa tö, e'

è dör wë' ye' a. Erë wépa dare ye' ta ñippök bulu'pa ta kiè Aner ena Escol ena Mamré, as ie'pa wä dali kakmi' kos ikawötä tsukmi eköl eköl ekkë.

Jehová tö ittè mé Abram a

**15** <sup>1</sup>E' ukuökì ta Jehová tté Abram ta kabsueie, etä ichéitö ia:

—A Abram, kè be' suanuk. Ye' dör be' tsatkökwak. Íyi buaë merayö be' a tajë shütë.

<sup>2-3</sup>Erë Abram tö iüté:

—A Skëköl, ye' wák alà kè ta', e' kuëki ì kos memibö ye' a e' kè dör ìie bua' ye' a. Ye' íyi kos atdaë ye' kanè méso kiè Eliézer dör Damasco wak e' ulà a. Erë ie' dör o'ka.

<sup>4</sup>Etä Jehová tö iüté:

—Be' wák alà kurdaë, e' kè dör o'ka.

<sup>5</sup>Etä Jehová wä Abram mítser u'rki, ta ichéitö ia:

—Ká saú buaë siwa' ki. Bëkwö saú ta ishta'ú. ¿Be' a ishtarmi? E'ma bua', es be' aleripa alördaë tajë.

<sup>6</sup>Etä Abram erblé Jehová mik, e' kuëki ikl'wéitö wes pë' buaë yësyësë es.

<sup>7</sup>Etä ichéitö ia:

—Ye' dör Jehová. Ye' tö be' yë'ttsa caldeawak ká kiè Ur e' a ká i' moie be' a ena be' aleripa kos a.

<sup>8</sup>Etä Abram ie' a ichaké:

—A Skëköl, ¿wes e' jchermi ye' wä yësyësë tö ká i' dõmi ye' ulà a?

<sup>9</sup>Jehová tö iüté:

—Baka ena chibo ena obeja e' kos ki duas tso' mañal, ese tsúbitu

ña etö etö. Ñies nuböl et ena ipupu-la et, e' tsúbitu ña.

<sup>10</sup>Etä Abram wä iyiwak kos ekkë debitu Jehová a. Etä ie' tö iyiwak e' ttélur télor shushaë. Shaböts méwaitö wí wa shaböts méwaitö i' wa. Es iate ñi wöshaë. Erë dù kè ténane ie' wä es. <sup>11</sup>Etä öló dettsa iyiwak chkà dalërmik, erë Abram tö ibukueke chkè ki. <sup>12</sup>Ká tuinemitke, etä Abram kapowä tajë. E' bet Abram pamik ká mía ttsettseë shütë se' suawë ekkë.

<sup>13</sup>Etä Jehová tö iché ia:

—Be' wä ijchenú buaë tö be' aleripa serdaë ká kua'ki ki wes ká kua'ki wakpa es. Eë ie'pa klördawä kanè mésopaie kè patueta'. Ie'pa weirdaë dökä duas cien tkëyök (400), ekkë ulatök. <sup>14</sup>Erë ká wé wakpa tö ie'pa we'ikera, e' wakpa ské we'ikerayö siarë. E' ukuökì ta be' aleripa yërdattsä ká e' a. Ie'pa wä iyi bua'bu tuë darë-rëë ese miraë tajë iwákpa a. <sup>15</sup>Etä mik be' kënewä etä be' duöwami buaë, kè weir ta'. Es be' michoë be' deütöpa itökì. <sup>16</sup>Etä mik be' aleripa tso' ká kua'ki ñe' a e'pa de dökä tkëtökicha, etä ie'pa dörane ká i' ki. Ká i' wakpa, kiè amorreowak, kam e'pa tö ì sulu wamblò dò wë' ishuloie. E' kuëki be' aleripa kè döpane ká i' ki bet.

<sup>17</sup>Katuine de kamië, etä ì dettsa tabechka ukuöie, e' shüa shkle batröke tajë. Ñies kuatak sí wöñarke tajë ese dettsa ta itkami iyiwak chkà blatëule tkëter eë, e' shusha. <sup>18</sup>Etä Jehová tö tté mé Abram a i' es: —Ká i' meraëyö be' aleripa a. Di' kiè Egipto dí\* eemi dökä di'

\* 15.18 Egipto dí: E' kè dör di' bérie tso' Egipto kiè Nilo e'. E' dör di' tsitsirla tso' Egipto ena Canaán e' shusha.

kibi kiè Éufrates, ká ekkè kōs meraëyö be' aleripa a. <sup>19</sup>Iñe ta ká e' dör quenitawak, quenizitawak, cadmoneowak, <sup>20</sup>hititawak, fere-seowak, refaitawak, <sup>21</sup>amorreowak, canaánwak, gergeseowak ena jebu-seowak e'pa kōs wakpa ká.

### Abram alà kune kiè Ismael

**16** <sup>1</sup>Abram alaköl Sarai, e' kè döta' aläë. Ie' wā alaköl tkēr eköl kanè mésoie kiè Agar. E' dör egiptowak. <sup>2</sup>Etā Sarai tö iché Abram a:

—Isaú tö Jehová kè wā ye' a alà mène. E' kueki be' senú ye' kanè méso Agar ta. Etā isalema ie' batamik alà dōmi ye' ulà a.

Etā Abram tö Sarai ttō iüté. <sup>3</sup>Etā Sarai tö egiptowak tso' ie' wā kanè mésoie, e' tsébitu, mé iwēm a alakölie. E' kéwō ska' ta ie'pa sené Canaán e' kī duas de dabop. <sup>4</sup>Etā Abram senéwā Agar ta, etā Agar duneka. Mik ie' isué tö ie' duneka, etā ie' tö iwōkir Sarai suémi suluë. <sup>5</sup>Etā Sarai tö iché Abram a:

—iBe' iane iwiie tö Agar tö ye' sueke suluë! Ye' wák tö be' a Agar me' alakölie i' ta idurtke e' wā kurdaë, etā ie' e' ttsöke jaishet ye' tsata. iAs Jehová tö se' a ichò tö yi iane iwiie, ye' ö be'!

<sup>6</sup>Etā Abram tö iüté:

—Ye' ttō ttsó, be' kanè méso tso' be' ulà a. Be' iú wes be' éna iwak es.

E' ukuökj ta Sarai tö ikanè méso we'ikémi taië. E' kueki Agar tkashkar. <sup>7</sup>Etā Jehová biyöchökwak

bua'ie, e' tö ikué di' tum o'mik ká wé kè yi ku' ese ska'. Di' tum e' tso' ñala micho ká kiè Sur e' kkömik.

<sup>8</sup>Etā Jehová biyöchökwak bua'ie tö ie' a ichaké:

—A Agar, Sarai kanè méso, ¿Wé be' bite? ¿Wé be' micho?

Ie' iüté:

—Ye' tkashkar ye' wōkir Sarai yöki.

<sup>9</sup>Etā ie' iché ia:

—Be' dakóne be' wōkir ska' ta idalöió bèrè.

<sup>10</sup>Ie' tö ikí ché ia:

“Ye' be' aleripa alöweraë taië.

Kè yi a ishtanuk ekkè.

<sup>11</sup>Be' eriarke, e' ttsé Jehová tö, e' kueki se' be' dur, e' wā kune, ta ikiè múkabö Ismael.\*

<sup>12</sup>Be' alà döraë wes burro pupula kè urutërta' es.

Ie' ñippöraë darërè sulitane ta. Nies sulitane ñippöraë ie' ta.”

Ie' serdaë kekraë ñippök iëlpa ta.

<sup>13</sup>Jehová tté Agar ta, e' ukuökj ta Agar tö iché: “Skököl ye' sué, e' wák suéwayö.” E' kueki ie' tö Skököl kié i' es: “Skököl tö ye' sué e'.” <sup>14</sup>E' kueki ñies di' tum e' kiè mékaitö: “Skököl tso' e' ye' sueke”. Di' tum e' tso' Cadés ena Béred e' shushaë.

<sup>15</sup>E' ukuökj ta Abram alà kéka Agar ta e' wā kune wák wēm. Abram tö ikiè méka Ismael. <sup>16</sup>Ismael kune, e' kéwō ska' ta Abram kī duas tso' dabom paryök kī teröl (86).

\* 16.11 *Ismael*: Hebreoie s'kiè e' wā kiane chè *Skököl tö ittsé*.

**Jehová tò ittè mé Abraham  
a, e' wà kkacho méatitò**

**17** <sup>1</sup>Mik Abram k<sub>i</sub> duas tso' dabom suliyök k<sub>i</sub> sulitu (99), etä Jehová e' kkaché ie' a ta iché ia:

—Ye' dör Skököl Diché Ta' Iyi Uli-tane Tsata e'. Be' senú yesyësé ye' wörki kekraë, <sup>2</sup>e' ta ye' ttè meraë be' a tò be' aleripa alördaë taië be' itöki.

<sup>3</sup>Etä ie' e' téwä iski iwötsa méwä iyök ki. E' dalewa Skököl tso' ttök ie' ta, ta ichéitö ia:

<sup>4</sup>—Ye' ttè meke be' a e' dör i' es: Be' döraë ká taië wakpa yéie. <sup>5</sup>E' kuëki i'ñe ta be' kè kiëia Abram. Ye' tò be' tkéka ká taië wakpa yéie, e' kuëki be' kiè mékayö Abraham.\* <sup>6</sup>Ye' tò be' aleripa alöweraë taië. Ie'pa döraë blu'paie ena ká taië wakpaie. <sup>7</sup>Kekraë ye' dör be' Kököl ñies be' aleripa Kököl. Kawö e' mekeyö be' a. <sup>8</sup>I'ñe ta be' serke Canaán, ká e' kos meraëyö be' a ena be' aleripa a. E' atë ie'pa ulà a kekraë. Ye' dör ie'pa Kököl.

<sup>9</sup>Skököl tò iskà chéne Abraham a:

—Erë be' ena be' aleripa kos e' kawöta ttè muk ye' a ñies. <sup>10</sup>E' dör i' es: A' wëpa kos kawöta itöttola kkuölitla tök tsir. <sup>11</sup>E' kuëki a' wëpa kos e' wakyó es. E' tò ikkacheraë tò se' ttè me' ñi a. <sup>12</sup>Kekraë kos a' ala'r kurke

wëpa, ñies a' kanè mésopa ala'r wëpa, mik e' ki ká de pàköl, etä a' kawöta iwakyuök es. <sup>13</sup>A' kawöta iük kröröë ala'r kos kurke a' u a ekkëpa ta. Es ttè me'tkeyö a' a, e' atë wakyöule a' chkà ki kekraë. <sup>14</sup>Wëm kè wakyöule, ese kè wä ye' ttò dalöiëne, e' kuëki kè ikawö ta'ia senuk a' shua.

<sup>15</sup>Ñies Skököl tò iché Abraham a:  
—Be' alaköl kè kiëia Sarai. I'ñe ta ikirdaë Sara.\* <sup>16</sup>Ye' er buaë chöraë ie' a as ie' alà kòka be' a. Moki ye' er buaë chöraë ie' a. Ie' döraë ká taië wakpa mië. Ñies ie' aleripa shu döraë blu'paie.

<sup>17</sup>Abraham skà e' téwane iski iwötsa méwäitö iyök ki. E' dalewa ijañéka ta ibikeitséitö: “¿Ye' ki duas tso' cien eyök (100), wes e' dòmi yéie? ¿Sara ki duas tso' dabom suliyök (90), etä wes ie' dòmi alà?”

<sup>18</sup>Erë ie' tò iché Skököl a:

—iBe' mú er buaë chò Ismael a!

<sup>19</sup>Erë Skököl tò iiuté:

—Au, e' kè dör es. Be' alaköl Sara, e' döraë alàë ta ikië múkabö Isaac. Ttè me'yö be' a e' è meraneyö ie' a ena ie' aleripa a kekraë. <sup>20</sup>Kè ye' éna Ismael chë'wa. Ye' tò ie' kimeräë ñies. Ye' tò ie' ala'r alöweraë taië as ileripa dö taië ká i' ki. Ismael döraë s'blu'pa dökä dabom eyök ki böi e'pa yéie. Ie' aleripa alördaë taië. <sup>21</sup>Erë ttè me'tkeyö be' a e' atdaë be' alà kurdaë kië Isaac e' a. Be' alà e' kera-ka Sara tò duas iëk wa kawö ikkë ta.

\* 17.5 Abraham: Hebreoie s'kië e' wà kiane chë ká wakpa taië, e' yé.

\* 17.15 Sarai: Erë s'kië e' ena Sara ttsër bërë kuä'ki, erë iwà dör ñies. Iwà kiane chë blu' alà busi ö alaköl dalöiërta' taië ese. Skököl tò ie' kië mane'wé es iwà kkachöie tò ttè mène Abraham a e' wà döraë ie' ki ñies.

<sup>22</sup>Mik Skéköl tté one Abraham ta, ta imía. <sup>23</sup>E' wöshaë Abraham tö ilà Ismael e' tottola kkuölitla téé tsir. Nies ie' wa kanè mésopa tso' kune ie' u a ena wëpa toule ese, e'pa kos tottola kkuölitla tééitö tsir wes Skéköl tö iyë'ia es. <sup>24-25</sup>Mik Abraham ki duas tso' dabom suliyök ki sulitu (99) ena ilà ki itso' dabom eyök ki mañal (13) eta ie'pa tottola kkuölitla tëne tsir.

<sup>26-27</sup>Es e' diwö è wa Abraham ena ilà tottola kkuölitla tëne tsir. Nies wëpa dör ie' kanè mésopa, e'pa kos tottola kkuölitla tëne tsir.

**Jehová tö iché Abraham  
a tö alà meraëyö be' a**

**18** <sup>1</sup>Ká et dibata a ta Abraham tkër ie' ukkö a. Ie' u tso' wé wëm kiè Mamré e' kós klò wökir àr ee. Ie' tkër ee eta Jehová e' kkaché ie' a. <sup>2</sup>E' wà pakè i' es: Abraham wökéka ta ie' isué tö wëpa de iëter ie' wörki mañal. E' sué ie' tö ta bet ie' e' kéka, mía ie'pa ñaletsuk ta ie' e' téwa iski ta iwötsa méwa iyök ki ie'pa shké'woie. <sup>3</sup>Ie' tö iché:

—A kékëpa, be' we'ikèyö, kè be' minuk bet. <sup>4</sup>Ye' mi' di' tsuk a' klò skuoie, e' ukuökí ta a' enú bèrè kal i' dikia. <sup>5</sup>A' detke ye' ska', eta ilè mekeyö a' a ñè as a' diché iërne shkoie.

Etá ie'pa tö ie' iüté:

—E'ma iú wes be' tö iché es.

<sup>6</sup>Abraham tkawa iu a, ta ichéitö Sara a:

—Bet, harina bua'buá yuló kilo döká dabom böyök (20) ekkè, e' wa pan yúó.

<sup>7</sup>E' ukuökí ta bet ie' wák tunemi baka pupula shushtök wé bua'buá

ese klò'wéwaitö. E' mítser ie' wa méitö ikanè méso eköl a. Bet ta ikanè méso tö ikanewé ie' a katè. <sup>8</sup>Abraham tö baka chkà ena baka tsu'diö wösi ena baka tsu'diö pa'ali e' mé ie'pa a. Ie'pa tulur chkök kal àr ukkö a e' dikia. E' dalewa Abraham dur ie'pa tiök ee.

<sup>9</sup>E' dalewa ie'pa tö ichaké Abraham a:

—¿Wé be' alaköl kiè Sara e'?

Ie' iüté:

—Ie' tkër weshké.

<sup>10</sup>Etá ie'pa eköl tö iché ia:

—Duas iëk e' wa ye' döne be' pakök. E' kéwö ta be' alaköl Sara alà ta'tke.

E' dalewa Sara tkër Abraham tsikka u wékkö a. Ie' tso' ie'pa ttöke, e' ttsök. <sup>11</sup>Abraham ena ilaköl, e' dewatke kékëpala. Bànet Sara kè tö alakölpa duè sueta'ia. <sup>12</sup>E' kuëki Sara kè a jañè wöklönuk ta ibikeitsé: “¿Wes ye' tö ttè i' klò'wèmi tö sa' kërulunetke e' dõmi alàè?” <sup>13</sup>Jehová tö iché Abraham a:

—¿I kuëki Sara jañéka? ¿I kuëki ie' tö iché: “¿Wes ye' kënewatke e' dõmi alàè?” <sup>14</sup>Kè ì ta ye' a darërè. Duas iëk ye' döne, eta ie' alà ta'tke.

<sup>15</sup>Sara suane e' kuëki ichéitö: “Kè ye' jañine!”

Erè Jehová tö iché ia:

—E' kè dör es. Mokí be' jañéka.

**Abraham kköché Jehová a  
Sodoma wakpa tsatkò**

<sup>16</sup>E' ukuökí ta ipakökwakpa e' duékarak ta imíyal dò wé Sodoma kí wëne ee. Abraham tö inälé mére e' choat ie'pa a. <sup>17-19</sup>Etá Jehová tö

ibikeitsé: “Abraham aleripa alördaë tajë diché tã' tajë. Ye' tö iyë'at ie' a tö ie' batamik ye' er buaë chöraë ká ulitane wakpa a. Ye' tö ie' shukit as ie' tö ila'r ena ileripa a ichò tö ye' ttè dalöió ñies tö ì kòs buaë yësyësë e' ú. Es ì kòs yë'yö ie' a e' weraëyö. E' kuëki ye' kawöta ichökia tö iók ye' mí Sodoma.” <sup>20</sup>E' kuëki ie' tö iché Abraham a:

—Sodoma wakpa ena Gomorra wakpa e' wamblökerak suluë tajë shütë, e' ché sulitane tö. <sup>21</sup>E' kuëki ye' mía ee isauk tö yëne ie'pa e' wamblöke suluë ichók wës ye' a ikkatëne es.

<sup>22</sup>Etã Abraham pakökwakpa böl e' yéttsã mía Sodoma. Erë Abraham atë dur Jehová tã. <sup>23</sup>Ie' e' skéwã tsinet Jehová ska' tã ichakéi-tö ia:

—¿S'ser mokië esepa ewëwamibö se' sulusipa tã? <sup>24</sup>Isalema s'ser mokië esepa tso' Sodoma döka dabom skeyök (50), etã íká e' wakpa ewëwamibö sërã? ¿Kè be' tö ilo'yepa ie'pa ki s'ser mokië tso' döka dabom skeyök (50), e'pa kuëki? <sup>25</sup>iMoki be' kè tö s'ser yësyësë esepa ewëpawa se' sulusipa tã ñita! Kè bö iwamlepa es. iE' kè wamblërpa! Be' dör sulitane shulökwak e' kuëki íwës e' kè tö se' shulepa yësyësë?

<sup>26</sup>Jehová tö iiüté:

—S'ser mokië esepa kuëyö döka dabom skeyök (50) e' tã e'pa dalërmik kè ye' tö imalepa ewëpawa.

<sup>27</sup>Etã Abraham tö iskà chéne ia:

—Be' dör Skököl. Tã ye' dör wës ká po ena muluchka es be' wöã. E' tö be' chakè tajë kè suane. Isalema

s'ser mokië esepa kianeia skel (5) as idökã dabom skeyök (50). <sup>28</sup>Skel e' kianeia, e' tã e'pa è kuëki íká e' wakpa ewëwamibö?

Jehová tö iiüté:

—S'ser mokië esepa kuëyö döka dabom tkëyök ki skel (45), e' tã kè ye' tö ká e' wakpa ewëpawa.

<sup>29</sup>Abraham tö iskà chaké:

—Dö' dabom tkëyök (40) è tso', e' tã íbe' tö ká e' wakpa ewëwami?

Jehová iiüté:

—Au, kè yö ká e' wakpa ewëpawa dabom tkëyök (40) e' dalërmik.

<sup>30</sup>Etã Abraham tö ikí ché ia:

—Tajë be' tsiriwëyö, e' kuëki kè be' ulunuk ye' ki. Dö' s'ser yësyësë tso'ia dabom mañayök (30) è.

Jehová tö iiüténe:

—Au, dabom mañayök (30), e'pa dalërmik kè yö iewëpawa.

<sup>31</sup>Abraham tö ikí chaké ème:

—A ye' Këköl, tajë yö be' dalösewëwã be' chakök i' es, erë ká ki s'ser mokië tso' dabom böyök (20) è, e' tã e'pa kuëki, íká e' wakpa ewëwamibö?

Jehová tö iiüté:

—Au, ie'pa dabom böyök (20), e' è dalërmik kè ye' tö ká e' wakpa ewëpawa.

<sup>32</sup>Abraham tö ikí chaké tã ichéi-tö ia:

—Kè be' ulunuk ye' ki. I' è chakekeyö be' a. S'ser mokië esepa tso' döka dabom eyök (10) è, e' tã íwës bö iwëmi? íká e' wakpa ewëwamibö?

Jehová tö iiüté:

—Dabom eyök è dalërmik kè ye' tö ká e' wakpa ewëpawa.

<sup>33</sup>Mik ie'pa tté ɔne ñita etá Jehová míane. Abraham biteane ie' u a.

**Skököl tō Sodoma ena  
Gomorra wakpa ewéwa**

**19** <sup>1</sup>Ká tuinemitke tá Skököl biyöchökwakpa bōl e'pa demi ká kiè Sodoma eɛ. Abraham alayök kiè Lot, e' tkēr ká e' kköiëulewá e' wékkō a. \* Mik ie' tō Skököl biyöchökwakpa sué, etá ie' e' kéká ie'pa shké'uk. Ie' e' téwá iski iwōtsá méwaitō íyök kī. <sup>2</sup>Ie' tō iché ie'pa a:  
—A kéképa, ye' kköchò a' a tō a' kapórō ye' ska'. Eɛ a' klò skuòmi etá bule bla'mi a' mi'mine.

Ie'pa iiuté:

—Au. Kè be' tkinuk. Sa' kapōmi u'rkī.

<sup>3</sup>Erè Lot kköché taië ie'pa a. Bata ekké tá ie'pa míyal ie' u a. Mik ie'pa dewá weshké, etá ie' tō ie'pa a chkè yulé buaë. Pan kè wōtuule iwölöwōka wa ese yuèitō ie'pa a. Ie'pa chké.

<sup>4</sup>Kam ie'pa kapòlur e' yōkī Sodoma wakpa wēpa debitu taië. E'pa tō

Lot u kköiëwá shkit. Ie'pa ulitane, duladulapa dò kéképaë, e'pa kulémi Lot wōá. <sup>5</sup>Ie'pa tō ichaké aneule:

—I'ñe wēpa bōl debitu be' u a ówé e'pa? Ie'pa yólur íe sa' a u'rkī as sa' serká ie'pa tá kèsik wa!


<sup>6</sup>Lot e' yéttsá ttök ie'pa tá. Ukkō wótéwaitō buaë itsikka. <sup>7</sup>Ie' tō ie'pa a iché:

—A yamipa, ye' kköchò a' a tō ì sulu e' kè wamblar ie'pa tá. <sup>8</sup>Ye' alà busipa tulur bōl kam ser wēpa tá, e'pa yekeluryò a' a as a' tō iwamblò ie'pa tá wes a' kī ikiane es. Erè kè ì wamblar sulu ye' pakök-wakpa dewá ye' ska', e'pa tá.

<sup>9</sup>Erè ie'pa iiuté:

—iBe' e' skóu bānet! Be' kè dör ká i' wak. Be' kè a ì yènuke sa' a. iE' kuékī be' we'ikeraë sa' tō ie'pa se tsatá!

E' ukuökī tá iwe'ikémi ie'pa tō tá idemirak u wékkō batsökök. <sup>10</sup>Etá Lot pakök-wakpa ulà tiéwá u'rkī ukkō a Lot tséwá weshké. Etá ie'pa tō ukkō wótéwá. <sup>11</sup>Pè' sulu-



*I' dör ká kköiëule ese wékkō. (Génesis 19.1)*

\* 19.1 ká e' kköiëulewá e' wékkō a: E' kéwō ská tá ká ulitane dör kköiëule ese ké wékkō tso'.



si kōs wōbla sulu'wélur ie'pa tö, kè wawēneia. Duladulapa dō kēkēpaē e'pa kōs wōbla sulurulune. E' kuēki ie'pa shtrinewā ukkō yulök. Kè ie'pa wā ikūne. <sup>12-13</sup>Lot pakōkwakpa tö iché ia:

—Tajē ká i' wakpa kkatēne e' tté demi Jehová wō kī. E' kuēki sa' patkéitō ie'pa eukwa. Ie'pa ewekewa sa' tö yēs. E' kuēki be' yamipa ekka kī tso' ká i' kī, e' tā e'pa yólur. Be' alà duladulapa tā' ö be' alà busipa tā' ö be' nuakipa tā', ö be' yamipa skà tso' ká i' kī, e' tā iyyólur bet tsúmi kamiē!

<sup>14</sup>Etā Lot mīā wēpa ttē meule senukwā ila'r busipa tā e'pa weblök tā iché iarak:

—iA' e' kōkā! iA' yúshka! Jehová tö ká i' ewekewa.

Erē ie'pa tö ibikeitsé tö ie' kalöke ie'pa tā. <sup>15</sup>Ká ñirketke, e' ulatök tā Skököl biyöchökwakpa tö iché Lot a:

—Sa' tö ká i' ewekewa. Kè be' duakwa, e' tā ibet, be' e' kōkā! iBe' alaköl ena be' ala'r busipa tsúmi!

<sup>16</sup>Erē ie' e' ukeia enaē. Erē Jehová er buaē ché ie' a, e' kuēki Skököl biyöchökwakpa tö iklö'wēwā iulà a yēttsa. E' sū ñies ilaköl ena ilà busipa yélur ie'pa tö Sodoma a itsatkoie. <sup>17</sup>Mik ie'pa tö iyēttsarak bānet etā Skököl biyöchökwakpa tö iché ie'pa a:

—iA' tunú as a' tsatkēr! iKè a' ká i' saukia tsikkane yēs! iE' sū kè a' e' wöklö'uk kakkue i' kī! iA' éna e' tsatkak, e' tā a' yúshka etkēme kabata a!

<sup>18</sup>Erē Lot tö iché ia:

—iA kēkēpa, au, a' we'ikèyö! <sup>19</sup>A' tö ye' kímé tajē. A' tö ye' tsatké duōwā ulà a, erē kè ye' shkak kabata a. Ye' ibikeitsè tö ì sulu datse ká i' eukwa, e' tö ye' kuēmi ñalā kī etā ye' duōwami. <sup>20</sup>Ká tsi-tsir tso' iē tsinet, eē ye' tkòshkarmi. Kawō mú ña shkowā eē e' tsatkoie. Mokī e' dör ká tsir.

<sup>21</sup>Etā ie'pa eköl tö iüté:

—Ye' be' ttò ttsé, e' kuēki yö iweke wes be' tö ye' a ikié es. Ká chébö ye' a e' kè eweku'wayö. <sup>22</sup>Erē be' yú etkēme eē. Kè ye' a ì wamblēnuk kam be' dōmi e' dalewa.

E' kuēki ká e' kiè Sóar.\*

<sup>23</sup>Mik ká ñine etā Lot demi Sóar. <sup>24</sup>Etā azufre wōñarke bö'ie e' patkébitū Jehová tö tajē Sodoma ena Gomorra kī. <sup>25</sup>Ká e' wakpa ewéwa bö' tö yēs. Nies dalikua kōs tskirke ká e' kī e' ñanewā sēraa. <sup>26</sup>Erē Lot alaköl dami itökī. E' tö ká sué itsikka. Bet ie' yönane dayē wōsiie shkē'ka.

<sup>27</sup>Bule es bla'mi tā Abraham mīane wé ikapaké Jehová tā eē. <sup>28</sup>Sodoma ena Gomorra kī suéitō tā ishklé batröke tajē wes tē blublu ña'wēsö es. <sup>29</sup>Es Skököl tö ká e' wakpa ewéwa. Erē ì ki' Abraham tö ie' a, e' ska' ie' er de, e' kuēki ie' tö Lot tsatkée.

**Lot alà busipa alà kēkē ie' tā**

<sup>30</sup>Sodoma ena Gomorra ewéwa Skököl tö, e' ukuökī tā Lot suane senukia Sóar. E' kuēki imīā senuk

\* 19.22 Sóar: Hebreoie ká kiè e' wà kiane chè ká tsir.

kabata a ila'r busipa bøl ta. Ee ie'pa mañal sené ákuk a.

<sup>31</sup>Ká et ta ilà busi kibi tò iché itsirla a:

—Se' yé kënewatke eta kè wé wëpa ta' senuk se' ta wes alakölpá malepa wëpa ta' es. <sup>32</sup>E' kuëki se' yé ttökasö blo' wa eta se' ser ie' ta, eta es se' ulà a alà dòmi.

<sup>33</sup>E' nañewe ta ie'pa tò iyé ttéka blo' wa tajë, eta ilà busi kibi ék sené ie' ta. Erë ie' tteke blo' tò tajë, e' kuëki kè ie' éna ì aneia. <sup>34</sup>Bule es ta ilà busi kibi tò iché itsirla a:

—Bö ittsó, ye' sené se' yé ta. I'ñe nañewe iskà ttökasö blo' wa. Eta be' senú ie' ta. Eta es se' bøl ulà a alà dòmi.

<sup>35</sup>E' nañewe ta ie'pa tò iyé skà ttéka blo' wa. Eta ilà busi tsirla sené ie' ta. Erë ie' tteke blo' tò tajë, e' kuëki kè ie' éna ì aneia. <sup>36</sup>Es ilà busipa bøl e' bukluwéka iyé wa. <sup>37</sup>Eta ikibi ék alà kune kiè mékaitö Moab. I'ñe ta Moab aleripa datse e' batamik. <sup>38</sup>Nies itsirla de alàë, kiè mékaitö Ben-amí. I'ñe ta amonwak datse e' batamik.

#### Abraham ena Abimélec

**20** <sup>1</sup>Abraham e' yéttsa Mamré a, mía tkörö ká kiè Néguéb ee. Eta ie' e' tséat senuk ká kiè Guerar ee. Guerar atë Cadés ena Sur e' shushaë. <sup>2</sup>Ie' tò ká e' wakpa a iché tò Sara dör ie' kutà. Ká e' blú kiè Abimélec, e' tò Sara tsuk patké alakölie e' a. <sup>3</sup>Erë nañewe ta ie' kapowa e' dalewa, Skëköl tté ie' ta kabsuè a ta iché ia:

—Alaköl tsuk patkébö e' wëm ta', e' kuëki be' duöwami.

<sup>4</sup>Erë kam ie' ser Abraham alaköl ta, e' kuëki ie' iüté:

—A këkëpa, ye' kè ki e' nuí ku' ÷wes e' ttëwamibö? <sup>5</sup>E'ma Abraham wák tò ye' a iché tò alaköl e' dör ie' kutà. Nies ilaköl tò ye' a iché tò Abraham dör ie' akë. E' kuëki ye' tò ì kos wé er bua' wa. Kè ye' wa iwamblëne er sulu wa.

<sup>6</sup>Skëköl tò iskà iüténe kabsuè a ta ichéitö ia:

—Ye' éna iane buaë tò be' tò iwé er bua' wa. E' kuëki kè ye' wa be' kàne ie' kökwa as be' kè tò ì sulu wamblò ye' ki. <sup>7</sup>Abraham dör ye' tteköl, e' kuëki bet be' yú ilaköl mukne ia. Ie' tò ye' a ikieraë as be' seria ttsë'ka. Erë be' kè dë'ne imukne, e' ta be' ena be' yamipa kos duöralur.

<sup>8</sup>Bule es bla'mi ta Abimélec shkëne ikanè mésopa kiéitö ta ì suéitö kabsuè a e' kos pakéitö ie'pa a. Mik e' ttsé ie'pa tò eta tajë ie'pa suanéka iyöki.

<sup>9</sup>Eta Abimélec tò Abraham kié ta iché ia:

—Ílók be' tò iwamblé sa' ta es? Be' kuëki Skëköl tò sa' pauñé ewëwa, erë Skëköl tò sa' pauñé es, eta ì sulu wambléyö be' ta? Íyi ese kè kawö ta' wamblënuke. <sup>10</sup>Be' tò ì sulu wamblé ye' ta, eta ì dör iwà?

<sup>11</sup>Abraham tò iüté:

—Ye' tò ibikeitsé tò ká i' ki kè yi tò Skëköl dalöieta'. Ye' suane dö' a' ye' ttëwa ye' alaköl yottsá ye' ulà a. <sup>12</sup>Erë iyëne tò ie' dör ye' kutà. Ie' yé dör ye' yé, erë ie' mì kè dör ye' mì. Nies ie' dör ye' tayë. <sup>13</sup>Mik Skëköl tò ye' a iyé' tò be' e' yótttsá be' yé ká a, eta yö iché ye' alaköl a: “Ká

wa'ñe wé se' demi, eta' ichó tö ye' dör be' akë.”

<sup>14</sup>Eta' Abimélec tö Sara méne iwëm Abraham a. Ñies iyiwak kakméitö Abraham a obeja ena baka. Ñies kanè mésopa kakméitö ie' a wëpa ena alakölpa. <sup>15</sup>Eta' ie' iché Abraham a:

—Ye' ká saú sërää wé wa be' wöbatse e' kî be' yú senuk.

<sup>16</sup>Eta' Sara a ichéitö:

—Ye' tö inuköl wömule' kakmé be' akë a dökä mil ekkë. E' dör ì sulu wambléyö be' ta' be' wakpa ulitane wöa e' patuoie. Es be' kè jaëneia.

<sup>17</sup>Eta' Abraham tö Skëköl a ikié tö Abimélec ena ilaköl duöke, e' bua'üne. Eta' Skëköl tö ie'pa bua'wéne. <sup>18</sup>Alakölpa kôs tso' Abimélec u a, e'pa shü mo'wä Jehová tö as kè idöiarak aläe Sara kuëki. Ie'pa kôs shü wötséene Jehová tö.

### Sara alà kéka Abraham a

**21** <sup>1</sup>Ï ye' Jehová tö Sara a tö be' alà köraka, e' wà tka wës iyëne bak es. <sup>2</sup>Eré Sara ena iwëm dör këkëpalatke, erë ie' duneka e' wà kune. Alà e' kune mik Skëköl tö ikéwö ye' ie' a eta'. <sup>3</sup>Sara alà kune wëm e' kiè méka Abraham tö Isaac. <sup>4</sup>Mik Isaac kî ká de päköl, eta' Abraham tö itóttola kkuölitla téé tsir wës Skëköl tö ie' a iyë' es. <sup>5</sup>E' kéwö ska' ta' Abraham kî duas tso' cien eyök (100). <sup>6</sup>Eta' Sara tö ibikeitsé: “Skëköl tö ye' jañawéka. Mik sulitane wä ijchenewa tö ye' de aläe eta' taië ie'pa jañumi ye' ta'. <sup>7</sup>Kam ye' alà kòka eta' kè yi a iyënu'k tö ye' dòmi aläe. Erë i' ta' ye' alà kéka Abraham a, ie' kënewatke eta'.”

### Agar ena Ismael uyéttsa bánet

<sup>8</sup>Eta' Abraham alà Isaac de bërie ta' itsu'batsée e' kéwö tk'wé Abraham tö taië. <sup>9</sup>Eta' Sara tö isué tö Abraham alà kune egiptowak kiè Agar e' ta' kiè Ismael, e' tö Isaac wayueke suluë. <sup>10</sup>E' kuëki Sara mía ichök Abraham a: “Ï kôs tso' be' wä mè se' alà Isaac a, e' kè kawö ta' blatè se' kanè méso e' alà a. E' kuëki iyuóshkar aläe.”

<sup>11</sup>Ismael dör Abraham alà ñies e' kuëki ì ché Sara tö e' tö ie' eriauwé taië. <sup>12</sup>Erë Skëköl tö iché ia: “Be' aleripa chökke e'pa döraë Isaac wa. E' kuëki kè be' tkinuk be' alà kibi ék kî ena imì kî. Ï kôs ché Sara tö e' ú. <sup>13</sup>Be' alà kune a' kanè méso ta, ñies e' aleripa alöwëraëyö taië, ie' dör be' alà e' kuëki.”

<sup>14</sup>Eta' bule es bla'mi ta' Abraham tö Agar a chkè mé. Ñies di' méitö ia iyiwak kkuölit yöule di' tsoie ese a. E' tiéka ie' tö sërää itsi kî ta' iyuéshkar ilà Ismael e' ta'. Agar mía shkëmi éanas wé kè yi serku' ese ska' ká kiè Beerseba e' éka. <sup>15</sup>Mik idi' enewa, eta' ilà tkéseritö kal dikia. <sup>16</sup>Ie' kè kî ilà kiane suë duökwa, e' kuëki imía e' tkéser kukuie. Mik ie' e' tkéser iski eta' ilà iémi.

<sup>17</sup>Ilà iuke e' ttsé Skëköl tö ta' bet Jehová biyöchökwak bua'ie e' tö Agar a ichaké ká ja' a: “¿A Agar wës be' de? Kè be' suanuk. Be' alà tkër iuk e' ttsé Skëköl tö. <sup>18</sup>Be' yú be' alà yulök. Ikóka ulà a kè arwa. Ye' tö ie' aleripa alöwëraë taië.”

<sup>19</sup>Eta' Skëköl tö Agar a di' tum kkaché et. Ie' mía di' e' tsuk,

iyiwak kkuölit a e' méitö Ismael a ye'. <sup>20</sup>Skököl tö Ismael kkö'né buaë. Ie' talane sené ká wé kī kè yi ku' kiè Parán eë. Ie' de sulëname buaë. <sup>21</sup>Ie' kibine ta imì tö iulabatséwa alaköl dör egiptowak ese ta.

**Abraham ena Abimélec  
tö kawö mé ñi a**

<sup>22</sup>E' kéwö ska' ta blu' kiè Abimélec míā ttök Abraham ta. Ie' ñippökwakpa wökir, kiè Ficol, e' mí ie' wapie. Eta Abimélec tö iché Abraham a:

—Sa' wa ijcher tö Skököl be' kimeke taië ì kos wëkebö e' wa. <sup>23</sup>E' kuëki be' ttè mú ye' a ië Skököl wö wa tö be' kè tö ì sulu wamblepa ye' kī ñies ye' ala'r kī ena ye' aleripa kos e'pa kī. Be' ttè mú ye' a tö be' er bua' chöraë ye' a wes ye' er buaë ché be' a es. Ñies be' ttè mú ye' a tö be' er buaë chöraë ká i' wé be' serke e' wakpa a.

<sup>24</sup>Abraham tö iiuté:

—Tó. Es ye' ttè mé be' a.

<sup>25</sup>Erë Abimélec wakpa tö di' tum biule yë'ttsa et Abraham wakpa ulà a. E' chaké Abraham tö ie' a. <sup>26</sup>Ie' tö iiuté:

—Erpa be' ye' tkiwéwa ttè e' wa. Kè bö ichópa ye' a, e'ma kè ye' wa ijcher. Brör zyì tö e' wamblé be' kī?

<sup>27</sup>Abraham tö baka ena obeja kakmé Abimélec a eta ie'pa böi kawö mé ñi a. <sup>28</sup>E' ukuöki ta Abraham tö iobeja alakipa pupula e' dapa'wé döka kuktö ek tsiní. <sup>29</sup>Mik e' sué Abimélec tö eta ie' tö Abraham a ichaké:

—¿Ì kuëki be' iyiwak kuktö dapa'wé ek tsiní?

<sup>30</sup>Abraham tö iiuté:

—Iyiwak kuktö, e' meke ye' tö be' a iwà kkachoie tö mokī ye' tö di' tum e' bi'.

<sup>31</sup>Ie'pa böi kawö mé ñi a eë e' kuëki ká e' kinewa Beerseba.\*

<sup>32</sup>Ie'pa kawö mé ñi a, e' ukuöki ta Abimélec ena Ficol e'pa biteyal filisteowak ká a. <sup>33</sup>Eta Abraham tö kal kuá kiè tamarisco ese kuatké elka Beerseba. Eë ie' tö Jehová dör Skököl yöbië e' dalöié. <sup>34</sup>Eë ie' sené ká taië filisteowak ká a.

**Skököl tö Abraham ma'wé ilà wa**

**22** <sup>1</sup>E' ukuöki ta Skököl tö Abraham ma'wé tö mokī ie' tö idalöieta'. Ie' chakéitö:

—A Abraham.

Abraham tö iiuté:

—¿Ì?

<sup>2</sup>Eta Skököl tö iché ia:

—Be' alà eköl è kiè Isaac e' dalër be' éna taië, e' tsúmi Moria. Mik be' demi eë, eta ye' tö be' a kabata kkacheke, e' kī be' alà ttówa ta iña'úwa ye' a ye' dalöioie.

<sup>3</sup>Bule es bla'mi ta Abraham e' kéka ta burro payuéitö. Bö' jchéitö tsèmi. Eta ie' míā wé Skököl tö ie' a iyë' eë ilà ena ikanè mésopa böi e'pa ta. <sup>4</sup>E' böiki es ta Abraham tö ká yëne ie' a e' kī sué kamië. <sup>5</sup>Eta ie' tö iché ikanè mésopa a:

—Ië a' e' tsúat burro i' ta. Ye' ena ye' alà, sa' micho kabata jai a Skököl dalöiök, e' wa sa' döne.

\* 21.31 Beerseba: Hebreoie ká kiè e' wà kiane ché ttè mène ñi a e' di' tum biule ö Obeja kuktö e' di' tum biule.

<sup>6</sup>Etā Abraham wā bö' mí e' ppékaitō Isaac kuli' kī. Tabela ena bö'ka bö' batsoie e' mí Abraham wā. Etā imíyal ñita. <sup>7</sup>Etā Isaac tō iché iyé a:

—A, yéwö.

Abraham tō iiüté:

—A alà, ìi kiane be' kī?

Isaac tō iché ia:

—A Yéwö, bö' tso' se' wā, ñies bö'ka, eré ówé obeja pupula tteke-wā Skéköl a e'?

<sup>8</sup>Iyé tō iiüté:

—A alà, Skéköl wák tō e' meraë se' a.

Ie'pa mir ñita. <sup>9</sup>Mik ie'pa demi wé Skéköl tō iyé' Abraham a ee, etā Abraham tō ák kataté et ka'ie. E' ukuökī tā ibö' dapa'wéka ka' e' kī tā ilà klö'wéwaitō payuéwā mékaitō bö' bata kī. <sup>10-11</sup>Ie' tabela klö'wéwa ilà ttowā ña'wé Jehovah a. E' wöshā tā Jehovah biyöchökwak bua'ie e' tō Abraham chaké siwā' kī:

—iA Abraham, a Abraham!

Ie' tō iiüté bet:

—ìi?


<sup>12</sup>Jehová biyöchökwak bua'ie e' tō iché ia:

—iBe' alà kè shka'war, kè ittar-wā! Be' wák alà eköl ème e' kè kkeone be' wā ye' yöki. E' wa ye' wā ijcher tō mokī be' tō ye' dalöieta' taië.

<sup>13</sup>E' wöshā Abraham tō isué tō obeja wé'ñe e' malítséwā idula' a kal tsitsir chale a. Ie' tō iyiwak e' klö'wéwā jché ña'wéwa ilà skéie Jehovah dalöioie. <sup>14</sup>Ie' tō ká e' kié méka i' es: “Ì kiane se' kī e' mera Jehovah tō.” E' kuëki i'ñe tā se' tō ichekeia: “Ì kiane se' kī, e' merdaë se' a Jehovah kébata a.”

<sup>15-16</sup>Jehová biyöchökwak bua'ie e' tō Abraham skà kié ká jai a tā ichéitō ia:

—Jehová tō iché: ‘Buaë be' tō ye' dalöieke, be' alà eköl è, e' métt sabö ye' a. <sup>17</sup>E' kuëki ye' er buaë chöraë be' a taië. Be' aleripa alöweraëyö taië wes bëkwö tso' taië ká jai a es, wes tsa'wö tso' taië dayë kkömik es. Ñies ie'pa e'



*I' dör obeja wé'ñe malítséwā idula' a. (Génesis 22.13)*

alörakā ibolökpa kī kekraë. <sup>18</sup>Be' tō ye' ttò dalöié, e' kuëkī be' aleripa batamik ye' er buaë chōraë ká ulitane wakpa a.'

<sup>19</sup>Eta Abraham biteane wé ikanè mésopa atéat ee ta imíyal seraa ñita dōmine Beerseba wé ie' serke ee.

### Nahor ala'r

<sup>20-23</sup>E' ukuökī ta biyò debitu Abraham kī tō ie' èl kiè Nahor, e' alaköl kiè Milcá, e' ala'r de pāköl (8). E' alà ko'k kiè Uz. Imalepa kiè dör Buz, Quemuel, e' dör Aram yé, Quésed, Hazó, Pildás, Ildaf ena Betuel e' dör Rebeca yé.

<sup>24</sup>Nahor alaköl skà tso' kiè Reumá, e' ta ie' ala'r kēka tkël. E'pa kiè dör Teba, Gáham, Tahas, ena Maacá.

### Sara blēnewa

**23** <sup>1</sup>Mik Sara kī duas tso' cien eyök kī dabom böyök kī kul (127), <sup>2</sup>eta ie' blēnewa ká kiè Quiriat-arbá ate Canaán ee. Ñies ká e' kiè Hebrón. Abraham schōne e' iëitséitō siarè. <sup>3</sup>Ie' tkër idëütō nu o'mik e' e' kēka ta imía ttök hititawakpa ta, ta ichéitō ie'pa a:

<sup>4</sup>—Eré ye' dör ká kuakī wak serke a' shua e' è, eré ká wataú ña pōie ye' dëütō blowa.

<sup>5</sup>Ie'pa tō iiuté:

<sup>6</sup>—A kēkēpa, be' we'ikè sa' tō, sa' ttò ttsó. Sa' a ta be' dör kēkēpa tajë e' serke sa' shua. E' kuëkī be' dëütō nu bló sa' pō bua'ie ese a. Sa' ulitane kè tō ichepa be' a tō kè iblar sa' pō a.

<sup>7</sup>Ie' e' duéka ie'pa wörkī ta ie' e' tkéwa kuchë kī ie'pa dalöiök <sup>8</sup>ta ichéitō ie'pa a:

—Mokī a' kī ikiane tō ye' dëütō nu blëwayö ië a' ká a, e' ta wëm kiè Efrón dör Sóhar alà, e' a ichó <sup>9</sup>tō ákuk tso' ie' ká kkò a kiè Macpelá e' wataútsa ye' a ye' yamipa pōie. Ye' tō ipatuëmi ie' a kos ituè ekkë. Es ákuk e' atë ye' ulà a a' shua.

<sup>10</sup>Eta Efrón dör hititawak e' tkër-ñak ie'pa shua, e' tō Abraham iuté darërè as iyamipa ena kos daparke ká e' wékkö a e'pa tō ittò ttsò. Ie' tō iché Abraham a:

<sup>11</sup>—A kēkēpa, kè ye' tō ákuk watuepa be' a. Ká e' ñies ákuk tso' ia, e' kakmekeyö be' a é. Ye' yamipa kos tso' ië e'pa tō ye' ttò ttsé tō ká e' kakméyö be' a. Be' dëütō nu bló ee.

<sup>12</sup>Eré Abraham e' tkéwane kuchë kī ká e' wakpa wörkī <sup>13</sup>ta ichéitō ie' a sulitane wörkī:

—Ye' ttò ttsó. Be' pablèyö tō ká e' ské klö'ú ye' ulà a. E' ukuökī ye' dëütō nu blekewayö.

<sup>14</sup>Ie' tō iiuté:

<sup>15</sup>—A kēkēpa, ye' ttò ttsó. Ká e' ské dör inuköl wömule dōka cien tkéyök (400), eré inuköl ekkë è, kè e' kī se' tkinuk. Be' dëütō nu bló ee.

<sup>16</sup>Eta kos ie' tō ká ské ché imalepa wörkī e' mène buaë Abraham a, ekkë patuéttsaitö. \* <sup>17-18</sup>Es Efrón ká tso' Macpelá ate Mamré diwö tskirke e' ëka e' de Abraham ulà a iákuk ta ena kal tso' kos ikī e' ta. Hititawak ena sulitane dami ká e' wékkö a e'pa kos dör ká tone e' ttekölpa.

<sup>19</sup>E' ukuökī ta, Abraham tō idëütō nu bléwa ákuk tuéitō

\* 23.16 Es ie'pa wöblar iyi watauk ñi a. Eré Efrón tō iché tō ká e' kakméitō Abraham a eré e' kè yëne. Ñies e' ane Abraham éna, e' kuëkī ie' tō Efrón patué bèrè kos Efrón ie' a iché ekkë.

Macpelá ee. Ká e' atē Mamré atē Canaán e' o'mik tsinet (Mamré kiè ñies Hebrón). <sup>20</sup>Ká e' watuéttsa ie' a hititawak tō. Es ká e' ena ákuk e' de Abraham ulà a iyamipa pöie.

**Abraham tō alaköl  
yulök patké Isaac a**

**24** <sup>1</sup>Abraham dewa kékēpalaie. Ie' a Jehová er buaë ché iyi ulitane wa. <sup>2</sup>Ká et ta ie' tō ikanè méso kibi kié. E' dör ie' iyi kos e' kueblu. Ie' tō iché ia:

—Be' ulà múwa ye' tu' dikia iwà kkachoie tō mokī i kiekeyö be' a e' waweraëbö. <sup>3</sup>Jehová dör ká jai ena ká i' e' Kéköl e' wörki be' ttè mú ye' a mokië tō ye' alà kè kar senukwa Canaán ie se' serke e' alékölpa ta. <sup>4</sup>Be' yú ká wé ye' manét ee, etā ee alaköl yuló eköl ye' yamipa shua senukwa ye' alà ta.

<sup>5</sup>Ie' tō iiuté:

—Dö' alaköl kè bitu ye' ta, e' ta ¿wes ye' iwèmi? ¿Buaë idir be' a tō be' alà mi' ye' wa dò wé be' manét ee?

<sup>6</sup>Ie' iiuté:

—iAu, kè ye' alà tsarmi ee! <sup>7</sup>Jehová dör ká jai Kéköl, e' tō ye' yé'ttsa ye' yé u a ena ye' yamipa ká a. Ie' tō ittè me' ye' a tō ká i' meraëitö ye' aleripa a. Ie' tō ibiyöchökwak patkeraë be' kimuk alaköl tsukbitu ye' yàkie. <sup>8</sup>Alaköl kè shkak be' ta, e' ta kè be' tkinuk. Kè be' kàne iskà yulök. Erè kè ye' alà tsarmi ee.

<sup>9</sup>Etā ikanè méso ulà méwa ie' tu' dikia ta ittè mé ia tō iweraë wes iuk patkéitö es. <sup>10</sup>E' ukuökī ta ie' tō iwökir iyi kos bua'buā, ese shtë

tsèmi kakmè. Ekkè kos payuëitö iyiwak kiè kameio e' ki doka dabop. Etā ie' mia iyiwak wëttsë tkörö Nahor atē Mesopotamia ee. <sup>11</sup>Mik ie' demi tsinet Nahor, etā ká tuirketke. Diwö ekkè ta ká e' alékölpa mi'ke di' tsuk. E' wösha ta ie' de di' tum biule e' kkömik ta ikameio kèitö e' tulöksër enuk ee. <sup>12</sup>Etā ie' tō iché Skéköl a: “A Jehová, be' dör ye' wökir Abraham e' Kéköl. Ye' kimú i'ñe ñies er buaë chó ye' wökir a. <sup>13</sup>Ie di' tum biule o'mik ye' e' tsukeat bërber è ká i' busipa tso' di' tsuk e' dalewa. <sup>14</sup>Kawö mú ña tō wéne ék a ye' iché: ‘Be' kakö' ówa ye' a di' kakmú yè', as e' tō ye' iütö: ‘Be' di' yó ñies be' kameio a ikakmekeyö.’ Es ye' éna iane tō e' ék shushtë be' tō Isaac a alakölie. Es ye' wa ijchermi tō be' er bua ché ye' wökir a.”

<sup>15</sup>Etā kam i chekeitö e' or, etā ie' isué alaköl datse eköl kakö' bune kuli' ki di' tsoie. E' dör Rebeca, ie' dör wëm kiè Betuel e' alà busi. Betuel mi dör Milcá ena iyé dör Nahor. Nahor dör Abraham ël. <sup>16</sup>Rebeca dör busi buaala kam iser wëm ta. Ie' mia döttsa di' tum biule e' a ikakö' wà iök. <sup>17</sup>Mik imítke etā Abraham kanè méso tunemi itökī ta iché ia:

—Be' we'ikèyö, di' dami be' wa e' kakmú ña yè.

<sup>18</sup>Ie' tō iiuté,

—A kékēpa, be' di' yó.

E' bet ie' kakö' éwa klö'wéwa ulà a ta di' méitö ia yè. <sup>19</sup>Mik ie' di'yé one ta Rebeca tō iché ia:

—Ye' mí di' tsuk ñies mè be' kameio a.



*I' dör di' tum biule ese. (Génesis 24.11)*

<sup>20</sup>Bet ikakö' wà ka'wéitö wé  
iyiwak di'yöke e' a' tã imí di' kí tsuk  
iyiwak a. Es iwéitö kameio ulitane  
a. <sup>21</sup>E' dalewa Abraham kanè méso  
tso' isaúk bèrè, wà dör tö ie' kí ikia-  
ne jchenowã yësyësë tö Jehová tö  
ie' kímé ì dalërmik ie' shkò e' wa  
as idöttsã buaë ö au. <sup>22</sup>Mik kameio  
di'yé one, etã ie' tö ula'tsio sù es dör  
gramo teröl ese tkéwã busi yik a.  
Ñies ulαιο méitö böt, e' es dör cien  
gramos tsatã. <sup>23</sup>Etã ie' tö iché ia:

—Be' we'ikèyö, ichö ña ¿Yi alà  
busi be' dör? ¿Ye' chömi ì'ñe nañe-  
we be' yé u a' kapökrö ye' kanè  
mésopa tã?

<sup>24</sup>Ie' iiüté:

—Ye' dör Betuel alà busi, e' dör  
Milcá ena Nahor alà wëm. <sup>25</sup>Sa' u  
a' a' chömi. Ñies a' kameio a' chke  
tso'.

<sup>26</sup>Etã Abraham kanè méso e'  
tkéwã kuchë kí Jehová dalöiök  
<sup>27</sup>tã ichéitö: “Jehová dör ye' wökir  
Abraham e' Këköl. E' kikökka ye'  
tso'. Këkraë ie' tö ye' wökir Abra-  
ham kimeke buaë. Këkraë ie' er  
buaë chöke ye' wökir a. Ie' wã ye'  
debitu buaë ñalã kí dò ìe ye' wökir  
yamipa u a. E' kueki ikikèkayö.”

<sup>28</sup>Rebeca tunemi shkalalã imì  
u a' ì kos tka ie' tã e' pakök. <sup>29-30</sup>Ie'



akë kiè Labán, e' tò ula'tsio sué ena ulaio sué ikutà ulà a. Ñies ì ché Abraham kanè méso tò e' tté ttséitö. E' kuëki ie' bitea ññaletsuk di' tum biule a. Ie' de Abraham kanè méso ska' e' tso'ia ikameio ta di' tum biule ska'. <sup>31</sup> Etá Labán tò iché ia:

—Jehová tso' be' ta buaë.

¡Mishka ye' ska'! ¿Wes be' e' tsukeat u'rki? Ye' u kanewétke be' a ñies kameio a.

<sup>32</sup> Es Abraham kanè méso bitea ie' ta. Eë ie' tò dali tso' kameio ki e' éwa ta itiéitö. E' ukuökí ta ie' wa di' debitü Abraham kanè méso a ena iwapiepa a klò skuoie.

<sup>33</sup> Mik ie'pa tò itié, etá Abraham kanè méso tò iché:

—Kè ye' chkòpa kam ye' tò iók ye' debitü e' wà pakò a' a etá.

Labán tò iiuté:

—E'ma ichó. ¿Ì dör iwà?

<sup>34</sup> Ie' tò iché:

—Ye' dör Abraham kanè méso.

<sup>35</sup> Jehová tò ikimé taië. Ie' tò iblu'wé taië. Obeja, baka, orochka, inukölchka, kanè mésopa wëpa ena alakölpa, kameio ena burro, e' kos méitö ia taië. <sup>36</sup> Ñies ilaköl Sara e' tò alà mé ia eköl wák wëm ikënewatke etá. Ì kos tso' ye' wökir wa e' méitö ilà a. <sup>37</sup> Ie' tò ye' ké tté muk ie' a. Ye' a ichéitö: 'Ye' alà kè kar senukwá Canaán wé ye' serke e' alékölpa ta. <sup>38</sup> Be' yú wé ye' yépa tso' eë ta alaköl yuló eköl ye' yàkie ye' ditséwö shüa.' <sup>39</sup> Ye' tò iiuté: 'A ye' wökir Abraham, ¿dö' alaköl kè bitü ye' ta?' <sup>40</sup> Ie' tò ye' iuté: 'Këkraë ye' serke buaë Jehová wöa, e' kuëki ie' tò ibiyöchökwak patke-

raë be' ta as be' kawö tkò buaë ññala ki, ñies as alaköl kübö ye' yàkie ye' yamipa ye' yé wa e'pa shüa. <sup>41</sup> Erë ye' yamipa kè éna ilà busi patkak be' ta, e' ta kè be' tkinuk. Kè ì tté ta'ia be' ki.'

<sup>42-44</sup> "E' kuëki ye' debitü i'ñe di' tum biule ska'. Eë ye' tò ikié Jehová dör ye' wökir Abraham e' Këköl e' a: 'tò mokí be' ye' kimeke alaköl yulök ye' wökir Abraham yàkie, e' ta as e' bitü ye' ska' íe di' tum biule ska'. Mik ye' tò ie' a di' kak kié, etá as imütö ye' a ena ichòitö: Ñies ye' tò be' kameio a ikakmeke. Es ye' isuëmi tò alaköl e' shushtë be' tò ye' wökir yàkie.' <sup>45</sup> Mik e' chekeyö e' erketke, etá ye' isué tò Rebeca datse ikakö' bune ikuli' ki. <sup>46</sup> Mik ie' di' yinetke etá ye' tò ie' a iché: 'Be' we'ikèyö, di' dami be' wa e' kakmú ña yè.' E' bet ikakö' éwaitö ta ichéitö: 'Be' di' yó. Ñies imekeyö be' kameio a.' Ie' ye' a di' mé ñies ye' kameio a. <sup>47</sup> E' ukuökí ta ye' tò ie' a ichaké: '¿Yi alà busi be' dör?' Ie' iiuté: 'Ye' dör Betuel alà busi e' dör Nahor ena Milcá alà.' Etá ula'tsio sù e' tkéwayö iyik a ena ulaio tkéwayö böt iulà a. <sup>48</sup> E' ukuökí ta ye' e' tkéwa kuchë ki ta Jehová dalöiéyö. Ie' dör ye' wökir Abraham e' Këköl e' kikékayö. Ie' wa ye' debitü buaë yësyësë busi shukititö ye' wökir yamipa shüa ilà a e' ska'. <sup>49</sup> Es ¿a' er buaë chöke ye' wökir a? ¿A' e' chöke ikimuk er bua' wa? Ichó ña i' ta yësyësë ima a' tò ichè, es ye' éna iarmi tò ì wëmüyö."

<sup>50</sup> Etá Labán ena Betuel e'pa tò iiuté:

—E'ma i' kōs debitu Jehová ttō wa. E' kuēki kē wēs sa' a ì onuk. Kē sa' a ì yēnuk yēs. <sup>51</sup>I' Rebeca. Itsūmi be' wōkir a senukwa ilà ta wēs Jehová ki ikiane es.

<sup>52</sup>Mik Abraham kanè méso tō ttē e' ttsé, etā ie' e' tkéwa kuchē ki iwōtsa méwa íyōk ki Jehová dalöiök. <sup>53</sup>E' ukuōki ta ie' tō íyi yöule orochka wa ena inukölchka wa ñies datsi' bua'buā e' taiē yélur méitō Rebeca a. Ñies ie' tō ikakmé Rebeca akē a ena imì a. <sup>54</sup>E' ukuōki ta ie' ena iwapiepa chké di'yé ta ikapere eē. Bule es ta iti'nerak ta Abraham kanè méso tō iché:

—Ye' míane ye' wōkir ska'.

<sup>55</sup>Erē Rebeca akē ena imì e'pa tō iché ia:

—Rebeca kē tsarmi bet. Kawō mú ie' a as ie' e' tsūat sa' ta ká dabop, e' wa wē' be' wa imi'mi.

<sup>56</sup>Erē ie' tō iché ie'pa a:

—Kē ye' wōklö'ukia a' tō. Jehová tō ye' kimé as ì kōs dōttsa buā ye' a. E' kuēki ye' ómi ye' wōkir u a.

<sup>57</sup>Ie'pa tō iiuté:

—Sa' mí Rebeca kiök chakē çima ichèmiitō?

<sup>58</sup>Etā Rebeca kiérakitō ta ichaké-rakitō ia:

—A Rebeca çbe' shkak wēm i' ta? Ie' tō iiuté:

—Tó.

<sup>59</sup>Es ie'pa tō Rebeca ena alaköl tso' ie' kkö'nuk kekraē e'pa a kawō mé as imi'rak. Ñies Abraham kanè méso ena iwapiepa kōs e'pa a kawō mérakitō as imi'rak. <sup>60</sup>Ie'pa mitke ta Rebeca yamipa er buā ché ie' a ttē i' wa:

“A sa' yami,

As be' alör taiē shüteē.

As be' aleripa e' alōka ibolökpa kōs ki.”

<sup>61</sup>Etā Rebeca ena ikanè mésopa e' tuléka ie'pa kameio ki ta imíyal Abraham kanè méso itōki.

<sup>62</sup>E' kēwō ska' ta Isaac serke Négueb wé di' tum biule tso' kiē “Skököl tso' e' tō ye' sueke” eē, e' dene iyé ska'. <sup>63</sup>Tsáli ta Isaac e' yétsa shkök kabikeitsörami. E' wōshā ta ie' isué tō kameio datse tseē. <sup>64</sup>E' wōshā Rebeca tō ie' sué ñies ta ie' e' éwa kameio ki. <sup>65</sup>Rebeca tō ichaké Abraham kanè méso a:

—çWēm doā wì se' kke, e' dör yi? Ie' iiuté:

—E' dör ye' wōkir Isaac.

Etā Rebeca wō pabakéwa datsi'tak wa.

<sup>66</sup>Abraham kanè méso tō ì kōs tka ie' ta e' paké Isaac a. <sup>67</sup>E' ukuōki ta Rebeca mítser Isaac wa imì Sara blēnewā e' u a. Es Isaac senéwa ie' ta. Isaac éna Rebeca dalēr taiē, es ie' er pabléne imì blēnewā e' kuēki.

### Abraham ena Queturá e'pa aleripa

**25** <sup>1</sup>Abraham alaköl ské tséwa kiē Queturá. <sup>2</sup>Ie' ala'r kéka Abraham ta wēpa dōka teröl. E'pa kiē dör Zimrán, Jocsán, Medán, Madián, Isbac ena Súah. <sup>3</sup>Jocsán dör Sebá ena Dedán, e'pa yé. Dedán aleripa e' ditséwō dōka mañal kiē asurwak, letuswak ena leumwak. <sup>4</sup>Madián ala'r wēpa kiē Efá, Éfer, Hanoc, Abidá ena Eldaá. E'pa kōs dör Queturá aleripa.

<sup>5-6</sup>Ì kòs tso' Abraham wà e' atè Isaac ulà a. Erè kàm Abraham duòwà, e' yòkì ie' tò íyi kakmé ilakölpa malepa ala'r a. Ie'pa patkémiiitò senuk ká bánet atè diwö tskirke e' èkà kamië as kè iku'rak Isaac ska' tsinet.

### Abraham blènewà

<sup>7</sup>Abraham sene' duas cien eyök kí dabom kulyök kí skel (175) sèraa <sup>8</sup>età iblènewà buaë ikènewatke kè weine siarè. Es ie' michoë idèütöpa itökì. <sup>9-10</sup>Ila'r Isaac ena Ismael e'pa tò inú blé ilaköl Sara pö e' o'mik ákuk kiè Macpelá eë. Ákuk e' atè Mamré diwö tskirke e' wa. Ká e' bak hititawak kiè Efrón dör Sóhar alà e' ulà a. Ká e' wato'ttsa hititawak tò Abraham a. <sup>11</sup>Abraham blènewà, e' ukuökì tã Skèköl er buaë ché Isaac a. Ie' e' tséat senuk tsinet di' tum biule kiè “Skèköl tso', e' ye' sueke” eë.

### Ismael ala'r

<sup>12</sup>Ismael dör Abraham alà Agar tã. Agar dör Abraham alaköl Sara, e' kanè méso e' dör egiptowak. Ikkè dör Ismael ala'r e'pa kiè <sup>13</sup>wes ikunerak es: Nebaiot, e' dör ilà tsá. E' itökì Quedar, Adbeel, Mibsam, <sup>14</sup>Mismá, Dumá, Masá, <sup>15</sup>Hadar, Temá, Jetur, Nafis ena ibata kiè Quedmá. <sup>16</sup>E'pa kòs dör Ismael ala'r dökà dabom eyök kí böl (12). Ie'pa ká kiérak iwákpa kiè wa. Ie'pa kòs dör iwakpa ká wókirpa.

<sup>17</sup>Ismael kí duas de cien eyök kí dabom mañayök kí kul (137) tã

iblènewà. Es ie' michoë idèütöpa itökì. <sup>18</sup>Ie' aleripa mía senuk Havilá ena Sur e' shushà. Ká e' atè Egipto wöshaë Asiria ñalé kke. Ie'pa serke eë bánet Abraham aleripa malepa yökì.

### Jacob ena Esaú kune

<sup>19</sup>Ttè i' dör Isaac dör Abraham alà, e' pakè. <sup>20</sup>Isaac kí duas de dabom tkéyök (40) tã isenéwà Rebeca tã. Rebeca dör Betuel e' alà busi ena Labán kutà. Ie'pa dör arameowak serke ká kiè Padán-aram eë. <sup>21</sup>Rebeca kè dò alàë. E' kuëkì Isaac tò Jehová a ikié as Rebeca dò alàë. Jehová tò ittò ttsé tã Rebeca dunekà e' wakpa dör klò. <sup>22</sup>Erè klöpa ñippöke taië ie' shuà. E' kuëkì ie' ibikeitsé: “Ye' weirke i' es, e'ma çiók ye' sermiia?” E' kuëkì ie' mía iwà chakök Jehová a. <sup>23</sup>E' tò ie' a iché:

“Be' shuà ala'r tso' böl.  
Mik ie'pa de këchke, etã ikibi ék doraë itsirla kanè mésoie.  
Ie'pa aleripa doraë ká böt ñi bolökpa ese wakpa.  
Itsirla aleripa doraë diché kibiie ikibi aleripa tsatã.  
E' kuëkì ie'pa ñippémitke kàm ikur e' yökì.”

<sup>24</sup>Rebeca kéwö de, etã klöpa kune wèpa. <sup>25</sup>Ikéwe ék kune e' tsà dör mashmash ipàkö shamamaë. Ie' kiè mékãitö Esaú.\* <sup>26</sup>Alà tsá kune e' klöulewà iël tsirla wà iklò kaniñak a iulà et wa. E' kuëkì ikiè mékãitö

\* 25.25 *Esaú*: Esaú kiè ñies Seír. Hebreoie Seír wà kiane chè pakò. Génesis 36.8 saú.

Jacob.\* Mik Rebeca klöpa kune eta Isaac ki duas tso' dabom teryök (60).

Iyé wa ì tso' mekeat Esau a  
e' kèwö watuéttsaitö

<sup>27</sup>Klöpa kibinetke. Esau dör yëria poë. Ie' wöbatsö sulu yëble wa. Erë iël Jacob, e' kè dör es. Ie' serke bèrë. Ie' wöbatsö senuk u a è. <sup>28</sup>Iyiwak kañiru tteke Esau tö e' chkà wa Isaac wöbatsö suluë. E' kuëki Isaac ki Esau kiar kibiie Jacob tsata. Erë Rebeca ki Jacob kiar kibiie Esau tsata.

<sup>29</sup>Ká et ta Jacob tso' ulök. E' dalewa Esau debitü shtrinewa tajë datse kañika. <sup>30</sup>Ie' iché Jacob a:

—Be' we'ikèyö, ì alé be' tö mat se kakmú ye' a në. Sulu ye' dué bli wa. E' kuëki Esau kiè Edom\* ñies.

<sup>31</sup>Jacob tö iiuté:

—Keweie ì mekeat se' yé tö be' a be' dör ilà kibi e' kuëki, e' kèwö múttsa ye' a chkò i' skéie.

<sup>32</sup>Esau tö iché:

—Ye' tteke bli tö dö' e' tö ye' ttèwa, e' ta ì mekeat se' yé tö ye' a ìie bua' e' dör ye' a?

<sup>33</sup>Jacob tö ikí ché ia:

—I' ta be' ttè mú ye' a tö mokí be' tö ye' a imeke.

Eta Esau tö ittè mé Jacob a yësyësë Skëköl wöa. Es ì mekeat iyé tö ie' a, e' kèwö métttsaitö Jacob a. <sup>34</sup>Jacob tö chkò mé ia pan ta. Mik Esau chké one di' yé one, ta ie' e' kéka ta imía. Ie' dör ilà kibi e' ulà a íyi bua' kèwö tso', e' kè ki ie' tkine yës.

Isaac mía Guerar

**26** <sup>1</sup>E' kèwö ska' ta ketba ane tajë ká e' kos ki wes ibak Abraham kèwö ska' ta es. E' kuëki Isaac mía Guerar wé filisteowak blú serke kiè Abimélec ee. <sup>2</sup>Ee Jehovah e' kkaché ie' a ta ichéitö ia: “Kè be' minuk Egipto. Be' e' tsúat wé ye' be' a iché ee. <sup>3</sup>Be' senúia ká i' ki. Ye' tso' be' ta. Ye' er buaë chöraë be' a. Ká i' kos meraëyö be' a ñies be' aleripa a. Es ye' ttè muke be' a wes kewe ime'yö be' yé Abraham a es. <sup>4</sup>Be' aleripa alöweraëyö tajë wes bëkwö tso' tajë es. Ká i' kos merayö be' aleripa a. Ñies ie'pa batamik ye' er buaë chöraë ká ulitane wakpa a. <sup>5</sup>Abraham tö ye' ttè kos e' iuté' buaë. Ttè mé ye' tö ie' a e' kos blé' buaë ie' tö e' kuëki ye' tö ttè buaë e' meke be' a ñies.”

<sup>6</sup>Isaac e' tséat senuk Guerar. <sup>7</sup>Ká e' wakpa tö Isaac a ichaké: “¿Rebeca dör be' yaie?” Erë ie' suane ichök: “Ie' dör ye' alaköl.” E' kuëki ie' iché: “Ie' dör ye' kutà.” Ie' tö ibikeitsé tö ká e' wëpa tö ie' ttèwami ilaköl buaala kuëki.

<sup>8</sup>Isaac ki ká de tajë ee. Ká et ta, ká e' blú kiè Abimélec, e' tö isuë ukkö tsitsir a tö Isaac tso' ilaköl Rebeca peñuk. <sup>9</sup>Bet itsuk patkémii-tö ta ichéitö ia:

—¿Mokí tö alaköl se' dör be' alaköl? ¿Ì kuëki be' tö iyé' kuaë tö ie' dör be' kutà?

Isaac tö iiuté:

—Ye' ibikeitsé tö isalema a' ye' ttèwami ie' kuëki.

\* 25.26 Jacob: Hebreoie s'kiè e' wà kiane chè s'klö kaniñak.

\* 25.30 Edom: Hebreoie s'kiè e' wà kiane chè mat.

<sup>10</sup>Erë Abimélec tö iché ia:

—¿I kuęki i' wamblébö sa' ta?

Tsir etā wēm wele senéwā ie' ta, e' ta iekkë ta be' tö sa' ké ì sulu wamblök Skëköl wöa.

<sup>11</sup>Abimélec tö iché sulitane a:

—A' isie tö Isaac tsiriwé ö ilaköl tsiriwé, e' ta e' tterawā.

<sup>12</sup>Duas e' wa Isaac tö dalì kua-tké, wà wöne buaë, Jehovah er buaë ché ie' a e' kuęki. <sup>13</sup>Ie' de íyi blú taië. Taië íyi tso' ie' wā. <sup>14</sup>Ie' wā obeja ena baka tso' taië. Ñies kanè mésopa tso' taië ie' wā. E' kuęki filisteowak er ttsë'r suluë ie' kī. <sup>15</sup>E' kuęki ie'pa tö di' tum bi' iyé Abraham e' kanè mésopa tö, e' kōs wötéwā íyök wa. <sup>16</sup>Bata ekkë ta Abimélec tö iché Isaac a:

—Be' yöne íyi blu' taië sa' tsata, e' kuęki ibe' yúshka!

<sup>17</sup>Etā Isaac míā senuk Guerar kakkue kī. <sup>18</sup>Ee di' tum bi' iyé tö, e' wöté'wā filisteowak tö iyé blënewā ukuökī ta, e' kōs biéneitö ta ikië mékaitö wes iyé tö ime'ká es. <sup>19</sup>Ká et ta ie' kanè mésopa tso' di' tum biök ká e' kī, etā ie'pa tö di' tum a di' tuökekā taië ese kué et. <sup>20</sup>Erë ká e' obeja kkö'nukwakpa debitu ñippök Isaac obeja kkö'nukwakpa ta. Ie'pa tö iché tö di' tum e' dör ie'pa icha. E' kuęki Isaac tö di' tum biule e' kië méká “Ñippök.” <sup>21</sup>E' ukuökī ta Isaac kanè mésopa di' tum skā bié et, e' kī iskà ñippé-rak. E' kuęki di' tum biule e' kië mékaitö “Se' ñi bolök.”

<sup>22</sup>Ie' míā kāmíë ká e' kī, ee di' tum skā biéitö et. E' kè kī ñni bunerak. Ie' iché: “I'ñe ta Jehovah tö ká bua' mé se' a wë' ta se' serdaë

buaë.” E' kuęki ká e' kië mékaitö “Ká tso' taië se' a.”

<sup>23</sup>E' ukuökī ta ie' míā Beerseba. <sup>24</sup>E' nañewe Jehovah de ie' ska' ta ichéitö ia:

“Ye' dör be' yé Abraham e' Këköl.

Ye' tso' be' ta, e' kuęki kè be' suanuk.

Abraham dör ye' kanè méso e' dalërmik ye' er buaë chöraë be' a, ñies be' aleripa alöweraëyö taië.”

<sup>25</sup>Ee Isaac tö ák kataté et ka'ie iyiwak jchoie Jehovah dalöioie. Ee ie' sené ta ikanè mésopa tö di' tum bié et ee.

#### Isaac ena Abimélec kawö mé ñi a

<sup>26</sup>Ká et ta, Abimélec datse Guerar debitu ttök Isaac ta. Iyamipa debitu böl ie' ta. Eköl kië Ahuzat. Iëköl kië Ficol. E' dör Abimélec ñippökwakpa wökir. <sup>27</sup>Isaac tö iché ia:

—A' éna ye' ar suluë. A' ye' yö'shkar a' ká kī. Etā ¿iök a' do ye' ska'?

<sup>28</sup>Ie'pa tö iiüté:

—Sa' isuë tö Jehovah tso' be' ta. E' kuęki sa' bitea be' a ichök tö kawö mùwasö ñita. <sup>29</sup>Sa' kè wā be' tsirioule ì wa. Këkraë sa' tö be' kímé. Mik be' manetwā, etā sa' kè wā ì tté ku' a' kī. I'ñe ta iwënewā tö be' a Jehovah er buaë chöke taië. E' kuęki be' ttè mú sa' a tö be' kè tö ì sulu wamblepa sa' kī.

<sup>30</sup>Etä Isaac tö kawö buaë tkö'wé ie'pa ta, chkè wa di'yè wa. <sup>31</sup>Bule es bla'mi ta ie'pa tö ikawö mé ñi a tö kè ñippöiarak. E' ukuöki ta ie'pa e' chéat ñi a er bua' wa.

<sup>32</sup>E' diwö shà ta Isaac kanè mésopa tso' di' biök, e'pa wa ibiyö de tö sa' di' kué. <sup>33</sup>Ie' tö di' e' kiè méka Sebá. \* E' kueki i'ñe ta ká e' kièia Beerseba.

<sup>34</sup>Mik Esau kî duas de dabom tkëyök (40), etä ie' senéwa alakölpa böl ta. Eköl kiè Judit e' yé kiè Beerí, e' dör hititawak. Iëköl kiè Basemat e' yé kiè Elón, e' dör hititawak ñies. <sup>35</sup>Alakölpa böl e'pa tö Isaac ena Rebeca eriawéka tsiriwéka taië.

**Isaac er buaë ché  
Jacob ena Esau a**

**27** <sup>1</sup>Isaac dewa kékëpalatke. Ie' kè wöbla wawëria. Ká et ta ilà kibi Esau e' kiéitö ta ichéitö ia:

—iA alà!

Esau tö iiuté:

—A yéwö, ìi?

<sup>2</sup>Etä Isaac iché ia:

—Be' tö isué tö ye' kënewatke dö' wekkè alè ta ye' duöwa. <sup>3</sup>E' kueki ye' kî ikiane tö be' kuaböt klö'ú ta be' yú ye' a yëblök. <sup>4</sup>Etä iwakaneú ña buaë wes ye' wöbatsö iwa es, ta itsúbitu ña katè. E' wa ye' er buaë chöke be' a kam ye' duöwa e' yöki.

<sup>5</sup>Erë Isaac ttöke Esau ta e' ttsé Rebeca tö. E' kueki mik Esau mia yëblök kañika <sup>6</sup>etä bet ie' tö iché Jacob a:

—A alà, ye' ttö ttsó. Ye' tö be' yé ttsé ttök be' èl Esau ta, ta iché ia:

<sup>7</sup>“Be' yú yëblök, e' wakaneú ña buaë ta itsúbitu ña katè. E' ukuöki ta ye' tö be' a iyi kos bua' e' kéwö mekeyö be' a Jehová wörki kam ye' duöwa e' yöki.” <sup>8</sup>E' kueki ye' ttö ttsó buaë. <sup>9</sup>Be' yú chibo pupula bua' bua' ese tsúbitu ña bötö ta ikanewekeyö buaë wes be' yé wöbatsö iwa es. <sup>10</sup>E' ukuöki ta be' tö chkè tsúmi be' yé a as iñuitö. Es iyi kos e' kéwö atmi be' a be' èl skéie.

<sup>11</sup>Erë Jacob tö iché imi a:

—Ye' èl pa shamamaë. Ye' kè dör es. <sup>12</sup>Ye' yé tö ye' këmi, e' ta ittsewami tö ye' idir, etä ie' ichémi tö ye' tso' ie' dalöseukwa. Ie' kè er buaë chepa ye' a. E' skéie ie' er sulu chöraë ye' kî.

<sup>13</sup>Erë imi tö iiuté:

—A alà, as ie' er sulu chö ye' kî. Ye' ttö iütó. Be' yú chibola chéyo be' a e' tsuk.

<sup>14</sup>Etä Jacob mia chibola tsuk e' debitu iwa imi a. E' kanewé imi tö buaë wes Isaac wöbatsö iwa es. <sup>15</sup>Ilà kibi Esau datsi' tso' blëule u a e' bua' bua' yéttsa iékaitö ilà tsirla kî. <sup>16</sup>E' ukuöki ta chibola kkuölit wa Jacob ulà ena ikuli' patréwaitö. <sup>17</sup>Chkò bua' ena pan yuétkeitö, e' méitö Jacob a tsèmi iyé a.

<sup>18</sup>Jacob dewa iyé ska' ta ichéitö ia:

—A yéwö.

Isaac tö iiuté:

—A alà, ìbe' dör ye' alà wéne ék?

<sup>19</sup>Ie' iiuté:

\* 26.33 Sebá: Hebreoie di' biule kiè e' wà kiane ché ttè mène ñi a.

—Ye' dör Esaú, be' alà kibi ék. Ì chébö ña, e' kanewétkeyö. Be' e' tkóser iyiwak ttéyö e' katök. E' ukuökì tã be' íyi buaë e' kéwö mekebö ye' a, e' mú ye' a.

<sup>20</sup>Erë Isaac tö ichaké ia:

—A alà, ¿wes be' ulà de iyiwak e' ska' bet?

Ie' iiuté:

—Jehová dör be' Kèköl e' tö ye' kímé e' wa ikuéwayö bet.

<sup>21</sup>Isaac tö iché ia:

—Be' e' skówa ye' o'mik pattseyö tö mokjë be' dör ye' alà Esaú.

<sup>22</sup>Ie' e' skéwa iyé o'mik as ipattsöitö. Isaac tö iché:

—Be' ttò e' dör Jacob ttò. Erë be' ulà e' dör Esaú ulà.

<sup>23</sup>Jacob ulà kò shamamaë wes iël kibi ulà es, e' kuëkì Isaac kè éna iane buaë tö e' dör Jacob. Mik ie' er buaë chöketke ilà a, <sup>24</sup>etã iskà chakéneitö:

—¿Mokì be' dör ye' alà Esaú?

Ie' iiuté:

—Tó, ye' dör Esaú.

<sup>25</sup>Iyé tö iché ia:

—A alà, iyiwak ttébö kanewébö e' mú ña katè as ye' er buaë chò be' a.

Ie' tö iyé tié ñies vino mé ia yè. Isaac chké, vino yé. <sup>26</sup>E' ukuökì tã ichéitö ia:

—A alà, be' e' skówa ye' o'mik ye' wöalattsó.

<sup>27</sup>Mik Jacob e' skéwa iyé wöalattsök, etã iyé tö idatsi' alattsé tã ier buaë ché ilà a ttè ikké wa:

“Tó, ipaalar wes ye' alà paalar es.

Ie' paalar buaë wes kañikã kkö'nè Jehová tö e' alar è.

<sup>28</sup>As Skèköl tö be' a mò wöli mè kekraë be' dalikua kì.

As ie' tö be' dalikua kos e' wöü buaë

as be' wa trigowö ta' taië ena vino tã' taië.

<sup>29</sup>Kã kua'kì wakpa taië as e' dò be' kanè mésopaie.

As ie'pa e' tulòwarak kuchë kì be' wörkì be' dalöiök.

As be' mú dò be' èlpa wökirie.

As ie'pa e' tulòwa kuchë kì be' wörkì be' dalöiök.

Wépa er sulu ché be' kì, esepa kì Skèköl er sulu ské chöraë.

Ñies wépa er buaë ché be' a, esepa a Skèköl er buaë ské chöraë.”

<sup>30</sup>Isaac er buaë chétke Jacob a tã Jacob míatke. E' bet tã Esaú tso' yèblök e' dene. <sup>31</sup>Ñies ie' tö chkè alé buaë, e' mí iwã iyé a tã ichéitö ia:

—A yéwö, dúla ttéyö e' alí kató. E' ukuökì tã be' er buaë chöke ye' a e' chó ña.

<sup>32</sup>Isaac tö ichaké:

—¿Yi dör be'?

Ilà tö iiuté:

—Ye' dör Esaú be' alà kibi.

<sup>33</sup>Isaac tkinewa painéka taië tã ichéitö:

—E'ma ¿yi dare yèblök, e' wa chkè debitü ña? E' katéwayö seraa kam be' dò e' yökì. E' a ye' er buaë chétke. Es ie' a ye' er buaë ché e' atetke.

<sup>34</sup>Mik Esaú tö ì ché iyé tö e' ttsé, etã ie' erianekã anekã taië tã ichéitö:

—iA yéwö, ye' a er buaë chó ñies!

<sup>35</sup>Erë Isaac tö iüté:

—Be' ël datke ye' kītō'uk e' a ye' er buaë chétke be' skéie.

<sup>36</sup>Esaú tö iüté:

—Wëe' ie' kiè Jacob. I' tã bötöki-cha iwambléitö ye' tã i' es. Be' íyi kéwö mekebö ye' a ye' dör be' alà kibi e' kuëki, e' kéwö yé'ttsã ye' ulà a ie' tö kuaë. I'ñe tã be' er buaë chöke ye' a e' yé'ttsaitö ye' yöki. ¿Warma be' er buaë chöke ye' a e' kè tã'ia?

<sup>37</sup>Isaac tö iüté:

—Ittsó. Ye' tö ie' mékatke be' wökirie. Ye' tö be' aleripa kos e' métke ie' kanè mésopaie. Ñies ye' tö ichétke as chkewö ena vino dò ie' ulà a taië. A alà, çì memiia ye' tö be' a i' tã?

<sup>38</sup>Erë Esaú tö ikí ché iyé a:

—A yéwö çbe' er buaë chöke sa' a e' dör etkè? ¡Ye' a er buaë chó ñies! Etã Esaú iéka taië.

<sup>39</sup>Isaac tö iché ia:

“Be' serdaë wé mò wöli kè tã taië ese ska'.

Eë be' dalikua kè wörpa buaë.

<sup>40</sup>Be' ñippöraë tabè wa o'ka tã íiyi kuëki, e' mik be' serdaë.

Be' döraë be' ël kanè mésoie.

Erë mik be' ñippémi ie' tã,

etã be' e' yörattsa ie' ulà a.”

### Jacob tkashkar Esaú yöki

<sup>41</sup>Isaac er buaë ché Jacob a Esaú skéie. E' kuëki Esaú éna suluë Jacob arke. Ie' ibikeitsé: “Ye' yé duökewatke. Mik iduowa e' kéwö tka, etã ye' ël tterawayö.”

<sup>42</sup>Mik Rebeca wã ijchenewa tö Esaú tö iël bikeitsé ttèwã, etã Jacob tsuk patkéitö tã iché ia:

—A alà, ittsó. Be' ël Esaú e' pablöke tö ie' be' tterawa. <sup>43</sup>E' kuëki ye' ttò ttsó. Be' tkóshkar bet ye' akè kiè Labán serke Harán e' u a. <sup>44-45</sup>Be' e' tsúat ie' ska' ká taië dò mik be' ël er buanene be' ki ena i sulu wamblébö e' chowane ie' éna etã. E' ukuöki tã ye' tö be' tsuk patkeraë, e' wa be' döne. ¡Ye' kè ki ikiane tö ye' ala'r bül e' duòwã diwö etkè a!

<sup>46</sup>E' ukuöki tã Rebeca tö iché Isaac a:

—Esaú alakölpa dör hititawak e'pa tö ye' shtriwétke taië. Jacob senéwã alaköl ese tã, e' tã ye' mú duòwã.

**28** <sup>1</sup>Etã Isaac tö Jacob kié tã ishke'wéitö tã ichéitö ia:

—Kè be' senukwã canaánwak tã. <sup>2</sup>Be' yú be' duöchke kiè Betuel serke Padán-aram e' ska'. Eë be' senúwã be' nau Labán alà busipa e' eköl tã. <sup>3</sup>Skököl Diché Tã' Íyi Uli-tane Tsatã as e' er buaë chò be' a. Ñies as ie' tö be' aleripa alöü taië ká wa'ñe. <sup>4</sup>Ie' tö iyè'atbak Abraham a tö ká i' meraëitö ie' a. E' ki se' serke shkal. As ie' er buaë chò be' a ena be' aleripa a wes ie' er buaë yé' Abraham a es as ká i' dò a' ulà a.

<sup>5</sup>Es Isaac tö Jacob patkémi Padán-aram. Jacob demi inau Labán ska'. Labán dör arameowak kiè Betuel, e' alà. Ie' dör Rebeca akè. Rebeca dör Jacob ena Esaú e'pa mì.

### Esaú senéwã Mahalat tã

<sup>6</sup>Esaú wã ijchenewa tö Isaac er buaë ché Jacob a ñies tö ipatkémii-tö ká kiè Padán-aram senukwã eë.



Ñies ie' wā ijchenewā tō mik iyé er  
bua' ché Jacob a etā ichéitō iā:

—Kè be' senukwā canaánwak tā.

<sup>7</sup>Ñies ie' wā ijchenewā tō Jacob  
mía ká kiè Padán-aram wes iyé  
ena imì tō iché iā es. <sup>8</sup>Es ie' éna  
iāne tō iyé kè kī ikiane tō ie'pa  
serwā canaánwakpa tā. <sup>9</sup>E' kuēki  
ie' mía alaköl skà yulök Ismael dör  
Abraham alà e' ska'. Eē ie' senéwā  
Ismael alà busi kiè Mahalat e' tā,  
e' dör Nebaiot kutà. Es alaköl kī  
tséwāitō eköl e' kè dör canaánwak  
wes imalepa es.

### Jacob kabsué Betel

<sup>10</sup>Etā Jacob e' yéttsā Beerse-  
ba michoë Harán. <sup>11</sup>Ie' michoë  
wé katuine ikī tā eē ikapere. Ák  
méwāitō wōkir kataie, e' kī ie'  
kapöwā. <sup>12</sup>Eē ie' kabsué. Ie' isué tō  
klökata batsië tkër iski ibata dōka  
ká jai a. E' kī ie' isué tō Skëköl  
biyöchökwakpa shkōke wō'k wa'k.  
<sup>13</sup>Ñies ie' isué tō Jehová dur ie'  
ō'mik tā ichéitō iā: “Ye' dör Jeho-  
vá. Ye' dör be' talà, Abraham, ena  
be' yé, Isaac, e'pa Këköl. Ká i' wé  
be' tēr, e' meraëyö be' a ena be'  
aleripa a. <sup>14</sup>Ie'pa alördaë taië wes  
ká po es. Ie'pa michoë senuk ká  
wa'ñe. Ye' er buaë chōraë ká ulita-  
ne wakpa a be' ena be' aleripa e'pa  
batamik. <sup>15</sup>Ye' tso' be' tā. Ye' tō be'  
kkö'neraë ká wa'ñe wé be' mir eē.  
Be' dörane ye' wā ká i' kī. Kè yö  
be' we'ikepa. Ttè kōs méyö be' a, e'  
waweraëyö es.”

<sup>16</sup>Mik Jacob tī'neka, etā ie' ibi-  
keitsé: “Mokī Jehová tso' ká i' kī, e'

kè jcher ye' wā.” <sup>17</sup>Taië ie' suane tā  
ibikeitséitō: “Ká i' dör batse'r taië.  
iīe dör Skëköl wé! iīe dör ká jai  
wékkö!”

<sup>18</sup>Bule es tā Jacob e' kékā bla'mi.  
Ák méwāitō iwōkir kataie, e'  
kékāitō duékaatitō iwà kkachoie tō  
ká e' dör batse'r. Kiò téitō ák bata  
kī iwà kkachoie tō ká e' tso' Skëköl  
dalöioie. <sup>19</sup>Ká e' kiè mane'wéttsane  
ie' tō Betel\* Kewe tā ká e' kiè Luz.

<sup>20</sup>Eē ie' tō ittè mé Jehová a i'  
es: “Be' tso' ye' tā ena ye' kkö'né  
be' tō i' ye' mir etā, ena be' tō chkè  
ena datsi' mé ye' a, <sup>21</sup>ñies ye' dene  
buaë ye' yé ska', e' kōs wébö ye'  
a, e' tā be' klö'weraëyö ye' Këkö-  
lie. <sup>22</sup>Ák duékayö i', e' dör iwà  
kkachoie tō iē be' dalöiërdaë. A  
Skëköl, i kōs mekebö ye' a, e' mú  
blatèsö dōka dabop tā e' tsá eyök  
meraneyö be' a.”

### Jacob demi Labán ska'

**29** <sup>1</sup>E' ukuökī tā, Jacob  
mía pē' serke diwö tskir-  
ke e' ëka. <sup>2</sup>Eē ie' tō di' tum biule  
sué et kañikā. E' pamik obeja  
daparke mañayök enuk eē di' e'  
yekerakitō e' kuēki. Di' tum biule  
kkò kī ákkue bërie me'r et. <sup>3</sup>Iyiwak  
kkö'nukwakpa wöblanewatke tō  
as iyiwak ulitane daparka eē, e'  
ukuökī tā ákkue skeuke di' tum  
biule kkò kī as iyiwak di'yò. Iyiwak  
di'yane one tā ie'pa tō ikkò pabaké-  
wane ákkue wa. <sup>4</sup>Jacob tō iyiwak  
kkö'nukwakpa a ichaké:

—A yamipa, çká wé wakpa a'  
dör?

\* 28.19 *Betel*: Hebreoie kiè e' wà kiane chè *Skëköl wé*.

Ie'pa tö iiüté:

—Sa' dör Harán wakpa.

<sup>5</sup>Ie' tö iskà chakéne:

—¿A' wā wēm kiè Labán dör Nahor alà, e' suule?

Ie'pa tö iiüté:

—Tó, e' suule sa' wā.

<sup>6</sup>Ie' tö ichaké:

—¿Is ie' tso'?

Ie'pa tö iiüté:

—Ie' tso' bua'. Isaú. Wì busi datse e' dör ie' alà kiè Raquel e'. Ie' datse iyé iyiwak wëttsé.

<sup>7</sup>Ie' tö iché:

—Ká tso'ia ñiwe. Diwö tso'ia kakkéë iyiwak dapa'wowa ek tsiní. Ì kuëki a' kè tö di' mè ia tã ièmiračkök.

<sup>8</sup>Erë ie'pa tö iiüté:

—Kè sa' a e' wamblënuκ. Sa' kawöta ipanuk. Mik obeja de seraa, eta sa' tö di' tum kkò ppekeka tã di' meke sa' tö iyiwak a.

<sup>9</sup>Ie' ttöke ie'pa tã, e' dalewa Raquel debitü iyé iyiwak wëttsé, ie' dör iyé iyiwak kkö'nukwak e' kuëki. <sup>10</sup>Jacob tö Raquel sué inau iyiwak wëttsé, e' bet ie' tunemi di' kkò kéka tã iyiwak a di' méitö. <sup>11</sup>E' ukuökü tã Raquel shke'wéitö wöalatséitö tã ie' iékaie ttsé'ne buaë kuëki. <sup>12</sup>Ie' tö iché ia: “Ye' dör Rebeca alà ena Labán nauyö.” E' bet tã Raquel tunemi ichök iyé a.

<sup>13</sup>Mik Labán tö inauyök tté ttsé, eta bet itunemi inaletsuk. Ipaklö'wéwaitö tã iwöalatséitö tã imítser iwā iu a. Ì kos tka Jacob tã e' pakéitö inau a. <sup>14-17</sup>Tã Labán

tö iché ia: “Mokië be' dör ye' yami ekka.”

**Jacob senéwā Lía ena Raquel tã**

Labán alà busi böł, ikibi ék kiè Lía, itsirla ék kiè Raquel. Lía wöbla e' kè dör buaala\* erë Raquel dör buaala wa'ñe.

Jacob sené Labán ska' dò si' et. E' ukuökü tã Labán tö iché ia:

—Be' dör ye' yami, erë be' kè kawöta kanëblök ye' a éme. Ichö ña ¿kos be' tö ye' ña'wëmi?

<sup>18</sup>Jacob wöbatse Raquel wa, e' kuëki ie' tö Labán iüté:

—Be' tö kawö mé ye' a senukwā Raquel tã, e' tã e' skéie ye' kanëblöke be' a döka duas kul.

<sup>19</sup>Labán tö iiüté:

—Ye' a tã e' dör buaë. Be' je' a ye' tö imëmi buaë. Ye' kè éna imak o'ka a. Be' e' tsúat ye' ska'.

<sup>20</sup>Es Jacob kanëblë' döka duas kul Raquel dalërmik. Erë ie' kï Raquel kiane taië, e' kuëki kawö ekkë e' ttséitö ká bërber è. <sup>21</sup>Mik duas kul tka, eta Jacob tö iché Labán a:

—Kawö yè'yö be' a, e' detke. Kawö mú ye' a senukwā be' alà busi Raquel tã.

<sup>22</sup>Etã Labán tö sulitane a ishkeñé tö a' shkó ulabatsè e' kéwö tkö'uk. <sup>23</sup>Erë katuine, e' shuā Lía mí ie' wā Jacob a Raquel skéie tã Jacob kapé ie' tã. <sup>24</sup>Labán tö ikanè méso eka kiè Zilpá, e' me'tke Lía a ikanè mésoie. <sup>25</sup>Bule es bla'mi tã Jacob tö isuéwā tö e' dör Lía. Ie' mía Labán ska' tã ichéitö ia:

\* 29.14-17 Lía wöbla e' kè dör buaala: Hebreoie tté e' wà kè jcher se' wā bua'iewā. Isalema e' wà kiane chë Lía wöbla dör buaala.

—¿Ì wamblé be' tò ye' ta? Ye' kanéblé be' a Raquel dalèrmik. ¿Iók be' tò ye' kītō'wé es?

<sup>26</sup>Labán tò iiüté:

—Íe sa' wöblar tò alà busi kibi ese serkewā kewēie, e' itōkī itsir-la ék. <sup>27</sup>Se' kawōta Lía ulabatsōke e' kéwō tkō'uk dōkā ká kul. Mik kéwō e' tka, etā ye' tò be' a Raquel meke ñies. Erē be' kawōta skā kanéblökne ye' a duas kul Raquel dalèrmik.

<sup>28</sup>E' dör buaē Jacob a. Mik Lía ulabatsè kéwō e' diwō tka, etā Labán tò Raquel mé Jacob a alakölie ñies. <sup>29</sup>Ñies ie' tò ikanè méso eka kiè Bilhá e' mé Raquel a ikanè mésoie. <sup>30</sup>Es Jacob senéwā Raquel ta ñies. Eré ie' kawōta kanéblökne skā Labán a dōkā duas kul, erē ie' éna idalēr kibiie Lía tsata.

#### Jacob ala'r

<sup>31</sup>Jehová tò isué tò Jacob kè kī Lía kiane bua'ie. E' kuēkī Lía a alà méitō. Erē Raquel kè dōta' alàè.

<sup>32</sup>Lía dunekā alà kune ta ie' tò iché: “Ye' eriarke taiē e' sué Jehová tò, e' kuēkī i'ñe ta ye' dalërdaē ye' wēm éna.” E' kuēkī ikiè mékaitō Rubén.\*

<sup>33</sup>E' ukuökī ta ie' alà skā kune eköl ta ichéitō: “Ye' wēm kè tkine ye' kī e' sué Jehová tò e' kuēkī alà skā méitō ye' a.” E' kuēkī ikiè mékaitō Simeón.\*

<sup>34</sup>Ie' alà skā kéka ta ichéitō: “Ire' ye' ala'r deka mañal e' kuēkī ye' wēm éna ye' dalèrmi kibiie.” E' kuēkī ikiè mékaitō Leví.\*

<sup>35</sup>E' ukuökī ta ie' alà skā kéka ta ichéitō: “I'ñe ta ye' tò Jehová kīkekeka.” E' kuēkī ikiè mékaitō Judá.\* Etā ekkē è ie' alà dē'.

#### Raquel ala'r

**30** <sup>1</sup>Mik Raquel tò isué tò ie' kè dò alàè, etā ie' sibineka iël kī. Ie' tò iché iwēm a:

—Be' kè tò ye' a alà mè, e' ta ye' duōrawā.

<sup>2</sup>Jacob uluneka ie' kī ta ichéitō ia: —Ye' dör Skököl kalī, e'ma ye' a alà mermi be' a. Ie' wák tò be' méat kè dò alàè.

<sup>3</sup>Ie' tò iiüté:

—Ittsó, ye' kanè méso kiè Bilhá, e' ta be' senú. Mik ie' alà kéka etā e' dör wes ye' alà es. Es ye' dōraē alàè ie' batamik.

<sup>4</sup>Es ie' tò ikanè méso Bilhá e' mé iwēm a alakölie, e' ta Jacob sené.

<sup>5</sup>Ie' ta Jacob alà kéka. <sup>6</sup>Raquel tò iché: “Skököl tò ye' tsatké buaē. Ie' tò ye' ttō ttsé ta alà méitō ye' a wēm.” E' kuēkī ie' tò ikiè méka Dan.\*

<sup>7</sup>E' ukuökī ta Bilhá alà skā kune Jacob ta. <sup>8</sup>Raquel tò iché: “Ye' ñippé taiē ye' èl ta etā ye' e' aléka iki.” E' kuēkī ikiè mékaitō Neftalí.\*

\* 29.32 *Rubén*: Hebreoie s'kiè e' wà kiane chè ye' eriane e' suéitō.

\* 29.33 *Simeón*: Hebreoie s'kiè e' wà kiane chè ittsök.

\* 29.34 *Leví*: Hebreoie s'kiè e' wà kiane chè ñita.

\* 29.35 *Judá*: Hebreoie s'kiè e' wà kiane chè Skököl kīkèkasö.

\* 30.6 *Dan*: Hebreoie s'kiè e' wà kiane chè Skököl tò s'tsatké buaē.

\* 30.8 *Neftalí*: Hebreoie s'kiè e' wà kiane chè ñippök.

<sup>9</sup>Mik Lía tö isué tö ie' kè dè'ia alàè, età ie' tö ikanè méso kiè Zilpá, e' mé Jacob a alakölie. <sup>10</sup>Zilpá alà kéká Jacob tá. <sup>11</sup>Lía tö iché: “iEdaa ì mène ye' a!” E' kuëki ilà kiè mékaitö Gad.\*

<sup>12</sup>E' ukuöki tá Zilpá alà skà kéká Jacob tá. <sup>13</sup>Lía tö iché: “iYe' ttsè'r buaè! Ire' alakölpa qos tö icheraè tö be' ttsè'r buaè.” E' kuëki ilà kiè mékaitö Aser.\*

<sup>14</sup>Trigo wö alirke e' késka' tá Rubén mía kañika. Eë ie' tö kalwö kiè mandrágora\* e' alí kué. E' bite iwá imì Lía a. Mik Raquel tö kalwö e' sué tá ichéitö Lía a:

—Be' we'ikèyö, kalwö debitü be' alà wá be' a, e' kakmú ña.

<sup>15</sup>Lía tö iiuté:

—¿Be' kè a wè' idir tö be' wá ye' wëm mítser? iKíie tá be' éna kalwö debitü ye' alà wá ye' a, e' yaktsá ye' ulà a!

Erë Raquel tö iché ia:

—Kalwö e' skéie i'ñe nañewe ye' wëm patkekeyö be' tá kapök.

<sup>16</sup>Katuirketke tá Jacob tso' kaneblök e' debitü tá Lía mía iñaletsuk tá ichéitö ia:

—Ye' tö ye' alà mandrágora e' mé Raquel a, e' skéie be' kawöta kapök ye' tá i'ñe nañewe.

E' nañewe Jacob kapé ie' tá. <sup>17</sup>Etá Skéköl tö Lía ttò ttsé tá iduneka tá

ilà skà kune Jacob tá. Es ie' alà deka skel. <sup>18</sup>Lía tö iché: “Ye' tö ye' kanè méso mé ye' wëm a e' skéie Skéköl ye' a alà i' mé.” E' kuëki ilà kiè mékaitö Isacar.\*

<sup>19</sup>E' ukuöki tá Lía alà skà kéká Jacob tá, e' tá ideka teröl. <sup>20</sup>Ie' iché: “Skéköl tö ye' a ì buaè kakmé. Ire' ye' ala'r de teröl. E' kuëki ye' wëm éna ye' dalërdaè jaishet.” E' kuëki ilà kiè mékaitö Zabulón.\*

<sup>21</sup>Bata ekké tá ie' alà skà kune alaköl. E' kiè mékaitö Dina. <sup>22</sup>Erë ñies Raquel kímé Skéköl tö. Ie' tö ala'r mé ia wes Raquel tö ikié ia es. <sup>23</sup>Ie' duneka tá ilà tsá kune kiè mékaitö José. Ie' tö iché: “Ye' jaène' siarè e' yéttsá Skéköl tö ye' ki.

<sup>24</sup>Jehová mú tö ye' a alà kí mè ia eköl.” E' kuëki ikiè mékaitö José.\*

### Jacob iyiwak alöne taië

<sup>25</sup>José kune e' ukuöki tá Jacob tö iché Labán a:

—Ye' ómine ye' kaska'. <sup>26</sup>Ye' alakölpa ena ye' ala'r e'pa mú ye' a as imi'rak ye' tá. Ye' kaneblétke be' a ie'pa skéie. Be' wá ijcher buaè tö qos ye' kaneblé be' a.

<sup>27</sup>Erë Labán tö iiuté:

—Be' we'ikèyö. Be' e' tsúatia senuk ye' ska!. Ye' tö itötké tö Jehová er buaè ché ye' a be' batamik. <sup>28</sup>Ichó ña qos be' ki inuköl kiane

\* 30.11 Gad: Hebreoie s'kiè e' wà kiane ché *kawö buaè mène*.

\* 30.13 Aser: Hebreoie s'kiè e' wà kiane ché *ittsè'r buaè*.

\* 30.14 *mandrágora*: Ká e' kèwöska tá ie'pa tö ibikeitseke tö mandrágora wö katé alakölpa tö, e' tá e' tö ie'pa kímèmi dök alàè.

\* 30.18 Isacar: Hebreoie s'kiè e' wà kiane ché *ské*.

\* 30.20 Zabulón: Hebreoie s'kiè e' wà kiane ché *kakmeule*.

\* 30.24 José: Hebreoie s'kiè e' wà kiane ché *ilè kímú*.

be' kanè skéie, e'ma ekkë ye' be' patuèmi.

<sup>29</sup>Ie' tò iiüté:

—Be' wà ijcher tò ye' kanéblé buaë be' a. Nies ye' tò be' iyiwak kkö'né buaë be' a. <sup>30</sup>Mik ye' dë'bitu be' ska', età be' kè wà ì ku' taië. I'ñe tà be' wà iyi tso' taië. Jehová er buaë ché be' a ye' kuëki. Erë ðmik ye' kanéblömi ye' wák a? Ye' wöché yamipaë.

<sup>31</sup>Labán tò iskà ché ia:

—¿Kos be' ki ikiane tò be' patuèyö?

Ie' tò iiüté:

—Be' kè tò ye' patauk. Erë ì chekeyö be' a e' iütó, e' tà ye' tò be' iyiwak kkö'nemi. <sup>32</sup>I'ñe ye' mi'ke be' iyiwak shushtök. Obeja kos dalolo ena chibo kos wöaule shkitshkit ö ulaula ese klö'wekeyö ye' wák a e' patuoie. <sup>33</sup>Mik be' de ye' iyiwak sauk tà ee be' isuèmi tò obeja dalolo ö chibo wöaule shkitshkit ö ulaula ese è tso', e' tà be' wà ijcherwami tò ye' dör wëm yësyësë. E' kè dör es, e' tà be' wà ijcherdaë tò ye' tò be' iyiwak ekiblë.

<sup>34</sup>Labán tò iiüté:

—Tó, buaë idir. Iüsö wes be' iché es.

<sup>35</sup>Erë e' diwö shà tà ie' mía ie' iyiwak shushtök. Ie' chibo kos tso' wöaule skëkshkëk ö ulaula ese yéluritö. Nies ie' obeja kos tso' dalolo ese yéluritö tà iméitö ila'r wëpa a kkö'nè. <sup>36</sup>E' ukuöki tà iyiwak yélur ie' tò e' wëttsë ie' mía shkè dò ká mañat Jacob yöki. Età Jacob kawöta Labán iyiwak malepa e' kkö'nuk.

<sup>37</sup>Erë Jacob tò kal kuä'ki kuä'ki dò mañalka e' ulà aki téë. Elka

kiè álamo, skà kiè almendro, skà kiè castaño. Kal ulà kkuölit takla jchëloritö as iwër wöaule saruru skëkshkëk. <sup>38-39</sup>E' ukuöki tà kal ulà e' tuléwaitö wé iyiwak daparke di'yök e' wöshaë. Eë iyiwak wöbatsöke ñi wa. Iyiwak wöbatsöke ñi wa kal ulà ñe' wöshaë e' ala'rla kos tskirke wöaule skëkshkëk ö shkitshkit ö ulaula. <sup>40</sup>Iyiwak tskirke wöaule e' kos dapa'wëitö bänet ie' wák a. Ese wë'ñe kos uyéwaitö Labán iyiwak kos wöaule ö dalolo ese a as itskir wöaule ö dalolo. Es ie' iyiwak alörke taië bänet, kè ku' Labán icha tà ñita. <sup>41</sup>Mik iyiwak bua'buä ese wöbatsöke ñi wa, età ie' tò kal ulà ñe' tulëwà wé iyiwak di' yöke eë. Es ie'pa tò kal ulà wöaule e' sué mik iwöbatsöke ñi wa e' dalewa. E' ala'rla tskirke kos e'pa dör wöaule. <sup>42</sup>Erë mik iyiwak sí po ese datse, età ie' kè tò kal ñe' tulëwà. E' kuëki iyiwak sí po ese ala'rla kos tskirke e' dör Labán icha. Erë wé bua'buä ese dör ie' icha. <sup>43</sup>Es ie' de iyi blú taië. Obeja ena kanè mésopa wëpa ena alakölpa ñies kameio ena burro e' kos tso' ie' wà taië.

#### Jacob tkakshkar Labán yöki

**31** <sup>1</sup>Erë Jacob tò ittse tò Labán ala'r dulakölpa tò icheke: “Jacob tò se' yé iyi kos e' klö'wëwà, e' wa ie' e' blu'wé taië.” <sup>2</sup>Nies ie' tò isué tò Labán kè tò ie' suëia buaë wes kenet es. <sup>3</sup>Età Jehová tò ie' a iché: “Be' yüne be' yépa kaska' wé be' yamipa tso' eë. Ye' michoë be' tà be' kkö'nuk.”

<sup>4</sup>Jacob tò Raquel ena Lía tsuk patké dò wé ie' tso' obeja wëttsë eë <sup>5</sup>tà ichéitö ia:

—Ye' wā ijchenewā tō a' yé kè kī ye' kianeīā wēs kenet es. Erë ye' yé e' Këköl tso' ye' tā kekraë ye' kīmuk. <sup>6</sup>A' wā ijcher buaë tō ye' kanéblé a' yé ā mokī. <sup>7</sup>Erë ie' tō ye' kītō'wé kekraë ye' kané ské wa. Erë Skëköl kè wā ie' ā ikéwö mène ās ì sulu wamblöitö ye' kī. <sup>8</sup>Mik ie' tō ye' ā iché: “Ye' be' patueke iyiwak wöaule shkitshkit ese wa”, etā iyiwak ulitane pane wöaule shkitshkit ème. Mik ie' tō ye' ā iché: “Ye' be' patueke iyiwak wöaule shkëkshëk ese wa”, etā iyiwak ulitane pane wöaule shkëkshëk ème. <sup>9</sup>Es Skëköl tō a' yé iyiwak yé'lur mè ye' ā.

<sup>10</sup>“Iyiwak wöbatsöke ñi wa e' kéwö ska' tā ye' kabsué tō iyiwak wë'ñe wöbatsöke iláki wa, e' kōs wák dör wöaule shkëkshëk ena shkitshkit ena ulāulā. <sup>11</sup>Kabsuë e' ā, Skëköl biyöchökwak ye' chaké ye' kiè wa tā ye' iūté: ‘¿Ì?’ <sup>12</sup>Ie' ye' ā iché: ‘Isāú bua'ie tā be' isuëraë tō iyiwak wë'ñe wöbatsöke iláki wa, e' kōs dör wöaule shkëkshëk ena shkitshkit ena ulāulā. Ì sulu kōs wamblé Labán tō be' kī, e' suéyö, e' kuëkī ye' tō iwé es. <sup>13</sup>Ye' dör Këköl dë'bitū be' wörkī ká kiè Betel eë e'. Eë be' tō ák du'kaāt ye' dalöioie. Eë be' tō kawö me' ye' ā. Be' e' kóka bet, be' e' yóttā ká i' ā. Be' yúne wé be' kune ee.”

<sup>14</sup>Etā Raquel ena Lía e'pa tō iūté: —Kè sa' ā sa' yé daliukuö tā'ia. <sup>15</sup>Ñies sa' sué sa' yé tō suluë wēs o'ka es. Kíie tā sa' watō'ttsaitö be' ā, sa' ské klöo'itö buaë e' ewéwaitö yës. <sup>16</sup>E'ma kōs Skëköl tō iyi yé'lur sa' yé ulà ā, e' dör sa' icha ena sa'

ala'r icha. E' kuëkī ì kōs ché Skëköl tō be' ā e' iütó.


### Jacob e' yéttsā Padán-aram

<sup>17-18</sup>E' ukuökī tā Jacob tō ila'r ena ilakölpa e'pa ké e' tkökka kameio kī. Ie' iyiwak kōs ena ie' iyi kōs dë' ie' ulà ā Padán-aram ikané skéie, e' patkëmiitö keweie ie' yökī. Etā ie' e' yéttsā micho iyé Isaac ska' Canaán. <sup>19</sup>Labán míā ká bānet ioveja köyök tōk, e' dalewa ie' wā iyi diököl tso' dalöie e' kōs bléwami Raquel tō. <sup>20</sup>Jacob kè wā iyëne Labán ā tō ie' mi'keā. Es ie' tō ikité buaë. <sup>21</sup>Ie' tkashkar. Íyi tso' ie' wā e' kōs wëttsë. Bet tā ie' tkattā di' kiè Éufrates, e' wīshet. Eë tā ie' micho ká kiè Galaad e' ká köwö kī.

### Labán tō Jacob tötíé

<sup>22</sup>Jacob bakshkar e' kī ká de mañat, etā Labán wā ijchenewā tō ie' bakshkar. <sup>23</sup>Etā ie' míā itökī iyamipa tā. Ká de kul tā ie' tō ikué Galaad ká köwö kī. <sup>24</sup>E' nañewe Labán kabsué tō Skëköl de ie' wörkī tā ichéitö ia: “Ye' ttò ttsó. Kè be' kàne ttök Jacob tā kësik wa.”

<sup>25</sup>Ie' de wé Jacob úla tulur Galaad ká köwö kī eë. Eë ie' ena iyamipa, e'pa tō iúla tuléka kapo-waie ñies. <sup>26</sup>Ie' tō iché Jacob ā: —¿Ì wamblé be' tō i' es? ¿Íók be' tō ye' kītō'wé i' es? Be' wā ye' alà busipa bitëtser wēs ñippökwak-pa tō s'tsëmi es. <sup>27</sup>¿Ì kuëkī be' ye' kītō'wé? Be' tkashkar akir ye' yökī. Be' e' biyó chópa ye' ā, e'ma kawö buaë tkö'wé ye' tō a' wëttsë ttsëne buaë wa, ma'ma kicha tā' ese wa



*Jacob yamipa úla tuléka kapowaie. (Génesis 31.25)*

ena sabak blar buaë ese wa. <sup>28</sup>Kè be' wà kawö méne ye' a ena ye' ala'r busipa ena ye' duöchkepa e'pa a as sa' e' chòat ñi a. Be' tò iwamblé wës pè' suluë es. <sup>29</sup>Ye' wà diché tso' a' ulitane tsajioie buaë, erë enia nañewe be' yé e' Kèköl tò ye' a iché: 'Ye' ttò ttsó. Kè be' kàne ttök Jacob tã kèsik wa.' <sup>30</sup>Be' mitkene be' yé u a wës be' kî ikiane tajë es, etã Ìie be' tò ye' wà iyi diököl tso' dalöiè e' ekiblé?

<sup>31</sup>Etã Jacob tò iiüté:

—Ye' suane be' yöki. Ye' ibikeits dö' be' ye' yöki be' ala'r busipa yèttsane er sulu wa. <sup>32</sup>Yi wà be' iyi diököl tso' dalöiè e' tso', e' tã as e' wák duòwà. Se' yamipa kòs tso' íe se' sauk, e'pa wörki be' yú be' iyi yulök. E' kuébö, e' tã itsúmi.

Erë ie' kè wà ijcher tò Raquel tò iyé iyi diököl e' blé'wabitu.

<sup>33</sup>Etã Labán tkawà Jacob úla a ie' iyi yulök. E' ukuöki tã ie' tkawà Lía úla a. Nies Lía ena Raquel kanè

mésopa böi e'pa úla shuyulítö. Erë kè ie' wà ikune. Ie' e' yéttsa Lía úla a mía Raquel úla shuyulök. <sup>34</sup>E' dalewa Raquel tò iyé iyi diököl bléwà kameio tsikkuö dikia tã ie' wák e' tkéka ibata kî. Labán tò ie' úla ulitane shuyulé erë kè iwa ikune yës. <sup>35</sup>Raquel tò iché ia:

—A yéwö, kè be' ulunuk ye' kî. Ye' e' kòkami be' wörki, erë ye' duöke sik duè wà.

Labán tò ie' iyi diököl yulé tajë. Erë kè ie' wà ikune. <sup>36</sup>E' kuëki Jacob uluneka tajë tã ichéitö Labán a:

—Ì sulu wambléyö be' kî, e' kuëki be' ye' tötié dò íe? <sup>37</sup>Be' tò ye' iyi kòs e' shuyulé tã Ìbe', ì kuébö? E' tuló íe se' yamipa wörki as ie'pa tò ichò tò yi ttè dör mokié, be' ö ye'. <sup>38</sup>Ye' kaneblé' be' a duas doka dabom böyök (20), e' dalewa tã be' chibo ena be' obeja e' kòs tskirke bua'buä. Be' iyiwak bobokpa kè tkëulettsa yës. Nies kè

ye' wā be' obeja pupula è kataule-wa. <sup>39</sup>Namu tö be' iyiwak ttéwā, e' tã kè ye' wā inú dë'bitū. E' nuí pató' ye' tö be' ā. Ñiwe ö nañewe be' iyiwak ekiblélur akblökwakpa tö, e' patauk be' tö ye' ka'. <sup>40</sup>Ñiwe ye' tteke kaba tö. Nañewe tã ye' tteke kase tö. Kè ye' kapowā buaë. <sup>41</sup>Ye' kanëblë' be' ā duas dabom böyök (20) etā es ye' bak weinuk kékraë. Ye' kanëblë' duas dabom eyök kī tkël (14) be' alà busipa dalërmik. E' ukuökī tã ye' skà kanëblë' duas teröl be' iyiwak kuëkī, erë be' bak ye' kitö'uk kékraë ye' kanë ské wa. <sup>42</sup>Abraham ena ye' yé Isaac e'pa Këkök kè kúpa ye' tã, e' ma be' ye' patkë'bitū ulà wöchka. Erë Skëkököl tö isué tö ye' siarla, e' kanëblë' tajë, e' kuëkī ie' tö be' wöuñé eniā nañewe.

**Jacob ena Labán e'pa  
kawö mé ñi ā**

<sup>43</sup>Etā Labán tö Jacob iüté:

—Be' alakölpa dör ye' alà busipa. Be' ala'r dör ye' duöchkepa. Obeja kos e' dör ye' icha. Ì kos suëbö ië, e' dör ye' icha è. ¿Wes ye' ā ye' alà busipa ena ye' duöchkepa e'pa ormi? <sup>44</sup>E' kuëkī be' shkó. Mishka kawö muk ñi ā. Es se' wā ijcherdaë tö wes se' kawötā ñi dalöiök.

<sup>45</sup>Eë tã Jacob tö ák duéka ek ie'pa kawö muke ñi ā e' wà kkachoie. <sup>46</sup>Ie' tö iché iyamipa ā:  
—Ák dapa'ú ië.

Ie'pa ulitane tö ák dapa'wé tã ichkérak ák dapaule e' o'mik. <sup>47</sup>Etā

Labán tö ká e' kiè méka iwák ttö wa “Jegar Sahadutá”. Ñies Jacob tö ikiè méka iwák ttö wa “Galaad.”\*

<sup>48</sup>Labán tö iché:

—I'ñe ák ikké dapa'wéatsö kawö mésö ñi ā e' wà kkachoie.

E' kuëkī Jacob tö ká e' kiè méka es. <sup>49</sup>Ká e' kine ñies Mispá, wà dör tö Labán tö iché:

—Mik kè se' ñi suneia, etā as Jehová tö se' saú tö wes se' ñi wamblöke. <sup>50</sup>Be' tö ye' ala'r busipa we'iké ö be' senéwā alakölpa kuä'kī tã, e' tã e' suëraë Skëkököl tö. Eré kè yi ku' e' sauk chène ye' ā, erë Skëkököl wák tö isuëraë.

<sup>51</sup>Etā Labán tö ikí ché Jacob ā:

—Ák dur i' ena ák dapaule i' e' dapa'wéyö se' böl shushaë. <sup>52</sup>Ák dur i' ena ák dapaule i' e' dör se' böl ā iwà kkachoie tö ië è se' kawötā dökwa. Kè ye' tköpami be' kker ñippök be' tã. Ñies kè be' tköpami ye' kker ñippök ye' tã. <sup>53</sup>Abraham dör be' duöchke ena Nahor dör ye' duöchke, e'pa Këkököl eköl è, as e' tö se' shulö.

Etā Jacob tö kawö mé mokië Labán ā Skëkököl dalöieke iyé Isaac tö e' wörki. <sup>54</sup>E' ukuökī tã ie' tö iyiwak jché ña'wé Skëkököl dalöioie eë. Ie' tö iyamipa kié chkök. Ie'pa ulitane chké tã ikaperö eë.

<sup>55</sup>Bule es bla'mi tã Labán tö iduöchkepa ena ila'r busipa e'pa wöalattsé e' choat ie'pa ā. Ie' tö iché iarak: a' mú kawö tkö buaë kékraë. E' ukuökī tã imichone ikaska'.

\* 31.47 *Galaad*: Ká e' kiè dör böt erë iwà kiane chë ñies. E' dör ák dapaule kawö mène e' wa kkachoie.



Jacob tò Esaú ma'wé er bua'wè

**32** <sup>1</sup>E' ukuökì tã Jacob mir è wé imírö eë. Ñala kî Skëköl biyöchökwakpa de ie' ska'. <sup>2</sup>Mik e'pa suéitö, etã ichéitö: “I'pa dör Skëköl ñippökwakpa.” E' kuëkî ie' tò ká e' kiè mékã Mahanaim.\* <sup>3</sup>Etã ie' tò ikanè mésopa patkémî biyò muk ie' èl Esaú a tò ie' datse. Ie' èl serke ká kiè Seír atë Edom eë. <sup>4</sup>Ie' tò ichémi ikanè mésopa a: “A' tò ichó ye' èl a: ‘Be' èl Jacob datse be' wöki be' kanè mésoie. Ie' tò ichébitu be' a: Dwas ikkë kos ye' sené Labán ska'. <sup>5</sup>Ye' wã baka tso' ena obeja tso' ena burro tso' taië. Ñies kanè mésopa tso' ye' wã taië wëpa ena alakölpa. Be' dör ye' këkëpa. Be' a ttè i' patkémîyö as be' tò ye' kiöwã er bua' wa.’ ”

<sup>6</sup>Mik ibiyò wakpa dene, etã ie' a ichéitö:

—Sa' dare be' èl ska', e' wák datse bet be' shké'uk. Etã ie' wã wëpa datse e' tã dökã cien tkëyök (400).

<sup>7</sup>Mik e' ttséitö, etã taië ie' suane. Taië ie' kabikeitséka wes ye' e' ùmi. E' kuëkî ie' tò iyamipa ena ikanè mésopa ena iobeja ena ibaka ena ikameio e' kos blabatsélor böl tsíní. <sup>8</sup>Ie' ibikeitsé tò isalema ye' èl ñippòmi ek tsíní tã, e' dalewa iëk tsíní tköshkarmirak. E' kuëkî ie' iblabatsélor es. <sup>9</sup>E' ukuökî tã ie' tò iché Skëköl a: “A Jehová, be' dör ye' talà Abraham ena ye' yé Isaac e'pa Këköl. Be' ye' a iyë': ‘be' yúne be' yamipa ska', etã ye' tò be' kimeræ as be' kawö tkò buaë.’

<sup>10</sup>Be' er bua' ché ye' a. Be' kè wã ye' meatule bërbër è. Warma e' kè dör ye' siarla e' a. Ye' bakmi di' Jordán wì a kè wã ì tã', e' kéwö ska' tã ye' wã shko kéli è dami. Erè ìñe tã ye' wöché taië iyiwakie ena se'ie blabutsule böl tsíní. <sup>11</sup>Be' we'ikèyö, ye' tsatkó ye' èl Esaú e' ulà a. Ye' suane ie' yöki dö' ie' datse ñippök ye' tã; ñies dö' ye' alakölpa ena ye' ala'rla e'pa kos ewëwa ie' tò. <sup>12</sup>Be' tò ye' a iyë'atbak yësyësë tò be' tò ye' kimeræ as ye' kawö tkò buaë. Ñies be' tò iyë' tò ye' aleripa alördaë taië wes dayë tséwö kè shtarta' es.”

<sup>13</sup>E' nañewe ie' kapére eë. Iyiwak tso' ie' tã eë e' shushtë ie' tò kakmè ie' èl a. <sup>14</sup>Ikkë shutshtë ie' tò: chibo alaki dökã cien böyök (200); chibo wë'ñe dökã dabom böyök (20); obeja alaki dökã cien böyök (200); obeja wë'ñe dökã dabom böyök (20); <sup>15</sup>kameio alaki pane ñiköl ilà tã, ese dökã dabom mañayök (30); baka alaki dökã dabom tkëyök (40); baka wë'ñe pupula dökã dabop (10); burro alaki dökã dabom böyök (20); burro wë'ñe dökã dabop (10). <sup>16</sup>E' ukuökî tã iyiwak ekkë kos tuléitö ikanè mésopa a iwakmik iwakmik ulawa ulawa tã ichéitö iarak:

—A' yú ye' yöki kewe. Ká ulat múat iyiwak a ulat ulat as kè iwöierwã ñita.

<sup>17</sup>Etã kanè méso kewe patkémîitö e' a ichéitö:

—Mik be' tò ye' èl kué tã ie' tò be' chaké: “¿Yi be' wökir? ¿Wé be'

\* 32.2 Mahanaim: Hebreoie ká kiè e' wã kiane chë ñippökwakpa böltëpa.

micho? ¿Sekkë dör yi iyiwak?”,  
18 etä iütó: “A kékëpa, iyiwak i' kōs  
e' kak patké be' kanè méso Jacob  
tö be' a. Ie' wák datse sa' itöki.”

19 E' sù ikanè mésopa malepa  
patkémiiitö iyiwak wëttsë, e'pa a  
ichémiitö ñies:

—Mik a' tö Esaú kué, etä ichó ia  
es è. 20 Kè a' éna ichökwa chè ia:  
“A kékëpa, be' kanè méso Jacob e'  
datse sa' itöki.”

Ie' tö ibikeitsé: “Iyiwak  
patkémiiyö keweie ye' ël a e' dör  
as ie' er buarne ye' ki. E' ukuöki  
tä ye' wák tö isuëmi. Es ie' tö ye'  
kiëwami er bua' wa.” 21 Es iyiwak  
kak patkémiiitö keweie ie' yöki. Erë  
ie' wák e' tséat kapökrö ie' úla a.

### Jacob ñippé kapa wa Skëköl tä

22-23 E' nañewe Jacob e' kéka. Ie'  
tö ilakölpa böl ena e'pa kanè méso-  
pa böl ena ila'r dökä dabom eyök ki  
eköl e'pa kōs dapa'wéitö tä iuyöktsa  
ké di' Jaboc wišet ñies i' kōs tso'  
iwä ekkë uyéttsaitö. 24 Ie' e' tséat  
eköl. Eë tä wëm de eköl ie' ska' tä  
ie'pa ñippé kapa wa darërë dö kä  
ñine etä. 25 Erë wëm e' tö isué tö kè  
ie' e' alöpakä Jacob ki. E' kuëki ie'  
tö itéwä itu' wöierkewä e' ki tä itu'  
wöyënettsä. 26 Etä wëm ñe' tö iché  
ie' a:

—Kä ñirkewatke e' kuëki ye' ówa.

Ie' tö iüté:

—Kè be' tö ye' a kawö bua' mè,  
etä kè ye' tö be' epamine.

27 Wëm tö ie' a ichaké:

—¿Ima be' kiè?

Ie' tö iüté:

—Ye' kiè Jacob.

28 Wëm tö iché ia:

—Kè be' kiëia Jacob. Be' kirdaë  
Israel. \* Be' ñippé Skëköl tä ñies  
s'ditsö tä etä i' kiane be' ki e' de be'  
ulä a, e' kuëki be' kiè mékayö es.

29 Jacob tö ie' a ichaké:

—Ichó ña, ¿ima be' kiè?

Ie' iüté:

—¿Iók be' ki ye' kiè kiane  
jchënuke?

Eë tä wëm ñe' er bua' ché ie' a.

30 Ie' tö kä e' kiè mékã Penuel. \*

Ie' tö iché: “Eré ye' tö Skëköl wák  
suéwä ye' wöbla wa, erë kè ye'  
du'wä.” E' kuëki kä e' kiè mékaitö  
es.

31 Mik ie' tkökemitke Penuel, etä  
diwö tschine. Erë ie' tu' wöyënettsä,  
e' kuëki ie' shkörämi shaotshaot.

32 Ie' tënëwä itu'kicha ki, e' kuëki  
dö ikkë tä ie' aleripa kōs kè tö  
iyiwak tu'kicha katetä'.

### Esaú er buanene Jacob ki

**33** 1 Mik Jacob tö isué tö ie'  
ël datse ena wëpa tajë  
datse ie' wä dökä cien tkëyök (400),  
etä ie' tö ila'rla blabatsé. E'pa  
méitö Lía a ena Raquel a ena e'pa  
kanè mésopa böl a. 2 Kanè méso-  
pa böl e'pa patkémiiitö keweie ila'r  
tä. E' ukuöki tä ie' tö Lía ena ila'r  
patkëmi. Bata ekkë Raquel ena ilä  
José e'pa patkémiiitö. 3 Etä ie' wák  
tkami kewe ie'pa yöki. Ie' mirwä  
ie' ël wörki e' dalewa ie' wöëmi  
dö iski es iwöömir dökä kuktöki-

\* 32.28 *Israel*: Hebreoie s'kiè e' wà kiane chè ñippé Skëköl tä.

\* 32.30 *Penuel*: Hebreoie kä kiè e' wà kiane chè Skëköl wö.

cha (7 veces). Es ie' demi tsinet iël wörki. <sup>4</sup>Etä Esaú tūnebitu ie' wöki, ta ipaklö'wéwaitö ikuli' a ta iwöa-lattséitö ta iéрак ñita. <sup>5</sup>E' ukuöki ta Esaú tö Jacob alakölpa ena ila'rla e'pa sué ta ichakéitö ia:

—¿Wikképa dör yi?

Jacob tö iiuté:

—A kéképa, Skököl tö ala'rla wikképa mé ye' a.

<sup>6</sup>Etä ilakölpa kanè mésopa e'pa de ila'rlaë ta iwö éwarak dò iski. <sup>7</sup>E' ukuöki ta Líá de ila'rè ta ie'pa wöéwa iski ñies. Bata ekké ta Raquel de ilà José ta etä ie'pa wöéwa dò iski ñies. <sup>8</sup>E' bet ta Esaú tö ie' a ichaké:

—Iyiwak kuéyö ñalá ki ulawa ulawa çie e' dör?

Ie' iiuté:

—E' dör as be' er buarne ye' ki.

<sup>9</sup>Esaú tö iiuté:

—Au, kè be' tkinuk ye' ki. Ye' wa itso' taië. E' tsúat be' wák tö.

<sup>10</sup>Erë Jacob tö iskà ché ia:

—Au, kè be' tö ye' ttè watök-tsa. Be' er buanene ye' ki e' ta iyi kakmekeyö be' a e' klö'ú. Be' tö ye' kiéwä buaë. Be' suéneyö e' dör buaë ye' a wes Skököl wák suéyö es. <sup>11</sup>Taië Skököl tö ye' blu'wé. Kè i kianeia ye' ki. E' kuéki ye' be' pablè tö iyi kakméyö be' a e' tsú ye' ulà a.

Jacob tö iyiwak watké ia taië, e' kképa iël Esaú tö iyiwak tsé iulà a.

<sup>12</sup>Esaú tö iché ia:

—E'ma mishka ñita. Ye' mi'ke kéwe.

<sup>13</sup>Erë Jacob tö iiuté:

—A kéképa. Be' wa ijcher bua' tö ye' ala'r ia tsitsirla. Ñies obeja ena baka tso' alàe e' bikeitséyö dö' ishtrirwä ta iduölmurmi sekka ká etkéme. <sup>14</sup>Ye' a ta buaë idir tö be' yu'tke kéwe, etä wé' ye' do be' itöki énaena wes ye' iyiwak ena ye' ala'rla shkömir es. Es ye' mir ie'pa ta dö be' serke Seír eë.

<sup>15</sup>Etä Esaú tö iiuté:

—E'ma buaë idir. Kawö mú ña ye' kanè mésopa welepa mukat be' a be' kimoie.

Erë Jacob tö iiuté:

—Au, çiók be' e' we'ikò ye' wa ekké chökke?

<sup>16</sup>E' è diwö ta Esaú míane Seír iyamipa ta. <sup>17</sup>Erë Jacob míä ká kiè Sucot\* eë. Eë ie' u yué iwák a. Ñies iyiwak wé chali'wéitö. E' kuéki ká e' kiè mékaitö Sucot.

<sup>18</sup>Es Jacob manétat Padán-aram dö Canaán. Ie' dettsa buaë. Ie' sené ká kiè Siquem, e' wösha. <sup>19</sup>Wé ie' tö ká yué e' tuéttsa ie' tö. E' ské dör inuköl wömulé döka cien eyök (100). Hamor dör Siquem yé, e' ala'r tö ká watué Jacob a. <sup>20</sup>Ká e' a Jacob tö ák kataté et ka'ie iyiwak jchoie Skököl dalöioie. E' kiè mékaitö El-elohé-israel.\*

#### Dina dalösewéwä Siquem tö

**34** <sup>1</sup>Jacob alà busi Líá ta kiè Dina, ká et ta e' míä ká e' wakpa busipa pakök. <sup>2</sup>Etä Hamor e' dör heveowak e' dör ká e' wökir, e' aladulaköl kiè Siquem e' tö Dina

\* **33.17** *Sucot*: Hebreoie ká kiè e' wà kiane chè u yöule chalichali.

\* **33.20** *El-elohé-Israel*: Hebreoie kiè e' wà kiane chè *Israel Kéköl diché ta' taië*.

sué. Età ie' tò iklö'wéwà tã isenékã itã kësik wa. <sup>3</sup>Erë ie' wöbatse Dina wa tajë tã ipablëitö tajë. <sup>4</sup>Etã ie' tò iché iyé a:

—A yéwö, be' yú kékëpa Jacob ska' ilà busi kiöktsã ye' a as ye' serwã ie' tã.

<sup>5</sup>Ì sulu wamblé Siquem tò Dina tã e' jchenewã Jacob wã. Erë ie' aladulakölpa tso' kañikã iyiwak kanéuk, e' kueki ie' kè wã iyëne ie'pa a. <sup>6</sup>E' dalewa Hamor dör Siquem yé e' mía Jacob ska' ttök ie' tã.

<sup>7</sup>Mik Jacob aladulakölpa dene u a, etã ì wamblëne Dina tã e' jchenewã ie'pa wã. E' tò ie'pa uluwékã tajë. Siquem senékã Jacob alà busi tã e' dör iyi suluë Israel aleripa a. E' kè kawö tã' wamblë es. <sup>8</sup>Erë Hamor tté ie'pa tã, tã ichéitö ia:

—Ye' aladulaköl Siquem, e' wöbatse tajë a' kutà wa. A' we'ikèyö kawö mú ie' a senukwã ie' tã. <sup>9</sup>Es a' yörmi sa' yamipaie. Es sa' serwãmi a' alà busipa tã. Ñies a' serwãmi sa' alà busipa tã. <sup>10</sup>A' e' tsúat senuk sa' shuã. A' senú sa' kã a wé a' ki ikiane eë. A' tò iyi wataú ena iyi tãú. A' tò kã tãú. Kè yi tò a' wöklö'wëpa.

<sup>11</sup>Ñies Siquem tté Dina yé tã ena ikëpa tã, etã ichéitö ia:

—Ye' a' pablè tò ye' ttè klö'ú. Ye' tò a' a iyi kakmeraë kos a' ki ikiane ekkë. <sup>12</sup>Kos iské\* dör e' tsatã a' tò ye' a ikí kié, e' tã ekkë meraëyö a' a. E' kè ki ye' tkine. Ye' tò iyi meraë tajë a' a, erë kawö mú ye' a senukwã be' kutà tã.

<sup>13</sup>Erë Siquem tò ie'pa kutà dalösewéwã, e' kueki ie'pa tò ie' ena iyé iüté kachè wa. <sup>14</sup>Ie'pa tò iché ia:

—Kè sa' a sa' kutà menuk wëpa kè tottola kkuölitla tëule tsir, esepa a. E' dör suluë sa' a jaë tajë. <sup>15</sup>Es è sa' tò a' iütëmi. A' wëpa kos tottola kkuölit tée tsir wës sa' es, e' tã sa' tò a' ttò iütëmi. <sup>16</sup>Es a' serwãmi sa' alà busipa tã. Ñies sa' serwãmi a' alà busipa tã. Es sa' sermi a' tã ñita wës kã etkè wakpa es. <sup>17</sup>Erë kè a' wã a' tottola kkuölitla tëne wës sa' tò iché a' a es, e' tã sa' míyalne kã i' ki. Sa' kutà mítserne sa' wã.

<sup>18</sup>Etã Hamor ena ilà Siquem e'pa a imène buaë. <sup>19</sup>Tajë duladula e' ki Jacob alà busi kiane, e' kueki bet iwéitö wës ie'pa tò iché es. Ie' dalò tajë iyé ska' imalepa tsatã. <sup>20</sup>E' kueki ie' mía iyé tã kã kköi-ëule e' wékkö a. Eë kã e' wakpa ñi dapa'uke ttè shuloie. Eë Siquem ena iyé mía ttök ikã wakpa tã. Tã ichéitö iarak:

<sup>21</sup>—Pë' debitu íe er buaë se' tã. Ie'pa de senuk se' tã, iyi tãuk ena iyi watauk se' shuã. Kã tso' wë' ie'pa a. Se' serwãmi ie'pa alà busipa tã. Ñies ie'pa serwãmi se' ichapa tã. <sup>22</sup>Etã as se' dò kã etkè wakpaie ie'pa tã ñita, etã s'kawötã iuk wës ie'pa tò iché es. Ie'pa tò iché tò se' wëpa ulitane kawötã itóttola kkuölitla tók tsir wës ie'pa wöblane iuk es. <sup>23</sup>Etã kos ie'pa wã iyiwak tso', ì tso' e' doraë se' icha. Sö ichò ie'pa a tó. Etã es ie'pa e' tsukeat senuk se' shuã.

\* 34.12 iské: E' kéwö ska' tã ie'pa wöblar tò ilà busipa watueke inuaki a.

<sup>24</sup>Etā wēpa tso' ká e' kī kibine-  
tke, e'pa ulitane a buaë idir. Etā  
ie'pa kōs tottola kkuölitla télor tsir.

<sup>25</sup>E' ukuökī bökkī es tā mik  
e' dalërkeiā taië kè wa ie'pa e'  
tsatkër, etā Jacob aladulakölpa  
dör Dina akēpa kiè Simeón ena  
Leví, e'pa míyal Siquem, etā ká  
e' wakpa wēpa télurdakitō seraā  
tabè wa. <sup>26</sup>Es ie'pa tō Hamor  
ena ilà Siquem e'pa ttéwā tabè  
wa. Ie'pa tō ikutà yéttsā Siquem  
u a tā imíyal. <sup>27</sup>Ká e' wēpa ttélur  
seraā. E' ukuökī tā Jacob aladula-  
kölpa malepa debitū tā íyi kōs tso'  
ká e' kī e' tsémirakitō. <sup>28</sup>Es ie'pa  
wā obeja ena baka ena burro ena  
íyi kōs tso' ká kköiëulewā e' a, ñies  
ì kōs tso' kañikā e' mítser. <sup>29</sup>Ñies  
íyi tso' kōs u a, e' mítser ie'pa wā  
seraā. Ala'rla kōs ena alakölpa kōs  
e'pa klö'wélur ie'pa tō ie'pa kanè  
mésopaie. <sup>30</sup>Etā Jacob tō iché  
Simeón ena Leví a:

—A' tō se' tsaié. A' kuëkī ká i'  
wakpa e' dör canaánwak ena fere-  
seowak e'pa ulurdaë se' kī taië.  
Ie'pa ñi dapa'uraë ñippök se' tā.  
Kè se' wā ñippökwakpa tā' taië, e'  
kuëkī ie'pa e' alörakā se' kī. Ye' ena  
ye' yamipa kōs ttelurdaë ie'pa tō.

<sup>31</sup>Erë ie'pa tō iiuté:

—¿Ima ie'pa erbikò tō ie'pa wā  
sa' kutà mi'mitser wēs alakölpa  
sulusi es?

### Skëköl er buaë ché Jacob a Betel

**35** <sup>1</sup>E' ukuökī tā Skëköl tō  
iché Jacob a: “Be' yú

senuk Betel. Eë ák katató ka'ie  
ye' dör be' Këköl e' kkayë' be' a  
mik be' bakshkar Esaú yöki etā,  
e' dalöioie.” <sup>2</sup>Etā Jacob tō iché  
iyamipa a ena kōs itso'rak ie' tā,  
e'pa a ñies:

—Íyi diököl tso' a' wā dalöiè, ese  
kōs tulóttsa bet. A' kuó tā a' datsi'  
mane'úlor. <sup>3</sup>Mishkarak bet Betel.  
Eë ye' tō ák katateke et ka'ie iyiwak  
jchoie Skëköl dalöioie. Ie' tō ye'  
kime' mik ye' bak erianuk taië etā.  
Ie' tō ye' kköna' kōs ye' káka're ekkè.

<sup>4</sup>E' bet tā íyi diököl tso' ie'pa wā  
dalöiè ese tulérakitō Jacob a. Ñies  
ikukuöio kōs, e' tulérakitō Jacob a.  
E' kōs wötéluritō kós klò ter tsinet  
Siquem e' dikia. <sup>5</sup>Etā ie'pa e' yélur.  
Erë ká tso' tsinet tsinet e' wakpa  
kōs suawéka taië Skëköl tō, e' kuëkī  
e'pa kè wā ie'pa töiëne.

<sup>6</sup>Etā Jacob ena iyamipa kōs demi  
ká kiè Luz atē Canaán. Ká e' kiè  
ñies Betel. <sup>7</sup>Etā eë ák katatéitō et  
ka'ie iyiwak jchoie Skëköl dalöioie.  
Eë Skëköl e' kkayë' ie' a mik ie'  
bakshkar iël yöki etā. E' kuëkī ák  
katatéitō e' kiè mékaitō El-Betel.\*

<sup>8</sup>E' ukuökī tā ká e' a Rebeca  
kkö'nukwak bak kiè Débora, e' blë-  
newā tā inú bléwarakitō kós klò ter  
eë e' dikia. Kal e' ter ká kiè Betel  
e' o'mik. Jacob tō ká e' kiè méka “Iè  
kéli”.

<sup>9-10</sup>Mik Jacob biteane Padán-  
aram dene Canaán, etā Skëköl e'  
kkachéne etökichane ie' a. Etā Skë-  
köl er buaë ché ie' a i' es:

“Be' kiè Jacob,

\* 35.7 *El-Betel*: Hebreoie kiè e' wā kiane ché *Skëköl tso' Betel*.

erë be' kè kièià es.  
I'ñe ta be' kiè mékayö Israel.”

Skëköl tö ie' kiè mane'wéttsa,  
11 e' ukuökì ta ichéitö ia:

“Ye' dör Skëköl Diché Ta' Ýyi  
Ulitane Tsata e';  
Be' ala'r ena be' aleripa alönú  
taië.

Be' aleripa alördaë taië,  
e'pa döraë ká taië wakpaie.  
Ñies ie'pa shuà blu'pa döraë.

12 Ká me'bakyö Abraham a ena  
Isaac a,  
e' méyö be' a ñies be' aleripa  
a.”

13 Mik Skëköl tté one Jacob ta, ta  
imía. 14 Ee Jacob ák duéka ek së sù.  
Ák e' kì ie' tö kiö ena vino té iwà  
kkachöie tö e' dör batse'r Skëköl a.  
15 Ká e' kiè mékaitö Betel.

### Raquel blënewa

16 E' ukuökì ta ie'pa e' yélur  
Betel míyal Efrata. Kam ie'pa dõmi  
Efrata e' tso'ia elkeë, eta Raquel  
alà kurketke e' diwö de. E' tö  
Raquel kiri'wéwa taië erë kè iwà  
kur yës. 17 Ie' tso'tke suluë ichók  
eta ikkö'nukwak dur ee, e' tö iché  
ia: “Kè be' suanuk. Be' alà kune.  
E' wák dör wëm.” 18 Eta Raquel  
wake' duökewatke, isiwá' bata  
tkökeia, e' shuà ilà kiè mékaatitö  
Ben-oní. \* Erë ilà yé tö ikiè mane'wé  
Benjamín.\*

19 Es Raquel blënewa. Inú wöté-  
warakitö Efrata ñalé kì. I'ñe ta ká  
e' kiè Belén. 20 Eta wé Raquel nu  
bléwaitö e' kì ák duéka ek Jacob  
tö iwà kkachöie. I'ñe ta ák e' tkëria  
Raquel pö kkachöie.

21 Eta Israel \* michoë wé imi'kerö  
ee. Ie' e' tséat senuk ká kiè Mig-  
dal Éder e' wishké. 22 Ie' tö ká yué  
senoie ee, e' ukuökì ta ilà Rubén  
senéka ie' alaköl kiè Bilhá e' ta, e'  
jchenewa ie' wa.

### Jacob aladulakölpa

Jacob aladulakölpa döka dabom  
eyök kì bøl (12). 23 Ie' ala'r Lía ta e'pa  
dör Rubén, e' dör ikibi, ñies Simeón,  
Leví, Judá, Isacar ena Zabulón.

24 Ila'r Raquel ta e'pa dör José ena  
Benjamín. 25 Raquel kanè méso kiè  
Bilhá, e' ta ila'r dör Dan ena Neftalí.  
26 Lía kanè méso kiè Zilpá, e' ta ila'r  
dör Gad ena Aser. E'pa dör Jacob ala-  
dulakölpa kune Padán-aram e'pa.

### Isaac blënewa

27 Jacob minea iyé Isaac sauk ká  
kiè Mamré ee. Ká e' kiè ñies Arbá  
ö Hebrón. Ká e' a Abraham ena  
Isaac bak senuk. 28-29 Isaac këne-  
watke. Mik ie' kì duas tso' cien  
eyök kì dabom paryök (180), eta  
iblënewa mía idëütöpa itökì. Ila'r  
Esaú ena Jacob e'pa tö inú wötéwa.

### Esaú aleripa

**36** 1 I'pa dör Esaú aleripa.  
Esaú kiè ñies Edom. 2 Esaú

\* 35.18 Benoni: Hebreoie s'kiè e' wà kiane chè ye' eriane e' alé.

\* 35.18 Benjamín: Hebreoie s'kiè e' wà kiane chè ye' ulà bua'kka e' alé.

\* 35.21 Israel: E' dör Jacob kiè pa'alí me'ka Skëköl tö ikì e'.

senéwā canaánwak alakölpa mañal ta. Eköl dör Adá, e' dör hititawak kiè Elón, e' alà busi. Ièköl kiè Oholibamá, e' dör Aná alà busi ena heveowak eköl kiè Sibón, e' talà.

<sup>3</sup>Bata ék kiè Basemat, e' dör Ismael alà busi ena Nebaiot kutà. <sup>4</sup>Adá alà tsá kune e' kiè Elifaz. Basemat alà kiè Reuel. <sup>5</sup>Oholibamá ala'r kune mañal. E'pa kiè dör Jeús, Jaalam ena Coré. E'pa dör Esaú ala'r kune mik ie' bak senuk Canaán eta e'pa.

<sup>6</sup>Esaú wā ilakölpa ena ila'r wēpa ena ila'r busipa ena imalepa kōs serke ie' ska' e'pa kōs míyal ie' wā e' ta senuk ká bānet iël Jacob e' yōkī. Nies ie' wā iyiwak kōs ena ì kōs dē' ie' ulà a Canaán, e' mítser seraā. <sup>7</sup>Esaú ena Jacob wā iyi tso' taiē. E' kuēkī ie'pa kē chē'kaia nīta. Kē ì ku'ia wē' ie'pa bōl iyiwak a katē. <sup>8</sup>E' kuēkī Esaú (e' kiè nīes Edom) e' mīa senuk Seír kēbata a.

<sup>9</sup>I' dör Esaú aleripa bak senuk Seír kē köwō kī, e'pa kiè edomwak. <sup>10</sup>I'pa dör Esaú ala'r: Elifaz e' dör Esaú alà Adá ta, ena Reuel e' dör Esaú alà Basemat ta.

<sup>11</sup>Elifaz ala'r dör Temán, Omar, Sefó, Gatam ena Quenaz. <sup>12</sup>Elifaz alaköl skà bak eköl kiè Timná, e' ta ilà ta' eköl kiè Amalec. E'pa dör Esaú alaköl kiè Adá e' uyökpa.

<sup>13</sup>Reuel ala'r dör Náhat, Zérah, Samá ena Mizá. E'pa dör Esaú alaköl kiè Basemat e' uyökpa.

<sup>14</sup>Esaú alaköl kiè Oholibamá, e' dör Aná alà busi ena Sibón talà. Ie' ala'r dör Jeús, Jaalam ena Coré.

<sup>15</sup>I'pa dör Esaú aleripa e'pa ditséwōpa wōkirpa:

Esaú alà kibi kiè Elifaz e' aleripa dör: Temán, Omar, Sefó, Quenaz,

<sup>16</sup>Coré, Gatam ena Amalec. E'pa dör Elifaz aleripa e'pa ditséwōpa wōkirpa bak senuk Edom. Ie'pa dör Adá uyökpa.

<sup>17</sup>Esaú alà kiè Reuel e' ala'r dör: Náhat, Zérah, Samá ena Mizá. E'pa dör Reuel ditséwōpa wōkirpa bak senuk Edom. Ie'pa dör Basemat uyökpa.

<sup>18</sup>Esaú alaköl kiè Oholibamá e' dör Aná alà busi. Ie' ala'r dör: Jeús, Jaalam ena Coré. E'pa dör Oholibamá ditséwōpa wōkirpa.

<sup>19</sup>E'pa kōs dör Esaú (kiè nīes Edom) e' aleripa. E'pa dör ie'pa ditséwōpa wōkirpa.

<sup>20</sup>I'pa dör wēm dör horeowak eköl kiè Seír, e' ala'r. Ie'pa bak senuk Edom nīes. Ie'pa kiè dör: Lotán, Sobal, Sibón, Aná, <sup>21</sup>Disón, Éser, ena Disán. E'pa dör Seír ala'r wēpa. Ie'pa dör horeowak wōkirpa bak senuk Edom. <sup>22</sup>Lotán ala'r dör Horí ena Hemam. Lotán kutà dör Timná. <sup>23</sup>Sobal ala'r dör Alván, Manáhat, Ebal, Sefó ena Onam. <sup>24</sup>Sibón ala'r dör Aiá ena Aná. Ká e' ta Aná tso' iyé kiè Sibón e' burro kkō'nuk e' dalewa ie' tō di' tum kué taiē ká sí po e' a. <sup>25</sup>Aná alà wēm kiè Disón. Ie' alà busi kiè Oholibamá. <sup>26</sup>Disón ala'r dör Hemdán, Esbán, Itrán ena Querán. <sup>27</sup>Éser ala'r dör Bilhán, Zaaván, ena Acán. <sup>28</sup>Disán ala'r dör Us ena Arán.

<sup>29</sup>Horeowak wōkirpa dör Lotán, Sobal, Sibón, Aná, <sup>30</sup>Disón, Éser, ena Disán. E'pa dör horeowak wōkirpa iyamipa wa. Ie'pa bak senuk Seír.

<sup>31</sup>I'pa dör Edom blu'pa, kam Israel aleripa blúpa dō e' yōkī.

<sup>32</sup>Bela, e' dör Beor alà, e' de Edom wakpa blúie. Ie' ká kiè Dinhaba. <sup>33</sup>Bela blënewa e' skéie Jobab yöne blu'ie. Ie' dör Zérah alà. Ie' datse Bosrá. <sup>34</sup>Jobab blënewa e' skéie Husam datse Temán e' yöne blu'ie. <sup>35</sup>Husam blënewa e' skéie Hadad dör Bedad alà e' yöne blu'ie. Bedad e' ali'ka Madián wakpa ki ká kiè Moab ee. Husam ká kiè Avit. <sup>36</sup>Hadad blënewa, e' skéie Samlá yöne blu'ie. Ie' ká kiè Masrecá. <sup>37</sup>Samlá blënewa, e' skéie Saúl yöne blu'ie. Ie' ká dör Rehobot. Ká e' atë di' kkò a tsinet. <sup>38</sup>Saúl blënewa, e' skéie Baal-hanán yöne blu'ie. Ie' dör Acbor alà. <sup>39</sup>Baal-hanán blënewa, e' skéie Hadad yöne blu'ie. Ie' ká kiè Pau. Ie' alaköl kiè Mehetabel, e' dör Matred alà busi ena Mezaab talà.

<sup>40</sup>I'pa dör Esaú aleripa kiè iyamipa wa ñies iká wa: Timná, Alvá, Jetet, <sup>41</sup>Oholibamá, Elá, Pinón, <sup>42</sup>Quenaz, Temán, Mibsar, <sup>43</sup>Magdiel ena Iram. Esaú kiè ñies Edom. E'pa kos dör Edom ká blu'pa wé isenerak iká ki ee.

**37** <sup>1</sup>Jacob e' tséat senuk Canaán wé iyé bak senuk ee. <sup>2</sup>Ttè i' dör Jacob aleripa e' paké.

### José ena iëlpa

Jacob alà kiè José, mik e' ki duas tso' dabom eyök ki kul (17) etä ie' tso' iyé obeja kkö'nuk iëlpa ta. Iëlpa dör iyé alakölpa kiè Bilhá ena Zilpá, e'pa ala'r. Etä i sulu kos wambleke iëlpa tö ie' wöwa, ese kkateke seraä ie' tö iyé a.

<sup>3</sup>Ie' kune mik iyé Jacob kënewatke etä. E' kuëki Jacob ki ie' kiar

ila'r malepa tsata. E' kuëki Jacob tö datsi' yué ie' a kitküle buaë.

<sup>4</sup>Erë mik ie' elpa wa ijchenewa tö ie'pa yé ki ie' kiar ie'pa ulitane tsata etä ie'pa éna iar suluë, kè ishke'weta'.

<sup>5</sup>Ká et ta ie' kabsué e' pakéitö iëlpa a. E' kuëki ie'pa éna suluë ie' kí ane. <sup>6</sup>Ie' tö ikabsuë paké iëlpa a i' es:

—Ye' ttò ttsó. Ye' kabsué e' pakekeyö a' a. <sup>7</sup>Ye' kabsué tö se' ulitane tso' kanablök kañika dalì shüa. Se' tso' dalì wöshtök e' tsatésö ettsak ettsak. Ye' tö isuë tö bet ye' icha e' duéka bua' shkë'ka. A' ichapa e' dapa'wé ye' icha pamik shkit ta e'pa tö ye' icha dalöié.

<sup>8</sup>Etä iëlpa tö iiuté:

—¿Be' éna iwà chak tö be' döraë sa' blúie? ¿Sa' serdaë be' dikia?

Ie' kabsué ena wes ipakéitö ie'pa a, e' kuëki ie'pa éna suluë ie' kí ane.

<sup>9</sup>E' ukuöki ta ie' skà kabsuëne, e' pakéitö iëlpa a ñies. Ie' tö iché ie'pa a:

—Ye' kabsué tö diwö ena si'wö ñies bëkwö döka dabom eyök ki et (11), e' kos tö ye' dalöieke.

<sup>10</sup>Mik ie' tö ikabsué e' paké iyé a ena iëlpa a, etä iyé tö iuñé:

—¿I' kiane chë be' ki kabsuë e' wa? Ttsëskua be' mì ena be' elpa ena ye', sa' kawöta be' dalöiök.

<sup>11</sup>Ie' elpa éna iar suluë. Erë iyé tö ibikeitsé taië: ¿i' kébisué José tö es?

### José watuëttsa iëlpa tö

<sup>12</sup>Ká et ta José elpa míyal dö Siquem iyé iyiwak wëttsë kakö yulök. <sup>13</sup>Etä Jacob tö iché José a:



—Be' ëlpa tso' tsinet Siquem iyiwak kkö'nuk. Ye' kî ikiane tö be' yú isauk.

Etä José tö iiuté:

—E' buaë. Ye' mí isaukrak.

<sup>14</sup>Jacob tö iiuté:

—Èkëkë. Be' yú be' ëlpa sauk, is itso'rak, is iyiwak tso' ñies. E' wa be' wä ye' ä ittë dömine.

Etä Jacob tö ie' patkëmi. Ie' e' yéttsä Hebrón ké kkue kî mía Siquem. <sup>15</sup>Eë ie' shkòdur chò kañika, e' kuéwä wëm eköl tö tä e' tö ie' ä ichaké:

—¿Ì yulök be' tso'?

<sup>16</sup>Ie' tö iiuté:

—Ye' tso' ye' ëlpa yulök. ¿Be' kè wä ijcher wé ie'pa tso' ye' yé iyiwak kkö'nuk?

<sup>17</sup>Wëm e' tö iiuté:

Ie'pa kè ku'ia ie. Ie'pa mineyalbak. Ye' ittò ttsérak tö ie'pa mi'keä Dotán.

Etä ie' mía iëlpa yulök. Etä ie'pa kuéitö Dotán. <sup>18</sup>Etä iëlpa tö ie' sué kamië tö ie' datse. Kam idò e' dalewa iëlpa kawö mérak ñi ä ie' ttowä. <sup>19</sup>Ichéraitö ñi ä:

—Kabsaukwak datse. <sup>20</sup>Ittöwasö. Inú batröömiso kauk kè ä di' tä' ese ä. Etä ichösö tö iyiwak sulusi ie' katéwa. Es ie' kabsuë e' kè wä tköpa yës.

<sup>21</sup>Mik Rubén tö ttè e' ttsé, etä ie' éna iël tsatkak. E' kuëki ie' tö iché iëlpa ä:

—Kè ittarwä. <sup>22</sup>Kè a' tö ie' pé tkö'uk. A' tö iómi kauk i' ä. Kè a' ulà mukkä iki.

Rubén éna José tsatkak tsèmine iyé ä, e' kuëki ie' tö iché ie'pa ä es. <sup>23</sup>Erë mik José debitü iëlpa ska', etä ie'pa tö ie' datsi' kîtkëule bua', e' yéttsä. <sup>24</sup>Etä iklö'wëwarakitö

batréemi, kauk tso' di' blóie, erë kè iwà tä' ese ä.

<sup>25</sup>E'ukuöki tä ie'pa e' tuléwä chkök, e' shuä ie'pa isuë tö taië Ismael aleripa datse. E'pa datse Galaad michoë Egipto dalì dami iwa e' watauk. Kameio kî ie'pa wä kiò alar buaë e' dami. Ñies kiò masmas kiè bálsamo ena mirra e' dami iwä. <sup>26</sup>Etä Judá tö iché iëlpa ä:

—Se' ël ttéwasö tä e' tté blésö, e' tä e' wa ¿i buaë dömi se' ulà ä? <sup>27</sup>Ye' ichè buaë idir tö iwatauttsasö Ismael aleripa ä. Ie' dör se' ël se' yami ekka, e' kuëki kè sö ittöwä.

E' mène buaë iëlpa ä. <sup>28</sup>Mik íyi wataukwakpa datse Madián e'pa tkami eë, etä ie'pa tö iël yéttsä kauk ä watuéttsarakitö Ismael aleripa ä inuköl wömule döka dabom böyök (20) ské ekkë. Es Ismael aleripa wä José minetser Egipto.


<sup>29</sup>Mik Rubén debitü kauk kkò kî, etä kè iël ku'ia. E' tö ie' eriawé taië. E' kuëki idatsi' jchélor. <sup>30</sup>E' ukuökü tä, ie' mía iëlpa ska' tä ichéitö ie'pa ä:

—Se' ël tsirla kè ku'. ¿Wes ye' e' ümi?

<sup>31</sup>Etä ie'pa tö chibola ttéwä tä e' pé wa José datsi' patiëkarakitö.

<sup>32</sup>Etä datsi' e' patkëmiitö iyé ä tä ichémi ia: “Datsi' i' kué sa' tö. Ì saü bua'ie. ¿Kè idör be' alà datsi'?”

<sup>33</sup>Etä Jacob tö iché: “iTó, i' dör ye' alà datsi'! Iyiwak sulusi wésele tö ye' alà ttéwä katéwa.” <sup>34</sup>Etä Jacob tö idatsi' jchéloyar eriane kuëki. Etä datsi' tso' iëno mik schönewä ese iékaitö. Etä ilà blënewä e' eriaitséitö ká taië. <sup>35</sup>Etä ila'r, wëpa ena alakölpa, e'pa qos de ie' pablök,



*Ismael aleripa wā dali dami kameio kī watuè. (Génesis 37.25)*

erë kè ie' pablër yës. Ikí iūke tajë shütë ilà dalërmik. Ie' tō iché: “Ye' schó eriaitséraë dō mik ye' duowa ekkë, es ye' dōraë ie' ska'.”

<sup>36</sup>Etā madiánwakpa demi Egipto. Eë ie'pa tō José watuéttsā wëm kiè Potifar e' ā. Wëm e' kaneblöke Egipto blú ā. Potifar dör Egipto blú tsatkökwakpa e' wökir.

### Judá ena Tamar

**38** <sup>1</sup>E' kèwö ska' tā Judá e' batséttsā iëlpa yökī míā senuk wëm kiè Hirá e' ska'. E' serke ká kiè Adulam. <sup>2</sup>Eë Judá tō alaköl sué eköl. E' dör wëm canaánwak kiè Súah e' alà busi, e' tā ie' senéwā. <sup>3</sup>E' ukuökī tā idunekā tā ilà kune wëm, e' kiè mékaitö Er. <sup>4</sup>E' ukuökī ilà skà kune wëm, e' kiè mékaitö Onán. <sup>5</sup>E' ukuökī tā ilà skà kune wëm, e' kiè mékaitö Selá. E' kune mik ie' serke ká kiè Quezib, eë etā.

<sup>6</sup>Judá tō alaköl yulé senowāie ilà kibi kiè Er e' tā. E' kiè Tamar. <sup>7</sup>Etā Er serke suluë shütë Jehová wōā. E' kuekī Jehová tō ittéwā. <sup>8</sup>Etā Judá tō iché Onán ā:

—Be' kawōtā senukwā be' dabököt tā alà kōkā be' ël blënewā e' ā wes se' wakpa ā imeneatbak es.

<sup>9</sup>Onán éna iāne tō ie' alà kurmi kos ischó tā, e' kè dör ie' wák ala'r. E' kuekī mik ie' serke ischó tā, etā bet tā ie' e' skéu bānet ās kè alà kōkā ischó tā. Es ie' kè wā iël ā iditséwō meneat. <sup>10</sup>E' dör suluë ichók Jehová ā, e' kuekī ie' tō Onán ttéwā ñies. <sup>11</sup>Etā Judá tō iché iyāk Tamar ā:

—Be' yú senuk be' yé u ā wes schó es dō mik ye' alà Selá talane etā.

Erë Judá tso' Tamar kit'ö'uk. Ie' ibikeitsé tō Selá duowami wes iëlpa duolur es. Es Tamar mineā senuk iyé ska'.

<sup>12</sup>Ká de taië tã Judá alaköl dör Súah alá busi e' blënewã. Ie' schó këwö tka tã ie' mía kã kiè Timnat, wë itso'rak ie' obeja köyök tök eë. Ie' yami kiè Hirá e' dör adulamwak, e' mí ie' tã ie' wapiöuk. <sup>13-14</sup>Tamar tö isuë tö Judá alá kiè Selá, e' detke këchke erë kè ie' senëwã ie' tã. E' wa ie' wã ijchenewã tö Judá tö ie' kitö'wë Selá wa. E' kuekî mik ie' wã ijchenewã tö inuaki mía Timnat iobeja köyök tök, etã ie' e' paiöke schóie e' mane'wëttsaneitö. Iwö pabakëwã datsi'tak wa as kè yi a iwërwa. Etã imía kã kiè Enaim. Eë ie' e' tkëser Timnat ñalé kkò a.

<sup>15</sup>Mik Judá tö Tamar suë tã ie' ibikeitsé tö e' dör alaköl sulusi iwö pabakëwã e' kuekî. <sup>16</sup>Etã ie' mía iwökî. Kè ie' wã ierî tã' tö e' dör ie' yàk. Etã ichéitö ia:

—¿Se' ser ñita?

Etã Tamar tö iché ia:

—¿Ì meke be' tö ye' a iskéie?

<sup>17</sup>Etã Judá tö iiüté:

—Ye' chibo patköke be' a etö iskéie.

Ie' iiüté:

—Èkëkë. Erë be' íyi tsá múat ye' a dò mik be' tö chibola patké etã.

<sup>18</sup>Judá tö ie' a ichaké:

—¿Ì kiane be' kî tö ye' imèat be' a?

Etã ie' tö iiüté:

—Be' tabechka tso' e' kiè shtoie, e' múat ye' a ikichaë. Ñies be' shko kéli múat ye' a.

Judá tö imé ia tã ie' sené ie' tã. Etã alaköl dunekã. <sup>19</sup>E' ukuökî tã Tamar mía iu a etã idatsi'tak wa iwö pabakëwã e' yëttsaitö. Etã ie' e' paiéne schó es.

<sup>20</sup>E' ukuökî tã Judá tö chibo patkëmi iyami adulamwak e' ulà a as ie' tö imù alaköl a as alaköl e' tö ie' íyi méat alaköl ulà a e' mùbitune. Erë ie' yami kè wã alaköl e' kuneia. <sup>21</sup>Etã ie' tö kã e' wakpa a ichaké:

—Alaköl sulusi e' dör enaimwak atéat ñalã ska', ¿wë e'?

Etã ie'pa tö iiüté:

—Íe alakölpa sulusi kè dë'.

<sup>22</sup>Etã ie' biteane Judá wörkî tã ichéitö ia:

—Kè ye' wã alaköl kune. Ye' tö ichaké kã e' wakpa a. Ie'pa tö ye' a iché: 'Íe alakölpa sulusi kè dë'.

<sup>23</sup>Judá tö iiüté:

—As ye' íyi tsúatitö es kè yi tö sa' jaëwepa. Kè ye' iane iwíie. Ye' tö ichibo patkëmi be' ulà a, erë kè be' wã alaköl kune.

<sup>24</sup>Etã si' mañat ulatök tã Judá kî biyò de tö:

—Be' yàk Tamar e' sene' wëpa kuã'kî tã. Ie' dunekã.

Etã Judá tö iché aneule:

—iIyóttsa tã ñña'úwa!

<sup>25</sup>Erë mik ie' yekettsã ie'pa tö ttëwã, e' wöshã ie' ttè mémi inuaki a: "Yi íyi a'tser ye' ulà a i', e' wák tö ye' duékã. Be' isaú. ¿Yi kiè shto tabechka i' ikichaë ena shko kéli i'? ¿e' suule be' wã?" <sup>26</sup>Mik Judá tö ie' íyi suëwã iyàk ulà a tã ichéitö: "Alaköl i' dör buaë. Kè ye' wã iulabatsë ye' alá Selá tã. Ye' e' wamblé sulu ie' kî." Etã kè ie' seneia ie' tã.

<sup>27</sup>Tamar alá kune klò wák dör wëpa. <sup>28</sup>Itsörke e' wöshã, etã eköl ulà dettsã kewe. Etã ie' kkö'nukwak tö datsi'kicha batsë e' muëwã ilà ulà mik tã ichéitö: "I' ék

kune kewe.” <sup>29</sup>Erë e' wöshaë bet ta alà ulà tiéwane etökichane eta iëk kune keweie. Eta ikk'okwak tö iché ia: “¿Wes be' kune keweie?” E' kuëki ikië mékaitö Fares. \* <sup>30</sup>E' ukuökj ta, iulà a datsi'kicha tkër batsë e' kune, e' kië mékaitö Zérah.

**José tkashkar Potifar  
alaköl ulà a**

**39** <sup>1</sup>José minetsarak iwä Egipto. Kä e' ki wëm tso' eköl kië Potifar, e' tö ie' tuëttsa Ismael aleripa a. Wëm e' kane-blöke Egipto blú a. Ie' dör Egipto blú tsatkökwakpa wökir. <sup>2</sup>Erë Jehová tso' José ta, e' kuëki ì kos kanewekeitö e' dökettsa buaë iwökir egiptowak e' ska'. <sup>3</sup>Iwökir tö isuë tö Jehová tso' José ta, e' kuëki ì kos kanewekeitö e' dökettsa buaë. <sup>4</sup>E' kuëki iwökir ki ikiarke taië. Ie' tö iméka ie' wák kimukwakie. Nies imékaitö ie' iyi kos e' kuëbluie. Ie' wä iyi kos tso' e' kk'onekeitö. <sup>5</sup>Mik Potifar tö ie' méka iyi kos kuëbluie, eta Jehová er buaë chémi Potifar a. Ie' iyi kos tso' iu a ena kañiká e' kos mir buaë. <sup>6</sup>José tö Potifar iyi ulitane kk'oneke buaë. E' kuëki Potifar kè wöki ì wëneia yës. Ì ñak ie' éna e' è bikeitsekeitö.

José wák dör bua'bluká. <sup>7</sup>Ká de iki taië eta iwökir alaköl wöbatseká iwa. Kä et ta ie' iché ia:

—Be' senúka ye' ta.

<sup>8</sup>Erë José kè wä ie' ttè iütène ta ichéitö ia:

—Ye' ttö ttsó. Ye' wökir iyi ulitane méat ye' ulà a sunoie. Ye' tso' íe,

e' ta kè ie' tkine ie' iyi kos ki. <sup>9</sup>Ye' tso' ie' u kuëblu kibiie. Ye' wökir kè wä ì kkëone ye' ki. Be' è kè meneat iwä ye' a be' dör ie' alaköl e' kuëki. ¿Wes ye' tö ì sulu i' wamblèmi be' ta? ¿Wes ye' tö ì sulu wamblèmi Skököl ki?

<sup>10</sup>Këkraë alaköl tö ie' a iche-ke: “Be' senú ye' ta.” Erë ie' kè tö iüteta' yës. Ie' tö iulawaté këkraë.

<sup>11</sup>Ká et ta ie' tkawä weshké iyi kanéuk eta iwökir alaköl e' è tkër.

<sup>12</sup>Eta iwökir alaköl tö ie' klö'wéwä idatsi' a ta ichéitö ia:

—Be' senú ye' ta.

Erë ie' tkashkar iulà a mía tüneule. Ie' datsi' yënettsaat alaköl ulà a. <sup>13</sup>Mik iwökir alaköl tö isuë tö José datsi' atë ie' ulà a <sup>14</sup>eta ie' tö ikanè mésopa kié ta ichéitö ie'pa a:

—Isaú, ye' wëm wä hebreowak dë'bitü e' tso' se' wayuök. Ie' dewä ye' ska'. Ie' senakka ye' ta kësik wa erë ye' aneká taië. <sup>15</sup>Mik ie' ittse tö ye' aneká taië ta ie' tkashkar tüneule. Ie' datsi' yënettsaat e' atë ye' ulà a.

<sup>16</sup>E' ukuökj ta ie' tö José datsi' blé kkayënoie iwëm a mik idene eta. <sup>17</sup>Mik iwëm dene, eta ipakéitö ia ta ichéitö ia:

—Be' wä hebreowak dë'bitü kanè mésoie, e' tkawä weshké ye' ska'. Ie' senakka ye' ta. <sup>18</sup>Erë mik ye' aneká taië, eta ie' tkashkar tüneule ta idatsi' atë tär íe. <sup>19</sup>Es be' kanè méso tö ye' dalösewéwä.

Mik iwökir tö ttè e' ttsé eta iluneká taië. <sup>20-21</sup>José klö'wéwaitö

\* 38.29 Fares: Hebreoie s'kië e' wä kiane chë tkabitü keweie.

wötökwa patkëitö wé Egipto blú bolökpa tso' wötëule eë. Erë Jehová tso' José kimuk s'wöto wé a ñies. Ie' er bua' chöke ia. Ie' tö s'wöto wé wökir ké er buaë chök ia. <sup>22</sup>S'wöto wé wökir tö iméka s'tso' wötërulë-wa malepa kos kuëbluie. José tö ì kos weke s'wöto wé a e' kéwö meke. <sup>23</sup>Jehová tso' José ta. Ie' tö ikimeke as ì kos döttsa buaë ie' a. E' kuëki ì kaneweke José tö e' kè sueku'ia s'wöto wé wökir tö tö is imir.

**Kabsuë böt e' wà paké José tö**

**40** <sup>1-2</sup>E' ukuökì ta wëm dör Egipto blú a vino mukwakpa e'pa kuëblu ena wëm dör blu' a pan yuökwakpa e'pa kuëblu, e'pa bül tö iblú tsiriwëka. E' kuëki ie' uluneka ie'pa kì <sup>3</sup>ta ie'pa patkëitö wötëwa ikkö'nukwakpa kuëblu e' u a s'wöto wé tso' e' a. Eë José tso' wötëule ñies. <sup>4</sup>Eta Egipto blú kkö'nukwakpa e' kuëblu tö José ké wëpa bül ñe'pa kkö'nuk. Eë ie'pa sené wötëule ká taië.

<sup>5</sup>Ká et nañewe ta ie'pa bül kabsuë kuä'ki kuä'ki. E' wà dör kuä'ki kuä'ki. <sup>6</sup>Bule es bla'mi ta José debitu isaük. Ie' tö isuë tö ie'pa eriane. <sup>7</sup>E' kuëki ie' tö ie'pa a ichaké:

—¿Iók i'ñe ta a' wö wër siar?

<sup>8</sup>Ie'pa tö iiuté:

—Sa' kabsuë, erë kè yi ku' sa' a iwà pakök.

Ie' tö iché ie'pa a:

—¿A' kè wa ijcher tö Skëköl tö s'kabsuë e' wà chëmi se' a? ¿Ima a' kabsuë? E' chö ña.

<sup>9</sup>Eta blu' a vino mukwakpa kuëblu e' tö ikabsuë paké ia ta ichéitö:

—Ye' kabsuë tö uva kicha me'r ye' wösha <sup>10</sup>e' ulà tso' mañat. E' dapëneka e' wörkua bune taië ta iwörkua míane iwóliie e' yua' tso' taië. <sup>11</sup>Egipto blú tka' a'tser ye' ulà a. E' a uvawöli diò tuéeyö. E' ukuökì ta ye' wák tö imé blu' a. Es ye' kabsuë.

<sup>12</sup>José tö iché ia:

—Be' kabsuë e' wà kiane yënuke i' es: Be' tö uva kicha ulà kébi-suë mañat. E' wà kiane yënuke ká mañat. <sup>13</sup>Ká mañat ta blu' tö be' shuleraë. Be' kané meraneitö be' a. Vino meranebö ie' a wes be' tö io' kuaë es. <sup>14</sup>Be' we'ikëyö, mik iwà tka, eta kè be' éna ye' chökwa. Ye' tté chö blu' a as itö ye' yöttsa ië. iBe' er buaë chö ye' a! <sup>15</sup>Ye' dör hebreowak e' ekiblë'wabitu ie'pa tö. Ye' kè wa ì sulu wamblëne. Ye' tso' wötëule é.

<sup>16</sup>Mik blu' pan yuökwakpa kuëblu e' tö isuë tö José tö iyami kabsuë e' wà paké ta idettsa buaë eta ie' tö ie' icha paké ia ñies. Ie' iché:

—Ye' kabsuë tö ye' wa kkó dami mañal ye' wökir kì, e' a pan saruru dami. <sup>17</sup>Kkó tkër kákke ék e' a pan dami blu' a daklili. Erë pan dami ye' wa kkó a ye' wökir kì e' ñeke dù tö.

<sup>18</sup>Eta José tö iché ie' a:

—Be' kabsuë e' wà kiane yënuke i' es: kkó mañal e' dör ká mañat. <sup>19</sup>E' wà kiane chë tö ká mañat ta blu' tö be' kuli' tökök patkeraë, ta be' nu kichatkeraka kal ulà a. Dù tö be' nu katerawa.

<sup>20</sup>Ká de mañat ta blu' tö idués-wö tkö'wé chkè wa di'yè wa taië

ikuēblupa ulitane kanēblöke ie' a e'pa a. E' shuā ie' tö ivino mukwakpa kuēblu ena ipan yuökwakpa kuēblu e'pa böł tsukbitu patké s'wöto wé a ikuēblupa ulitane wörki. <sup>21</sup>Vino mukwakpa kuēblu e' a ikané méneitö. Ie' tö blu' a itka' méne wes kuaë es. <sup>22</sup>Erë pan yuökwakpa kuēblu, e' patkémi nu kichatkèka wes José tö iyë' es. <sup>23</sup>Erë vino mukwakpa kuēblu e' kè er aneĩa José ska'.

**Egipto blú kabsué bötkicha e' wà paké José tö**

**41** <sup>1</sup>Duas de bök, e' ukuöki ta Egipto blú kabsué tö ie' dur di' kiè Nilo e' kkömik. <sup>2</sup>Ie' isuë tö baka deyal di' a kuktö. E' dör baka bua'buä jani'janila. E' iëter chkök kuachka shuā. <sup>3</sup>E' itöki baka skà deyal kuktö di' a. Erë e' dör suluë sí sulula. E' míyal di' kkömik baka malè o'mik. <sup>4</sup>Eta baka sí sulula kuktö, e' tö baka bua'buä kuktö e' katélur.

Eë ta blu' ti'neka. <sup>5</sup>E' ukuöki ta bet ie' kapowane ta ikabsuëne tö i talarke kuò sù kiè trigo e' klò elka è a ila'k deka kul. Ila'k e' dör bua'buä iwö blubluë. <sup>6</sup>E' itöki iskà tskine e' klò elka è a ila'k deka kul ñies, erë sulula idir. Siwa' datse diwö tskirke e' kke e' tö isiwéwa ña'wéwa suluë mía wö yabé è. <sup>7</sup>Eta ila'k kul siulewa sulu e' tö ila'k bua'buä katélur seraa.

Blu' ti'neka ta iëna iane tö ie' kabsauke moki. <sup>8</sup>Erë bule es bla'mi ta ie' kabsué e' tö ie' eriawéka. E' kueki ie' tö Egipto iyi tötkökwakpa ena iyi jcher taië ese wakpa, kos

tsuk patké. Ie' kabsué e' pakéitö ie'pa a. Erë ie'pa ulitane kè a ie' kabsué e' wà ane. <sup>9</sup>Eta vino mukwakpa kuēblu e' tö iché blu' a:

—A blu', erpa ye' éna idaā tö sulu ye' e' wamblé. <sup>10</sup>Mik be' uluneka taië be' pan yuökwakpa kuēblu ki ena ye' ki, eta be' tö sa' wötökwa patké' be' kkö'nukwakpa kuēblu e' wé a. <sup>11</sup>Ká et nañewe ta pan yuökwakpa kuēblu kabsué. Ye' kabsué ñies. Sa' kabsué e' wà ta' ulawa ulawa. <sup>12</sup>Eë wëm dur eköl dula-dula hebreowak, e' dör s'wöto wé wökir e' kané méso. Ie' a sa' tö sa' kabsué e' paké ta ie' tö iwà ché sa' a. <sup>13</sup>Iwamblëne yësyësë wes ie' tö sa' a iyë' es! Ye' dene ye' kané a ta iëköl nu kichatkéka kal ulà a.

<sup>14</sup>Eta blu' tö José tsuk patké ta iyëttsarakitö bet s'wöto wé a. José tsà téé buä, e' paié buä, ta ide ie'pa wa blu' wörki. <sup>15</sup>Blú tö iché ia:

—Ye' kabsué erë kè yi éna iwà ane. Erë ie'pa tö iché ye' a tö buä be' tö s'kabsuë e' wà pakè.

<sup>16</sup>Ie' tö iiüté:

—A këkëpa e' kè yënuke ye' a. Erë Skëköl tö e' chëmi be' a be' kimoie.

<sup>17</sup>Blu' tö iché ia:

—Ye' kabsué tö ye' dur di' kiè Nilo e' kkömik. <sup>18</sup>Ye' isuë tö baka deyal di' a kuktö. E' dör baka bua'buä jani'janila. E' iëter chkök kuachka shuā. <sup>19</sup>E' itöki baka skà deyal di' a kuktö. Erë e' dör suluë sí pola. iKè ye' wa baka suule sí poë suluë ká i' a ekkë chökle! <sup>20</sup>Eta baka sí sulula kuktö, e' tö baka bua'buä kuktö e' katélur. <sup>21</sup>Baka sí suluë e' tö baka bua'buä katélur

erë kè iwër tö ikatélur. Itso'ia sí poë wës kenet es.

“Eë ta ye' ti'neka. <sup>22</sup>Etä bet ye' skà kapowane ta ye' skà kabsuëne tö ì talarke kuò sù e' klò elka è a ila'k deka kul. Ila'k e' dör bua'buäe iwö blubluë. <sup>23</sup>E' itöki iskà tskine e' klò elka è a ila'k deka kul ñies. Erë e' ala'k dör sulula. Siwä' datse diwö tskirke e' kke e' tö isiwéwa ña'wéwa suluë míä wö yabé è. <sup>24</sup>Etä ila'k kul siulewä sulu e' tö ila'k bua'buä katélur sëraa. E' kos pakéyö s'tötkökwakpa a erë ie'pa shüa kè yi a iwà ane yës.”

<sup>25</sup>Etä José tö blu' iüté:

—A këkëpa, be' kabsuë bötökicha, e' wà dör etkè. Ì wëraë Skëköl tö kukuie e' chök ie' tso' be' a kabsuë a kam iwà tkò e' yöki. <sup>26</sup>Baka bua'buäe ena ala'k bua'buäe e' wà dör etkè, e' dör duas kul. <sup>27</sup>Baka sulula sí poë deka ibua'buäe itöki ena ala'k suluë siulewä siwä' wä, e' wà dör etkè. E' dör duas kul skà. E' duéswö wa ketba ardaë s'ki dò duas kul e'. <sup>28</sup>Ì wëraë Skëköl tö kukuie e' chök ie' tso' be' a wës ye' tö be' a ichétke es. <sup>29</sup>Kewe dali wördaë taië Egipto kos a döka duas kul. <sup>30</sup>E' ukuöki ta duas skà datskene kul e' dör ketba taië duéswö. Bli e' tö Egipto kos sulu'wërawä. E' kuëki duas kul buäe e' a dali wöne taië e' kè arpaia yi éna. <sup>31</sup>Bli ardaë taië darërë, e' kuëki dali wönebak taië e' peli kè wërpaia yës. <sup>32</sup>A këkëpa, be' kabsuë bötökicha, e' wà kiane chë tö Skëköl tö iwëraë mokië. Bli döraë se' ki bet.

<sup>33</sup>A këkëpa, be' kawöta wëm yulök eköl erbikò buäe wä íyi

jcher taië ese. E' múka ká kuëbluie.

<sup>34</sup>Ikaneú i' es: wëpa yuló as ie'pa mi' Egipto kos a daliwö kak blök daliwö tso' taië duas kul e' dalewa. Mik daliwö tso' döka saco skel etä ikió ia sacco et blënoie ketba yöki. <sup>35</sup>Ie'pa a ichó tö daliwö ñe' kos dapa'ú bänet bänet ká tso' kos Egipto e' a. E' kkö'nuk patkó be' wák tö sulitane tioie. <sup>36</sup>Es daliwö blërdaë a' wakpa ulitane a as ie'pa kè ttò ketba tö mik ketba duéswö de s'ki etä.

### José yöne Egipto wökirie

<sup>37</sup>Ì ché José tö ie' a e' mène buäe ie' a ena ikuëblupa kos e'pa a. <sup>38</sup>E' kuëki ie' tö iché ie'pa a:

—Wëm i' a Skëköl Wiköl tso'. Kè se' a wëm skà kurpa wës ie' es.

<sup>39</sup>Etä ie' tö iché José a:

—Skëköl tö íyi ulitane ikkè e' kkaché be' a. E' kuëki be' erbikò buäe, be' wä íyi jcher taië sulitane tsata. <sup>40</sup>Be' tkekekayö ye' ká kos e' wökirie. Sa' wakpa kos tö be' ttò dalöieraë. Ye' eköl è dör kibiie be' tsata, ye' dör blu' e' kuëki. <sup>41</sup>Ìñe ye' tö ichè tö be' dör Egipto wökir kibi. <sup>42</sup>Etä blu' tö iulatsio tso' iwa ikka shtioie, e' yéttsä iéwä José ulatska a. José paiéraitö datsi' bua'buä ese wa. Ñies bulë dör oro ese iéwaitö José kuli' a et. <sup>43</sup>E' ukuöki ta ie' tö José ké e' tkökka shkök karreta shköke ie' karreta itöki e' ki. Ie' tö ie'pa wëlepa patkëmi kewe ichök pë' a aneule: “iA' e' skó! iKawö mú se' wökir kibi datse as e' tkömi!” Es ie' tö José yué Egipto wa'ñe e' wökirie.

<sup>44</sup>Etä blu' tö iché José a:

—Ye' dör Egipto blú erë kè yi a i onuk ká i' kī, be' kè wā ikéwō mène e' tā.

<sup>45</sup>Ie' tò José kiè mékã Safe-nat-panéah egiptowak ttò wa. Ie' tò tayè kiè Asenat e' mé José a senowáie. E' dör wëm kiè Potifera e' alá busi. Potifera dör egiptowak sacerdote\* eköl. Ie' kanēblöke ká kiè On eē. Es José atē Egipto wañe e' wökirie. <sup>46</sup>Mik ie'pa wā José dē'bitū blu' ska', e' kéwō ska' tā ie' kī duas tso' dabom mañayök (30).

José e' chéat blu' a tā imítke ikaneuk Egipto kōs a. <sup>47</sup>Duas kul tsá shuā dali wöne taijē shütē. <sup>48</sup>Daliwö e' kōs kak dapa'wé José tò tā ibléitö ká wañe. Wé dali e' wöne ese wakpa ká a ibléat u tso' daliwö blóie ese a. Es ibléitö ká ulitane tso' Egipto e' a. <sup>49</sup>Ie' tò daliwö dapa'wé taijē wēs dayē tséwö kè ishtar es. E' kuēkī ie' kè wā ishtaneia.

<sup>50</sup>Ketba kéwō kam döwā e' yöki José alaköl kiè Asenat, e' alá kune böl wēpa. <sup>51</sup>Mik ilà tsá kune, etā José tò iché: “Skököl tò ye' bak erianuk ena ye' yamipa e' kōs chöwéwa ye' éna.” E' kuēkī ikié mékãitö Manasés.\* <sup>52</sup>Mik ilà ská kune, etā ie' iché: “Skököl tò ye' a alá mé ká wé kī ye' bak weinuk taijē eē.” E' kuēkī ikié mékãitö Efraín.\*

<sup>53</sup>Duas kul dali wöne taijē Egipto e' tka. <sup>54</sup>E' ukuökī tā duas kul ská

debitū e' dör ketba poë duéswö wēs José tò iyè' es. Ketba de ká wañe erë Egipto kōs a chkewö tso'. <sup>55</sup>Mik Egipto wakpa tekette ketba tò, etā ie'pa míã iblú a chkewö kiök. Ie' tò iché iarak: “A' yú José ska' tā i kōs chéitö a' a e' wā iütö.”

<sup>56</sup>Mik ketba de ká wañe, etā José tò dali tso' bléule iwé a e' kōs kköppée chkewö watuō Egipto wakpa a. Ketba kī datse taijē shütē. <sup>57</sup>Ká ulitane wakpa a kè i ku'ia katanoie, e' kuēkī ie'pa de Egipto chkewö tauk José ska'.

### José ëlpa míã Egipto

**42** <sup>1</sup>Mik Jacob wā ijchenewā tò chkewö tso' Egipto watuē, etā ila'r a ichéitö: “¿Iók a' iëter ñi sauk è? <sup>2</sup>Ye' a iyène tò chkewö tso' Egipto. A' yú eē chke-wö tauk as kè se' duölur ketba wā.”

<sup>3</sup>Etā José ëlpa döka dabop, e'pa míyal Egipto chkewö tauk. <sup>4</sup>Erë Jacob kè wā ilà Benjamín, e' dör José ël táie imi wa, e' patkënemi iëlpa tā ie' ibikeitsé dö' i tkö itā ñalā kī. <sup>5</sup>Ketba tso' taijē Canaán e' kuēkī taijē Canaánwakpa míyal chkewö tauk Egipto. Esepa shuā Jacob ala'r mirwarak chkewö tauk ñies.

<sup>6</sup>José dör Egipto ká kuēblu. Ie' tò chkewö watuēke sulitane datse itauk e'pa a. Mik iëlpa demi iwörki, etā ie'pa wöéwa dö iski ie' dalöiök. <sup>7</sup>Ie' tò ie'pa suéwā bet tò ie'pa dör

\* 41.45 *sacerdote*: Sacerdote i' kè dör wēs iñe itso' es. E' skéie ie'pa dör egiptowakpa siwā' e' wā kaneukwakpa.

\* 41.51 *Manasés*: Hebreoie s'kiè e' wā kiane ché ichöwéwa ye' éna.

\* 41.52 *Efraín*: Hebreoie s'kiè e' wā kiane ché alá kéka ö dali wör.



iëlpa. Erë ie' e' éwa iyöki wës kè ie' wä isuule es. Kè ie' e' kkayënewä ie'pa a' tö ie' dör ie'pa ël. Etä ie' tö iëlpa chaké kësik wa:

—¿Wé a' sekkëpa bitë?

Ie'pa tö iüté:

—Sa' bitë Canaán chkewö tawk be' ska'.

<sup>8</sup>Ie' tö ie'pa suéwä, erë ie'pa kè wä ie' sunewä. <sup>9</sup>Ie' tö iëlpa këbisü' e' anewä ie' éna. Ie' tö iché ie'pa a':

—A' dör sa' bolökpa datse sa' sawk tö wës a' döwami ñippök sa' tã e' aloka sa' ki.

<sup>10</sup>Ie'pa iüté:

—A kékëpa, e' kè dör es. Sa' kè dör a' bolökpa. Sa' debitu chkewö è tawk.

<sup>11</sup>Sa' qos i' e' yé dör eköl è. Sa' serke buaë yësyesë. Kè sa' dör yi bolökpa.

<sup>12</sup>Ie' tö ichéne ie'pa a':

—Au. A' sekkë tso' kachök. A' datse sa' kã sawk tö wës a' döwami ñippök sa' tã e' aloka sa' ki.

<sup>13</sup>Erë ie'pa tö iüté:

—Sa' tso' be' wörki wës be' kanè mésopa es. Sa' döka dabom eyök ki böl (12). Sa' yé dör eköl è. Sa' serke Canaán. Sa' ël tsirla ék e' atë sa' yé tã. Iëköl blënewatke.

<sup>14</sup>Erë ie' tö iskà chënerakia:

—Ye' ichétke tö a' dör sa' bolökpa.

<sup>15</sup>Egipto blú ttò wa yö ichè a' a' tö a' kè wä a' ël tsirla e' dë' ië, e' tã a' kè mi'pa kã i' ki. Es ye' isuëmi tö a' ttò mokì. <sup>16</sup>A' eköl yú a' tsirla tsukbitü. A' malepa atë wötëule. Es ye' wä ijchermi tö a' ttöke e' dör mokì. E' kè yëne, e' tã a' dör sa' bolökpa. E' chéyö Egipto blú ttò wa.

<sup>17</sup>Ie' tö ie'pa wötëwä sekkã döka kã mañat. <sup>18</sup>Kã de mañat etä ie' tö iché iarak:

—Ye' tö Skëköl dalötsetã'ka. I cheke ye' tö a' a' e' ú, e' tã ye' kè tö a' ttökwa patkepa. <sup>19</sup>Yëne tö a' dör wëpa ttò mokì ese, e' tã a' eköl múat wötëule. A' malepa yúne, chkewö tsúmi a' yamipa tteke ketba tö e'pa a'. <sup>20</sup>E' ukuökì tã a' ël tsirla e' tsúbitü ye' a' suë. Es ye' tö isuëmi tö a' ttöke e' dör mokì. E' kè dör es, etä a' duöralur.

Etä ie'pa tö iché: “E' dör buaë sa' a'.” <sup>21</sup>Etä ichërakitö ñi a':

—Mokië se' e' wamblë' suluë se' ël José tã. Mik ie' kköyë' taië se' a' tö i' sulu kè wamblar ie' ki eré se' isü' tö taië ie' eriane, erë kè e' ska' se' tkine. E' nuí ki se' weirke i'ñe.

<sup>22</sup>Etä Rubén tö iüté:

—Ye' tö iyë' a' a': “Kè i' wamblar José ki.” Erë a' kè wä ye' ttò iütëne. E' kuëki i'ñe tã se' kawötã idu'wä e' nuí patauk.

<sup>23</sup>José ttöke iëlpa tã egiptowak ttò wa e' pakekene o'ka tö ie'pa a' iwakpa ttò wa. E' kuëki ie'pa kè wä ijcher tö ie'pa ttöke e' ane ie' éna.

<sup>24</sup>Mik ie' tö ie'pa ttöke e' ttsé, etä ie' e' skëttsã miã bänet iuk. Mik ie' er dekane ttoie, etä ie' dene ie'pa ska'. Ie' tö Simeón yöktsã patké tã ipayuëwarakitö iëlpa wörki.

<sup>25</sup>E' ukuökì tã ie' tö ikanè mésopa patké iëlpa sku' wä iök chkewö wa. Ñies ichëtö iarak: “Ie'pa chkewö e' ské iöwä iwakpa bil ekkë sku' a'. Ñies chkë bakömirakia ñè ñalã ki.” Etä ie'pa tö iwé wës ie' tö iché iarak es. <sup>26</sup>E' ukuökì tã ie'pa tö ichkewö mékã iburro ki tã imíyal.

<sup>27</sup>Mik ie'pa demi ñalã ki wé ie'pa kapökerö eë etä ie'pa eköl tö isku' a' burro chkö tso' e' kkö

wöttsée iburro tioie tã isué tö inuköl àr sku' shuã. <sup>28</sup>Ie' tö iché iëlpa a:

—iIsaú! Ye' inuköl mébitune ie'pa tö e' àr sku' a.

Ie'pa ulitane suane tajë eriane tajë. Ichéraitö ñi a:

—¿I wamblök Skéköl tso' se' tã?

<sup>29</sup>Mik ie'pa demine Canaán, etã ì tka ie'pa tã Egipto e' kôs pakéraitö iyé a. Ie'pa tö iché ia:

<sup>30</sup>—Kã e' wökir e' tté sa' tã kësik wa. Ie' tö iché tö sa' dör ie'pa bolökpa. <sup>31</sup>Sa' tö iché ia: “Sa' serke buaë. Kè sa' dör yi bolökpa. <sup>32</sup>Sa' dökã dabom eyök ki böl. Sa' yé dör eköl è. Sa' èl eköl blénewatke, iéköl até sa' yé tã Canaán.” <sup>33</sup>Etã ie' tö sa' iüté: “A' ttò mokì, e' tã a' èl eköl e' múat ië ye' ska' etã chkwö tsúmi a' yamipa a. <sup>34</sup>Erë a' èl tsirla ék e' tsúbitu ña suè. Es ye' wã ijchermi tö a' ttò mokì. A' tö iwé es, e' tã ye' tö a' èl èmimine. Ñies a' íyi tuèmi bua' sa' kã i' ki.”

<sup>35</sup>Mik José ëlpa tso' isku' wakkauk, etã ie'pa isué sku' a inuköl deyal parratulewã. Mik e' sué, etã ie'pa tkirulune iyé ñies. <sup>36</sup>Jacob tö iché iarak:

—A' tso' ye' mukat alà kè tã'. José blénewã se' yöki. Simeón ñies, kè ku' se' tã. I' tã Benjamín kiane tsèmi a' ki daré wa. Këkraë ye' weirke.

<sup>37</sup>Rubén tö iché iyé a:

—Benjamín múmi ye' a. Ye' tö ikkö'neraë buaë. Ye' wã idörane be' a. Ye' kè wã idè'ne, e' tã ye' alà böl e' ttólur.

<sup>38</sup>Ie' tö iüté:

—Ye' alà kè mîne a' tã. Iël José du'wã tã ie' è dawãia. Dö'~ì sulu

tkò ie' tã ñalã ki, e' tã kékëla i' duömiwã ilà dalërmik tã a' iane iwiie.

### Benjamín ëlpa wã imítser Egipto

**43** <sup>1</sup>Ketba tkëneia darë-rë Canaán. <sup>2</sup>Chkwö dë'biturak iwã Egipto, e' enewa. Etã Jacob tö iché ila'r a:

—A' yúne chkwö skà tãuk se' a.

<sup>3</sup>Erë Judá tö iüté:

—Wëm tso' eë e' tö iyé' sa' a yësyësë: “A' kè wã a' èl tsirla dè' ië, e' tã a' kè tö ye' suepa.” <sup>4</sup>Be' tö sa' èl tsirla émi sa' tã, e' tã sa' mi'mi chkwö tãuk be' a. <sup>5</sup>Erë be' kè tö ièmi sa' tã, e' tã kè sa' mîne. Wëm e' tö sa' a' iché: “A' kè wã a' èl tsirla dè' ië, e' tã kè a' tö ye' suepa.”

<sup>6</sup>Jacob tö iüté:

—¿Iök a' tö ì sulu wambleke tajë ye' ki? ¿Iök a' tö iché wëm e' a' tö a' èl skà tso'ia eköl?

<sup>7</sup>Ie'pa tö iüté:

—Wëm e' tö sa' chakéwaie daré wa: “¿A' yé tso'ia ttsë'ka? ¿A' èl skà tso'?” Kè wës sa' a' ionukia. Sa' kawõtã iütök yësyësë. Sa' kè wã ijcher tö wëm e' tö sa' a' ichémi: “A' èl tsúbitu ye' a' suè.”

<sup>8</sup>Judá tö iché ie' a:

—Se' senakia, e' tã be' alà ómi ye' tã. Ye' tö ikkö'neraë. Es be' ena sa' ena se' ala'r kôs kè duöpalur ketba wã. <sup>9</sup>Ye' e' chò ie' skéie. Ì de wës ie' tã, e' nuí tueraëyö. Ye' kè wã ie' dè'ne be' ska', e' tã ye' iane iwiie këkraë. <sup>10</sup>Kè sö kawö chöuk tajë. Warma i' tã sa' daretke bötökicha.

<sup>11</sup>Iyé tö iüté:

—E'ma kè wës ionuk. A' tö iú i' es: A' sku' a' íyi bua'bu' tso' se' kã

a, ese kak tsúmi wëm e' a. Bálsamo elkela ena bul alí elkela ena kiò masmas ena mirra ena kalwò wödalo katanoie ese kòs kak tsúmi ia elkela. <sup>12</sup>Ñies inuköl tsúmi ia jaishet döka bötökicha. Wé a' wá idè'ne e' tsúmíne múne ia a' wák ulawa dö' ie' wöa ká chë'wa. <sup>13</sup>A' yúne wëm e' ska'. Alà tsúmi. <sup>14</sup>Skököl Diché Ta' Íyi Ulitane Tsata e' a ikiéyö as wëm ñe' tö a' saü er siarë wa ta imú tö be' èl ena Benjamín óbitune. Ye' atë alà kè ta', erë zwes ye' e' ümiiä?

<sup>15</sup>Eta Jacob ala'r tö íyi kak ié, ñies inuköl ié jaishet döka bötökicha. Ñies Benjamín mírak iwá ta imíyal. Mik idemirak José ska' <sup>16</sup>eta ie' isué tö Benjamín debitü ie'pa wá. Ie' tö iché iu kuëblu a:

—Wëpa wíkkë tsúmi ye' u a. Be' yú baka ttökwá elka e' kaneú se' a. Ie'pa chköke i'ñe ye' ta dibata a.

<sup>17</sup>Eta iu kuëblu tö iwakanewé wes ichéitö ia es. Imítserak iwá e' ta José u a. <sup>18</sup>Erë tajë ie'pa tkine-wá imítserak iwá José u a e' kuëki. Ie'pa ttöramirak ñita: Ie'pa tso' se' kítö'uk. Ie'pa tö inuköl ië'mi se' sku' a e' nuí tkëne se' mik. E' nuí kuëki ie'pa tö se' klö'werawa kanëblök ie'pa a kanè mésopaie kè patuè ta' ese. Ñies se' iyiwak klö'werawarakitö nuí ki.

<sup>19</sup>Mik ie'pa demi u wékkö a, eta ie'pa de tsinet u kuëblu wörki <sup>20</sup>ta ichéraitö ia:

—A kékëpa, suköt sa' dë' ië chke-wö taük. <sup>21</sup>Erë sa' dë'mi wé sa' kapökerö eë ta sa' sku' kòs kkò wöttsée ta e' a kòs sa' tö chkewö to' e' inuköl kuéne sa' tö seraä. E'

debitune sa' wá mène. <sup>22</sup>Ñies sa' wá inuköl skà de chkewö kí tuoie. Erë kè sa' wá ijcher yi tö sa' inuköl ië'kane sa' sku' a.

<sup>23</sup>U kuëblu tö iiüté:

—Kè a' tkinuk. Kè a' suanuk. Ye' tö a' chkewö pato' e' inuköl klöo'. A' Këköl dör a' yé Këköl ñies, e' tö inuköl e' ië'wá a' sku' a.

E' ukuöki ta ie' tö Simeón yéttsa tsémi wé iëlpa tso' eë. <sup>24</sup>E' ukuökí ta imítserak iwá seraä José u a. Eta di' méitö iarak klö skuoie. Ñies iburro tiéraitö. <sup>25</sup>Ie'pa wá ijchenewá tö eë ie'pa chköke José ta dibata a. E' kuëki ie'pa wá íyi kak de ie' a e' dapa'wérakitö mè ie' a.

<sup>26</sup>Mik ie' dewá weshkë, eta ie'pa wá íyi kak de e' mé ia. Ie'pa wöéwaie dö iski idalöiök. <sup>27</sup>Ie' tö ie'pa shkë'wé ta ichakéitö:

—A' yé de kékëpalatke yë' a' tö ye' a suköt zis e' tso'? zIdobyërkeia?

<sup>28</sup>Ie'pa skà wöéwane dö iski ta ichéitö:

—A kékëpa, tó, sa' yé tso' buaë. Ie' dobyërkeia.

<sup>29</sup>Eta José ká sué ipamik shkit, ta Benjamín dör iël ekka imi wa ena iyé wa e' suéitö. Eta ichéitö ie'pa a:

—A' èl tsirla yë' a' tö zé' dör wí?

Ie' tö iché Benjamín a:

—A alà, Skököl er buaë chò be' a. <sup>30</sup>Ie' tö iël suéwá e' tö ie' ttsë'wé buaë ta ie' iakká. Bet ta ie' e' ské-ttsa míá wé ikapöke eë iük. <sup>31</sup>Mik ie' ié one ta ier pablëne ta iwö skuée ta imíane iëlpa skà ta ichéitö: “Chkò watió bet.”

<sup>32</sup>José tiéraitö bánet. Iëlpa tiéraitö bánet. Egiptowak chköke

José u a e'pa tiérakitö bänet ñies. Hebreowak dör ñá egiptowak a e' kuëki ie'pa kè a kawö ta' chkök ie'pa ta ñita. <sup>33</sup>José tö ie'pa tulök-wa patké chkök ñi o'mik wes duas tso' iki es dö ibataë. Ie'pa tö ibikeitsé: “¿Wes ie'pa wa se' duéswö jcher?” E' kuëki ie'pa tkinewa tajë ta ñi suëka. <sup>34</sup>Ie'pa dëne chkè tso' José mesa ki e' wa. Es iméitö ulitane a. Erë Benjamín a chkè méitö kibiie dökä sketökicha iëlpa dëne e' tsata. Ie'pa chké tajë blo'yé José ta ttsë'ne buaë.

#### José tka' tso' iwa wayè

**44** <sup>1</sup>E' ukuöki ta iu kuëblu kiére José tö ta ichéitö ia:

—Ie'pa sku' qos wà iókä chië chkewö wa. Ñies ie'pa inuköl iókane isku' qos kkò ki. <sup>2</sup>Ñies ye' tka' yöule inukölchka wa tso' ye' wa wayè e' iókä ie'pa ël tsirla e' sku' kkò ki, inuköl chkewö patuq e' ta ñita.

Etä u kuëblu tö iwakanewé wes José tö iché ia es. <sup>3</sup>Bule es bla'mi diwö tschine ta José tö iëlpa a kawö mé shkökne iu a iburroë. <sup>4</sup>Kam ie'pa dömi kamië, etä ie' tö iché iu kuëblu a:

—Be' yú ie'pa itöki. Mik be' ikué, etä ichö ia: ‘Ye' e' wé buaë a' ta, ¿iök a' e' wamblé sulu ye' ki? ¿Iök a' tö ye' wökir tka' yöule inukölchka wa, <sup>5</sup>e' dör wayè ena iyi tötkoie, e' bléwabitu a' tö? A' e' wamblé suluë.’

<sup>6</sup>Mik ie' ikuérak, etä ichéitö wes iwökir tö iché ia es. <sup>7</sup>Etä ie'pa tö iiuté:

—¿Iök be' tö ttè e' ché sa' a es? Kè ekké chók sa' e' wamblöpa.

<sup>8</sup>Sa' bite Canaán tkörö ië inuköl mine sa' sku' a e' mukne. ¿Wes be' ibikeitsèmi tö sa' tö inukölchka ö orochka e' bléwami be' wökir u a? <sup>9</sup>Sa' sku' shuyulö. Yi icha a ikuébö, as e' wák duöwa. Sa' malepa atë be' kanè mésopaie.

<sup>10</sup>Ie' tö iché ie'pa a:

—Iwà tköraë wes a' tö iché es. Erë wé ék sku' a ikunewa e' è döraë ye' kanè mésoie. A' malepa kè iane iwiie. A' mi'mine buaë.

<sup>11</sup>E' bet ie'pa ulitane tö isku' éwa iski ta ikkò wöttsélor. <sup>12</sup>U kuëblu tö sku' shuyulérak ikibi ék kewe dö itsirla Benjamín ska'. Etä Benjamín sku' kkò a tka' àr. <sup>13</sup>Ie'pa datsi' jchélor eriane tajë kuëki. Ie'pa dalì payuéne burro ki ta ibiteyalne José ska'. <sup>14</sup>Mik Judá ena iëlpa demine José ska', etä José duriä. Ie'pa wöéwa iski iwörki.

<sup>15</sup>E' dalewa ie' tö iché iarak:

—¿Iök a' e' wamblö es? ¿A' kè wa ijcher tö wëm dör wes ye' es, e' s'tötkè buaë?

<sup>16</sup>Judá tö iiuté:

—¿Ima sa' tö be' iütèmi? ¿I wa sa' tö be' a ikkachèmi tö sa' kè wa i sulu wamblène? I wamblèule sulu sa' wa e' sué Skököl tö. I' sa' iëter be' wörki. Sa' klö'ú be' kanè mésoie. Yi sku' a be' tka' kune e' klö'ú ñies.

<sup>17</sup>Erë ie' tö iiuté:

—Kè ye' a e' wamblèuk es. Yi sku' a ye' tka' kune, e' è atë ye' kanè mésoie. A' malepa mi'mine buaë a' yé ska'. Kè yi tö a' tsiriwepa.

#### Judá kköché siarla Benjamín dalërmik

<sup>18</sup>Etä Judá debitu José wörki tsinet, etä ichéitö ia:

—A këkëpa, be' we'ikèyö, mishka ttök se' böl è. Be' dalò dör wes Egipto blú dalò es e' kuëki kè be' ulunuk ye' ki. <sup>19</sup>Be' tö sa' a ichaki' tö sa' yé ta', sa' èl skà ta'. <sup>20</sup>Sa' tö be' iütè' tó, sa' yé ta' këkëpalatke, ñies sa' èl ta' eköl ià duladula. E' kune mik sa' yé kënewatke eta. Sa' be' a iyè' tö sa' yé ki tajë ilà tsirla ék kiar. Alà e' è atéat imi a. Ie' èl blënewa. <sup>21</sup>Be' tö sa' a iyè' tö alà e' tsúbitu suèyö. <sup>22</sup>Sa' tö be' a iyè' tö kè ie' dõpa. Kè ie' a iyé menukat ekõrla. Mik ie' tö iyé méat eköl, eta iyé duöwami ie' dalërmik. <sup>23</sup>Erë be' sa' a iyè' tö sa' kè wà ie' dè', e' ta be' kè sa' kiepawa.

<sup>24</sup>“Mik sa' dè'mine sa' yé wörki, eta ì kos yè' be' tö sa' a, e' paké sa' tö ie' a. <sup>25</sup>Ie' tö sa' a iché: ‘A' yúne chkewö taük.’ <sup>26</sup>Erë sa' tö iüté: ‘Sa' kawõtá sa' èl tsirla tsukmi. Sa' kè wà ie' mîne, e' ta wëm e' kè tö sa' kiepawa.’ <sup>27</sup>Ie' tö sa' iüté: ‘A' wà ijcher buaë tö ye' alaköl e' tö ye' a alà mé böl è. <sup>28</sup>Iaiaë eköl minea ye' yöki, kè ye' wà isuneia. Ye' ikl'wé tö ie' kötwa iyiwak sulusi tö. <sup>29</sup>A' wà ye' alà bata i' mítser ta ì sulu tka ie' ta ñalá wa, e' ta wö'kela i' duörawa eriar è wà. Itka es, e' ta a' iane iwiie.’

<sup>30-31</sup>“Sa' yé éna ilà dalër tajë. E' kuëki sa' demine ie' ska', erë ie' isué tö ilà tsirla kè dè'ne sa' wà, e' ta ie' duörawa eriar è wà. E' wiie sa' iardaë. <sup>32</sup>Ye' tö ye' yé a iyè': ‘Ye' e' chò be' alà tsirla kkö'nuk. Ye' kè wà idè'ne, e' ta ye' iane iwiie këkraë.’ <sup>33</sup>E' kuëki ye' kköchò be' a tö ye' tsúat be' kanè mésoie, alà tsirla skéie. Ie' ómi as imi' iëlpa ta. <sup>34</sup>Alà

tsirla kè minene ye' ta, e' ta ¿wes ye' mi'mine ye' yé ska'? Ye' kè ki ye' yé kiane suè weinuk siarè.”

### José e' chéka iëlpa a

**45** <sup>1</sup>José kè a iwöklöneia ikanè mésopa ulitane tso' kanëblök ee e'pa wörki. E' kuëki ie' tö iché ie'pa a aneule: “A' kos yúshka bánet. Sa' múat sa' wakpa è.” Es mik José e' chéka iëlpa a, eta ikanè mésopa kè ku' yës ie' ta.

<sup>2</sup>Etá ie' iéka tajë, e' ttsé Egipto wakpa tö. Egipto blú a itté demi tö José tso' iük. <sup>3</sup>José tö iché iëlpa a:

—Ye' dör José. ¿Se' yé tso'ia ttsè'ka?

Ie'pa tkirulune tajë suane José yöki, e' kuëki kè ie'pa a ie' iütëneia. <sup>4</sup>José tö iché ie'pa a:

—A' shkówa tsinet ye' o'mik.

Mik ie'pa e' skéwa tsinet, eta ie' tö iché ie'pa a:

—Ye' dör a' èl José watot'tsa a' tö tsèmi Egipto e'. <sup>5</sup>Skëköl tö ye' patkè'bitu ie a' yöki kewe s'tsatkoie ketba ulà a. E' kuëki kè a' erianuk, kè a' tkinuk ye' watot'tsa a' tö e' kuëki. <sup>6</sup>Ketba de e' ki duas de bök. Etá duas skël kianeia. E' shua iyi kos kuatkëmisö erë kè itskirpa yës. <sup>7</sup>Erë Skëköl tö ye' patkè'bitu ká i' ki a' yöki kewe as a' aleripa kè erwa as Skëköl tö a' tsatkò ie' diché tajë e' wa. <sup>8</sup>Es Skëköl wák tö ye' patkè'bitu ie, e' kè dör a' ye' watot'tsa e' kuëki. Skëköl tö ye' méka Egipto blú pattökwakie. Ye' dör ie' u kuëblu ena Egipto wa'ñe wökir. <sup>9</sup>A' yúne bet ye' yé ska' ta ichó ia: ‘Be' alà José ttè i' patkébitu be' a: Skëköl tö ye' méka Egipto

ká kōs, e' wōkirie. Be' shkō ye' sauk bet. Kè bö ipanuk tajë. <sup>10</sup>Be' serdaë ká kiè Gosen ee be' yamipa kōs ta, ñies be' iyiwak kōs ena ì kōs tso' be' wā ekkē ta. <sup>11</sup>Ketba duéswō kianeia skel. E' kuëki ye' tö chkewö meraë a' ulitane a as a' wa chkewö tso' wë'. <sup>12</sup>Ye' ël Benjamín ena a' ulitane tö ichèmi ye' yé a tö mokì ye' wák tté a' ta. <sup>13</sup>Ipakó ye' yé a tö ye' dör Egipto wōkir. Ñies ì kōs sué a' tö íe, e' pakó ia. iYe' yé tsúbitu bet íe!

<sup>14</sup>Etá José tö iël Benjamín paklö'wéwa ta ijéka. Es Benjamín tö José paklö'wéwa ta ijé ñies. <sup>15</sup>Etá José tö iëlpa kōs wöalattsé, ñi paklö'wéwarak ta ijérak. Etá erpa iëlpa er deka ttök ie' ta.

<sup>16</sup>Etá Egipto blú u a ttè demi tö José ëlpa debitu ie' ska', e' tö Egipto blú ena ikueblupa kōs e'pa ttsé'wé buaë. <sup>17</sup>Etá Egipto blú iché José a:

—Ichó be' ëlpa a: 'A' chkewö payuó iyiwak kì ta a' yúne Canaán. <sup>18</sup>Etá a' yé ena a' yamipa kōs e' tsúbitu ye' a. Ká tso' Egipto e' bua'ie mekeyö a' a. Ñies chkewö tso' Egipto e' bua'ie mekeyö a' a.' <sup>19</sup>Ñies ichó ie'pa a: 'karreta tsúmi tajë a' alakölpa ena a' ala'r ena a' yé e'pa kōs tsobitu. <sup>20</sup>Egipto íyi tso' bua'bu' e' kakmeraëyö a' a. E' kuëki kè a' tkinuk ì tso' a' wā e' kì.'

<sup>21</sup>Etá Jacob ala'r tö iwé i' es. José tö karreta mé ie'pa a wēs Egipto blú tö iché es. Ñies chkò méitö ie'pa a ñè ñala kì. <sup>22</sup>Ñies datsi' pa'alì mé iarak e' mane'woie. Erë Benjamín a datsi' kak-méitö sketökicha iënoie. Ñies

inuköl wömulë méitö ia döka cien mañalyök (300). <sup>23</sup>Íyi bua'bu' tso' Egipto e' kak patkëmi iyé a payöule burro kì döka dabop. Ñies trigowö ena pan ena chkewö skà e' payuëitö burro dabop skà kì iyé a ñè ñala kì. <sup>24</sup>Mik José ëlpa mitke, etá José tö iché ie'pa a:

—Kè a' mía ñippök ñala kì.

<sup>25</sup>Ie'pa e' yéttsa Egipto a demi Canaán iyé ska'. <sup>26</sup>Etá ie'pa tö iché iyé a: "Be' alà José tso'ia ttsë'ka. Ie' tso' Egipto ká kōs e' wōkirie." Ttè e' tö Jacob wōkrawéwa tajë. Kè uteia. Ie' kè wā ttè e' klöone. <sup>27</sup>Erë mik ie'pa tö ì kōs yé' José tö ie'pa a e' paké iyé a, ñies mik Jacob tö karreta patké José tö ie'pa tsomi e' sué, etá ie' er dekañe ttsë'ne buaë. <sup>28</sup>Etá ie' iché: "E' è kata ye' a, ye' alà José tso'ia ttsë'ka. Ye' mi'ke isauk kam ye' blërwa, e' dalewa."

### Jacob mía Egipto

**46** <sup>1</sup>Etá Jacob e' yéttsa iu a. ì kōs tso' iwa e' mítser seraa. Mik idemirak ká kiè Beer-seba ee, etá iyiwak ña'wéitö iyé Isaac, e' Këköl dalöioie. <sup>2</sup>E' nañewe Skëköl tté ie' ta kabsueie ta ikiéitö ikiè wa:

—A Jacob.

Jacob tö iiüté:

—¿Ì?

<sup>3</sup>Etá Skëköl iché ia:

—Ye' dör be' Këköl. Ye' dör be' yé Këköl. Kè be' suanuk shkök-mi Egipto. Ee ye' tö be' aleripa alöweraë tajë. <sup>4</sup>Ye' mi'ke be' ta Egipto. Ñies ye' wák tö be' aleripa yerattsane ká e' a. Ñies mik be' duökewatke etá José tso' be' o'mik.

<sup>5</sup>E' ukuöki ta Jacob e' yéttsa Beerseba a. Eta ie' ala'r tö ie' iéka karreta patkë' Egipto blú tö ie'pa tsömi e' a. Nies ie'pa ala'r ena ie'pa alakölpa e'pa iékarakitö karreta a. <sup>6</sup>Eta Jacob mía Egipto iyamipaë se. Ie' baka kos ena ie' obeja kos e' mítser ie' wa. Nies ì kos dë' ie' ulà a Canaán e' mítser ie' wa sera. <sup>7</sup>Ila'r kos ena isibayökpa kos e'pa mía da'a Egipto.

<sup>8</sup>Ikkëpa dör Israel aleripa mineyal Egipto. E'pa dör Jacob ena ila'r.

Rubén, e' dör Jacob alà kibi ék. <sup>9</sup>Eta Rubén ala'r kiè: Hanoc, Falú, Hesrón, ena Carmí.

<sup>10</sup>Simeón ala'r kiè: Jemuel, Jamín, Óhad, Jaquín, Sóhar, ena Saúl. Saúl mì dör canaánwak.

<sup>11</sup>Leví ala'r kiè: Guersón, Quehat ena Merarí.

<sup>12</sup>Judá ala'r kiè: Er, Onán, Selá, Fares ena Zérah. (Er ena Onán, e'pa blënewa Canaán.) Fares ala'r kiè Hesrón ena Hamul.

<sup>13</sup>Isacar ala'r kiè: Tolá, Puvá, Job ena Simrón.

<sup>14</sup>Zabulón ala'r kiè: Séred, Elón ena Jahleel.

<sup>15</sup>E'pa kos dör Jacob ala'r kune Padán-aram Lía ta. Ie'pa kutà kiè Dina, e' kune eë ñies. Jacob aleripa kos wëpa ena alakölpa e' dökä dabom mañayök ki mañal (33).

<sup>16</sup>Gad ala'r kiè: Sefón, Haguí, Esbón, Suní, Erí, Arodí, ena Arelí.

<sup>17</sup>Aser ala'r kiè: Imná, Isvá, Isví ena Beriá. Ie'pa kutà kiè Sérah. Beriá ala'r kiè Heber ena Malquiel.

<sup>18</sup>E'pa dör Jacob aleripa Zilpá ta, e' mé Labán tö ilà busi Lía, e' a ikanè

mésoie. Ie'pa kos dökä dabom eyök ki teröl (16).

<sup>19</sup>Jacob alaköl kiè Raquel, e' ala'r kiè José ena Benjamín. <sup>20</sup>José ala'r dör ilaköl Asenat ta e'pa kiè Manasés ena Efraín. Ie'pa kune Egipto. Asenat dör wëm kiè Potifera, e' alà busi. Potifera dör egiptowak awá eköl. Ie' kaneblöke ká kiè On eë. <sup>21</sup>Benjamín ala'r kiè Bela, Béquer, Asbel, Guerá, Naamán, Ehi, Ros, Mupim, Hupim ena Ard. <sup>22</sup>E'pa dör Jacob aleripa Raquel ta. Ie'pa kos dökä dabom eyök ki tkël (14).

<sup>23</sup>Dan alà kiè Husim. <sup>24</sup>Neftalí ala'r kiè: Jahseel, Guní, Jezer, ena Silem. <sup>25</sup>E'pa dör Jacob aleripa ilaköl Bilhá ta, e' mé Labán tö ilà busi Raquel a ikanè mésoie. Ie'pa dökä kul (7).

<sup>26</sup>Jacob ta iyamipa ekkà mène Egipto, e' wakpa dökä dabom teryök ki teröl (66). Ie' ala'r e' alakölpa, kè shtane ishüa. <sup>27</sup>José ala'r kune Egipto e'pa dör böl. Jacob yamipa dë'mi Egipto dökä dabom kuryök (70) sera.

<sup>28</sup>Eta Jacob tö ilà Judá patkëmi kewe José a ibiyöchök: "Be' shkó Gosen ye' ñaletsuk." Eta mik ie'pa demi Gosen, <sup>29</sup>eta José tö ikanè mésopa ké ie' karreta yöktsa tsëmi iyé ñaletsöie. Mik idemi iyé ska' eta iyé paklö'wëwaitö eta ie' ié taië.

<sup>30</sup>Eta Jacob tö iché José a:

—Ire' ye' blërwami buaë! Ye' be' suéne buaë, be' serkeia e' kuëki.

<sup>31</sup>Eta José tö iché iyamipa kos a:

—Ye' mía Egipto blú a a' biyöchök tö 'ye' elpa ena ye' yé yamipa kos serke Canaán e'pa

debitu e' tsukat ye' ska'. <sup>32</sup>Ie'pa dör iyiwak alöukwakpa. E' kueki ie'pa baka kos ena ie'pa obeja kos ena i kos tso' ie'pa wa e' debitu ie'pa wa.' <sup>33</sup>Mik Egipto blú tö a' chaké: '¿I dör a' kanè?', <sup>34</sup>e' ta ichó ia: 'Kekraë sa' kanè dör iyiwak alöuk wes sa' tsá bak es.' Egiptowak kè kàne senuk obeja alöukwakpa ta ñita, e' kueki Egipto blú kawö mèmi a' a senuk Gosen.

**47** <sup>1</sup>Etá José mía ibiyó muk Egipto blú a ta ichéitö ia: "Ye' yé ena ye' élpa serke Canaán, e'pa debitu ie. I' ta ie'pa tso' Gosen. Ie'pa obeja ena baka ena i kos tso' iwa e' debiturak iwa serea."

<sup>2</sup>José tö iélpa shushtë döká skel ta imítser iwa Egipto blú ska' as ie' tö iwakpa saü. <sup>3</sup>Etá Egipto blú tö José élpa a ichaké:

—¿I dör a' kanè?

Etá ie'pa tö iüté:

—A kéképa, sa' dör obeja alöukwakpa wes sa' tsá bak es.

<sup>4</sup>Ketba meneká taië sa' kaska'. Sa' iyiwak a kè chkè ta'ia, e' kueki sa' bitea senuk ká i' ki. Be' we'ikè sa' tö, kawö mú sa' a senuk Gosen.

<sup>5</sup>Etá Egipto blú tö iché José a:

—Be' yé ena be' élpa de senuk be' ta. <sup>6</sup>Ká tso' Egipto e' wé kiane be' ki e' mú ie'pa a senoie. Kos ká tso' Egipto e' bua'ie dör Gosen e' mú ie'pa a senoie. Be' yamipa shua wépa tso' iyiwak kkö'nè buaë, e' ta esepa múka ye' iyiwak kkö'nuk.

<sup>7</sup>Ñies José wa iyé Jacob mí kka-chè Egipto blú a. Jacob tö Egipto blú shké'wé er bua' wa. <sup>8</sup>Etá Egipto blú tö ie' a ichaké:

—¿Kos duas tso' be' ki?

<sup>9</sup>Jacob iüté:

—Ye' ki duas de cien eyök ki dabom mañayök (130) shkök wì a dià a. Kawö e' kè dör taië. E' tka ye' ki darèrè. Erè kam ye' ki duas dò kos ye' yépa ki duas bak ekkè.

<sup>10</sup>E' ukuöki ta Jacob e' chéat Egipto blú a ta imía. <sup>11</sup>Etá José tö ká bua'buá tso' Egipto, e' mé iyé ena iélpa a senoie wes Egipto blú tö iché es. Ká e' até Ramsés. <sup>12</sup>Ñies ie' tö chkewö meke iyamipa a kos ila'rla tso' u a u a ekkè.

#### José tö chkewö watué Egipto wakpa a

<sup>13</sup>Ká ulitane kè iyi wöria, e' kueki ketba kí tkërke poë. Ketba tö s'tteke taië Canaán ena Egipto. <sup>14</sup>Chkewö tué Egipto wakpa tö ena Canaánwakpa tö, e' ské kos blé José tö Egipto blú u a. <sup>15</sup>Mik Egipto wakpa ena Canaánwakpa inuköl enewa serea, etá Egipto wakpa mía José ska' ta iché ia:

—iBe' sa' a chkewö mú! Kè sa' inuköl ta'ia. Kè idör bua' tö e' è kueki be' tö sa' méttsa duökwa ketba a.

<sup>16</sup>Etá ie' tö ie'pa iüté:

—A' kè wa inuköl ta'ia, e' ta a iyiwak tsúbitu ña, e' skéie ye' tö a' a chkewö meke.

<sup>17</sup>Egipto wakpa wa kabaio ena obeja ena baka ena burro e' kos mí ie' a. E' skéie ie' tö chkewö mé ie'pa a dò duas ek. <sup>18</sup>Das e' tka etá ie'pa míyalne ie' ska' ta iskà ché ia:

—Be' wa ijcher buaë tö kè sa' wa inuköl ta'ia. Ñies sa' iyiwak kos, e' dör be' icha. Sa' ká è tso'ia sa' wa ena sa' wakpa, e' è tso'ia sa' wa mè



be' a <sup>19</sup>Sa' wákpa taú. Sa' ká taú ñies. E' skéie iyiwö mú sa' a. Sa' kanablömi sa' wákpa ká a Egipto blú a. Es sa' atē Egipto blú kanè mésopaie. Etā chkewö è memibö sa' a as kè sa' duòlur ketba wā ena sa' ká kè weir é ichók.

<sup>20</sup>Egipto wakpa tö iká watuéttsa José a ketba kuēki. Es Egipto ká kos de Egipto blú ulà a. <sup>21</sup>Ñies Egipto wakpa kos atē blu' kanè mésopaie. <sup>22</sup>Ie'pa sacerdotepa ká e' è kè tōne José wā. Egipto blú tö chkewö kakmeke ie'pa a, e' kuēki ie'pa kè wā iká watonettsa.

<sup>23</sup>E' ukuöki tā José tö iché Egipto wakpa a:

—A' wákpa kos ena a' ká kos e' to'ttsa ye' tö se' blú a, e' kuēki i'ñe tā a' kos atē ie' ulà a. Iyiwö i' tsúmi a' tö tā ikuatkó. <sup>24</sup>Mik iwöne tā iyiwö tso' dōka sacco skēl, etā itsá yóttsa sacco et mè Egipto blú a. Iyiwö eyök atē e' dör a' a kuantkè, ñies a' yamipa ulitane a ñanoie.

<sup>25</sup>Etā ie'pa tö iiuté:

—Be' tö sa' tsátké ketba ulà a. Be' er bua' sa' tā. E' kuēki sa' e' chöke Egipto blú kanè mésopaie.

<sup>26</sup>Es José tö kawö mé Egipto wakpa a tö iyiwö tso' dōka sacco skēl e' tsá yóttsa sacco et mè Egipto blú a. I'ñe tā e' wekeia ie'pa tö es. Egipto sacerdotepa è kè kawöta iyiwö tsá muk Egipto blú a, ie'pa ká kè dē' Egipto blú ulà a e' kuēki.

**Jacob tö ittè bata ché José a**

<sup>27</sup>Es Israel aleripa e' tséat senuk Gosen, ká e' atē Egipto. Ká e' kos de ie'pa ulà a. Eē ie'pa alöne taië. <sup>28</sup>Jacob sene'ia ká e' a duas dōka

dabom eyök ki kul (17). Duas de ie' ki cien eyök ki dabom tkéyök ki kul (147).

<sup>29</sup>Mik ie' tö ittsé tö iduökewatke, etā José tsuk patkétö tā ichéitö ia:

—Moki be' er buaë chak ye' a, e' tā be' ulà múwā ye' tu' dikia iwā kkachoie tö moki i' kiekeyö be' a e' waweraëbö. Ye' nu kè wötarwā Egipto. <sup>30</sup>Mik ye' blēnewā mia ye' dēütöpa itöki, etā ye' nu yóttsa ká i' ki tsúmi wötewā ie'pa pö a.

Etā José tö iiuté:

—Es yö iweraë.

<sup>31</sup>Iyé tö iché ia:

—Ichó ña moki Skéköl wörki tö be' iweraë es.

Etā José tö ittè mé moki iyé a. Etā Jacob woméwā iká' ki tā Skéköl kikékaitö.

**Jacob er buaë ché José ala'r a**

**48** <sup>1</sup>E' ukuöki tā ie'pa wā biyö debitü José a: “Be' yé duöke tso' suluë.” Etā José mia isaük ila'r böl mí iwā e' tā. <sup>2</sup>Mik ie'pa tö iché Jacob a tö José debitü be' saük, etā ie' e' tkéka isulú wa iká' ki. <sup>3</sup>Etā ie' tö iché José a:

—Skéköl Diché Tā' Iyi Ulitane Tsata e' e' kkayë' ye' a ká kiè Luz atē Canaán eē. Eē ie' er buaë yé' ye' a <sup>4</sup>tā ichéitö ña: “Ye' tö be' aleripa alöweraë taië. Ie'pa dōraë ká taië e' wakpaie. Ká i' meraëyö ie'pa a, e' atdaë ie'pa ulà a kekraë michoë.” <sup>5</sup>Be' ala'r böl, Efraín ena Manasés, e'pa kune kam ye' dò Egipto e' yöki. Ie'pa tsétköyö wes ye' wák ala'r es wes ye' ala'r Rubén ena Simeón dör ye' ala'r es. <sup>6</sup>E' kuēki ká meraëyö ie'pa a wes ye' wák

ala'r a es. Ie'pa itöki be' ala'r skà kurmi, e'pa dör be' wák a. Erë ie'pa dör Efraín ena Manasés ëlpa, e' kuëki ká ñe' kak döraë ie'pa ulà a ñies. <sup>7</sup>Mik ye' manét Padán-aram e' demi Canaán dökettsatke Efrata, etä eë ñalā kī be' mī blēnewā ye' yökī. Eë ye' tō ie' nu blē'waat Efrata ñalé kī. (I'ñe tã ká e' kiè Belén.)

<sup>8</sup>Mik Jacob tō José ala'r sué etä ichakéitō:

—¿Sëpa dör yi?

<sup>9</sup>Ie' tō iüté:

—I'pa dör ye' ala'r mé Skëköl tō ye' a ká i' kī.

Etä iyé tō iché iä:

—Ie'pa tsúbitu ye' ska' as ye' er bua' chò ie'pa a.

<sup>10</sup>Jacob kënewatke e' kuëki iwöbla kè wawëriä buaë. E' kuëki José tō ila'r patkëmi tsinet iyé o'mik. Etä Jacob tō italapa paklö'wé wöalattsé. <sup>11</sup>E' ukuökī ichéitō José a:

—Ye' ibikeits tō ye' kè tō be' suëpaia, erë Skëköl tō kawö mé ye' a be' ena be' ala'r suoie.

<sup>12</sup>Etä José tō ila'r skëttsä iyé o'mik tã iwöëwa dò iski iyé dalöioie. <sup>13</sup>E' ukuökī tã ila'r böi klö'wëwaitö iulà a. Efraín mí José ulà bua'kka, Manasés mí José ulà bakli'kka. Es itsémiitö iyé ska'. Etä Efraín atë Jacob ulà bakli'kka, Manasés atë Jacob ulà bua'kka. <sup>14</sup>Erë Jacob ulà bua'kka mékã Efraín dur ie' ulà bakli'kka e' wökir kī. Eré e' dör alà tsirla. Etä iulà bakli'kka mékaitö Manasés dur ie' ulà bua'kka e' wökir kī. Eré e' dör alà kibi. Es Jacob ulà tsétkö wī'kë io'kë. <sup>15-16</sup>Etä ier bua' ché José a i' es:

“As Skëköl er buaë chò ala'r böi i' a këkraë.

Ye' yépa bak Abraham ena Isaac, e'pa bak Skëköl e' dalöiök,

e' tō ye' kkö'nami kuaë dò ikkë tã.

Ie' tō ye' tsatké këkraë iyi sulusi ulà a.

As ala'r i' wa kè ye' chöwa sulitane éna këkraë.

Ñies ye' yépa bak Abraham ena Isaac as e'pa kè chöwa sulitane éna këkraë.

As ala'r i' alör taië ká ulitane kī.”

<sup>17</sup>Jacob ulà bua'kka mékã Efraín wökir kī, e' kè mène José a buaë. E' kuëki ie' tō iyé ulà bua'kka e' klö'wëwã mèkã ilà kibi dör Manasés e' wökir kī. <sup>18</sup>E' dalewa ichéitö iä:

—iA yéwö, kè idör es! I' dör alà kibi. Be' ulà bua'kka múkã i' wökir kī.

<sup>19</sup>Erë iyé kè wã ionë es. Ie' tō iché iä:

—iA alà, e' jcher ye' wã, e' jcher ye' wã! Ie' alördaë taië, ie' döraë këkëpa taië. Erë itsirla ék e' döraë këkëpa taië shutë ikibi tsatã. Ñies ie' aleripa döraë ká taië e' wakpaie.

<sup>20</sup>Es e' è diwö wa Jacob er buaë skà ché italapa a i' es:

—Mik Israel aleripa er buaë cheke ñi a etä ie'pa tō icheraë ñi a i' es: ‘As Skëköl er buaë chò be' a wës Efraín ena Manasés e'pa a er buaë yëne es.’

Es Jacob er buaë ché Efraín a, Manasés a imène, e' tsatã. <sup>21</sup>E' ukuökī tã José a ichéitö:

—Ye' duökewatke erë Skëköl tö a' kkö'neraë. Ie' wä se' aleripa mirane Canaán wé se' yépa bak senuk ee. <sup>22</sup>Ye' tö ká bua'ie méat be' a ime'bakyö be' ëlpa a e' tsata. Ká e' kiè Siquem. E' yé'ttsa ye' tö amoreowak ulà a ñippè wa.

Jacob tö ittè bata ché ila'r kos a

**49** <sup>1</sup>Jacob tö ila'r kié e' ska' ta ichéitö ie'pa a: “A' e' skówa ye' o'mik. Ì tköraë a' ta e' wà chekeyö a' a:

<sup>2</sup>“A ala'rla, a' e' skówa tsinet ye' ttò ttsök, ye' dör a' yé. Ye' ttò ttsó.

<sup>3</sup>“A Rubén, be' dör ye' alà kibi. Be' dör ye' diché tsá e' alé. Be' dalöiërta' tajë, be' diché ta' tajë be' ëlpa tsata.

<sup>4</sup>Erë ìñe ta kè idör es. Be' dör wes di' yöliie es kè iwöklör yës. Be' tö ye' dalöseq'wa. Be' sene'ka ye' alaköl ta. E' kuëki be' kè dalöiërpaia wes ko'k es.

<sup>5</sup>“Simeón ena Leví, e'pa dör ñi ëlpa; ie'pa tabè tso' ñippoie è.

<sup>6</sup>ÌWé ie'pa e' dapa'uke ee ye' kè shkak! Ie'pa tö wëpa kötulur kësik è kuëki. Baka wë'ne klökicha blublu e' télorakitö éanas.

<sup>7</sup>Ie'pa kësik dör suluë ichökle e' kuëki ie'pa kawö tköraë suluë.

ìYe' tö ie'pa aleripa powerami senuk iëlpa malepa aleripa shua wì a dià a!

<sup>8</sup>“A Judá, be' ëlpa tö be' kíkera-ka tajë.

Be' bolökpa klö'wewaraë be' tö ikuli' a, es be' e' alöraka ie'pa ki. Be' ëlpa ëkka e' wöörawa iski be' dalöioie.

<sup>9</sup>ìA Judá, be' dör ye' alà! Be' dör wes ma'name alà es. Mik ì ttéitö ta ikaté one, eta ie' e' wöéwa e' téwa iski wes ma'name këchke es. ¿Yi dòmi ie' tsiriuk?

<sup>10</sup>Judá aleripa döraë blu'paie tajë këkraë dò mik iblú chók de eta.

Blu' e' ttò iüteraë sulitane tö.

<sup>11</sup>Ie' tö iburro pupula muëke uva shua.

Ñies idatsi' skuöke uva diò wa.

<sup>12</sup>Ie' wöbla dör daloloë uva diò tsata.

Ie' kà dör saruruë baka tsu'diö tsata.

<sup>13</sup>“Zabulón serdaë dayë kkömik. Eë tajë kanò irirke ese ké tso'. E' ká kkò dörawa Sidón kkömik.

<sup>14</sup>“Isacar dör wes iyiwak tso' dalì oie diché ta' tajë ese e' mùtër enuk iwé a es.

<sup>15</sup>Mik ie' isuë tö ká e' dör buaë senioie ñies enoie, eta ie' tsiwö ki dalì dekane kaneblök.

Ie' e' mèttsa kaneblök kanè mésoie, kè tkine e' ki.

16 “Dan ditséwö shuā s'shulirdaë  
buaë yësyësë wës Israel ale-  
ripa e' ditséwö malepa es.

17 Dan döraë wës tkabè chók  
tso' ñalā kkò a tö kabaio  
kuè iklò a tā iwák brutāne  
itsiwökka ese es.

18 “iA Jehová, ye' tso' be' panuk  
tö ye' tsatkó!

19 “Gad ppök ñippökwakpa  
döraë tajë.  
Erë ie' tö ie'pa pperaë,  
itötieraë.

20 “Aser ká kī chkè kata' buaë  
tskirdaë.  
Ì wörke kōs e' dör buaë shute  
mène buaë blu'pa a.

21 “Neftalí dör wës sulī alaki dur  
áie ala'rla tā' bua'buāala  
ese es.

22 “José dör wës burro kañiru suë  
dur di' tum kkömik es,  
wës burro pupula kañiru suë  
dur ká tukir kī es.\*

23 Kuaböt namépa éna sulu iar,  
ie' kī kuaböt uyérakitö kēsik  
wa.

24 Erë ie' ulà diché darërë;  
e' wa ie' wā ishkame'  
shuirikar darërëë,  
kè ulà shtrirtā'wā yës.  
Skököl tö ie' a diché e' mé.  
Skököl e' dör Jacob Kököl e'  
diché tā' tajë.

Skököl e' dör Israel aleripa  
kkö'nukwak.

Ie' tö Israel aleripa tsatkeke.

25 A José, be' yé e' Kököl tö be'  
kīmeke kekraë.

E' dör Skököl Diché Tā' Íyi Uli-  
tane Tsata,

Ie' er buaë chöraë be' a.

Kālī buaë patkeraë ie' tö be'  
daliwö kī.

Ñies be' a di' atdaë buaë iyök  
kī as be' dalikua talar buaë.

Be' aleripa alakölpa ala'r  
döraë tajë, ñies be' iyiwak  
döraë tajë.

Es Skököl er buaë chöraë be' a.

26 Be' yé er buaë yé' be' a,  
e' tkòkā ye' yé er buaë yé' ye'  
a e' tsata.

Skököl tö José shukit iēlpa  
shuā iwökirie,

e' a ie' er buaë chò michoë  
wës kabata yöbië kè ertā'wa  
es.

27 “Benjamín dör wës chichi  
kañiru kēsikie ese es;  
bla'mi tā iyiwak ttéwāitö katè,  
tsālī tā ibata watiéwāitö.”

28 E'pa dör Israel ditséwöpa daia  
itökī dōkā dabom eyök kī böt (12),  
e' yépa tsá. Es ie'pa yé tö ie'pa a  
iché mik ie' tö ittè bata ché ie'pa  
a etā.

#### Jacob blēnewā

29 Jacob tö iché ila'r wēpa a: “Ye'  
blērkewā e' kēwö dōkewātke. Mik  
ye' blēnewā, etā ye' nu blōwā ákuk

\* 49.22 José dör wës burro...ká tukir kī es: Ñies hebreoie ttè e' mane'wēmiso i' es: José dör  
wës kal tskirke di' kkömik es; tkakā iké kköiëule e' mik buaë, ñies iwördaë tajë.

a ká wé ye' yamipa nu blène ee. Pö e' atē wēm kiè Efrón dör hititawak e' ká a. <sup>30</sup>Ká e' atē Macpelá Mamré wöshäë. Ká e' atē Canaán. Ká e' ena ákuk e' wato'ttsa Efrón tö Abraham a as Abraham tö iyamipa nu blö ee. <sup>31</sup>Eë Abraham ena ilaköl Sara, ñies Isaac ena ilaköl Rebeca, e'pa nu blène. Eë ye' tö ye' alaköl Lía, e' nu blè'wä ñies. <sup>32</sup>Ká e' ena ákuk e' wato' hititawak tö.”

<sup>33</sup>Mik Jacob tö ttè e' kos ché one etä ie' e' tēwane ika' ki ta iblēnewa mía idēütöpa itöki.

**50** <sup>1</sup>Etä José tö iyé nu paklö'wéwä wöalattséitö ta iie' taië. <sup>2</sup>E' ukuöki ta ie' tö egiptowak dör s'nu kanéukwakpa e'pa kié iyé nu kapeyökwa as kë inurwä. Etä es ikanewérakitö. <sup>3</sup>Ikanewérakitö dökä ká dabom tkëyök (40 días), ekkë kawö kiane ikanewoie e' kuëki.

Egiptowak tö ischó eriaitsé kawö dökä dabom kuryök (70 días). <sup>4</sup>E' ukuöki ta José tté Egipto blú kuëblupa ta, ta ichéitö ie'pa a:

—A' éna er bua' chak ye' a, e' ta a' yú ichök Egipto blú a <sup>5</sup>tö mik ye' yé duökewatke, etä ie' tö ye' ka' ie' a ttè muk Skököl wörki tö inú blerawayö ákuk kane'at ie' wák tö atē Canaán e' a. E' kuëki kawö mú ña ie' nu tsomi blèwä ee. Mik ye' ibléwä ta ye' dotkene.

<sup>6</sup>Etä Egipto blú tö iiuté:

—Be' yú be' yé nu blökwä wes ie' tö be' a iki' es.

<sup>7</sup>Etä José mía iyé nu blökwä. Egiptowak kuëblupa kos e'pa míyal ie' ta. <sup>8</sup>Jacob yamipa ekkä ena José yamipa ekkä ena iëlpa e'pa kos mí ñies. Ie'pa ala'r ena ie'pa iyiwak e'pa è atéat Gosen. <sup>9</sup>Ñies pè' mí taië karreta ki ena kabaio ki. Es pè' mí taië José ta. <sup>10</sup>Mik ie'pa demi ká kiè Goren-ha-atad atē tsinet di' Jordán diwö tskirke e' kker ee, etä ee ie'pa ulitane tö Jacob nu wötërkewä e' kéwö tkö'wé dalò taië wa. Eë José tö iyé eriaitsé dökä ká kul.

<sup>11</sup>Mik canaánwak serke ee, e'pa tö Jacob nu wötërkewä kéwö tkö'wé e' sué, etä ie'pa tö iché: “Mokí egiptowak tö s'nu wötërkewä e' kéwö tkö'wéke dalò taië wa.” E' kuëki ká e' kiè mékã ie'pa tö Abel-Misraim.\* Ká e' atē tsinet di' kiè Jordán e' kkömik.

<sup>12</sup>Es Jacob ala'r tö iyé nu kanewé wes ie' tö iyé' ie'pa a es. <sup>13</sup>Ie'pa wä inú mítser Canaán ibléwarakitö ákuk yöule Abraham wä iyamipa pöie e' a. E' atē Macpelá. E' wato'ttsa hititawak kiè Efrón tö Abraham a. Ká e' atē Mamré wöshäë. <sup>14</sup>Mik José dēütö nu blène one, etä ie' biteane Egipto. Ie' elpa ena pè' ulitane mine ie' ta e'pa kos biteyalne ie' ta.

**José elpa suanékane ie' yöki**

<sup>15</sup>Jacob blēnewä e' ukuöki ta José elpa tö ibikeitsé: “Isalema José éna sulu se' arke. Ì kos wamblé' se' tö ie' ki e' skéie se' we'ikeraëitö.” <sup>16</sup>E' kuëki ie'pa ttè

\* 50.11 Abel-mizraim: Hebreoie ká kiè e' wä kiane ché egiptowak schó eriaitsé.

mémi ie' a: “Kam be' yé blërwa, 17 etä ie' tö sa' a iché tö ichó be' a: ‘Ì kôs suluë wamblè' sa' tö be' kî, e' olo'yó sa' kî.’ E' kuëkî sa' kköchò be' a tö e' olo'yó sa' kî. Sa' tö be' yé e' Këköl dalöieke e' kuëkî.”

Mik biyö e' demi José a, etä ie' ié siarë. 18 Etä iëlpa demi iwökî. Ie'pa wöéwa dò ìskî idalöioie ta ichérakitö:

—I' sa' de be' wörkî. Sa' dör be' kanè mésopa.

19 Etä ie' tö ie'pa iüté:

—Kè a' suanuk. Ye' kè a a' shulinuk Skëköl skéie. 20 A' íyi sulu bikeits wamblè ye' kî, erë e' mane'wéttsane Skëköl tö buaë se' kî. E' wa taië pë' tsatkëne i'ñe ta. 21 E' kuëkî kè a' suanuk. Chkewö meraëyö a' a ena a' ala'r kôs a.

Es ie' tö ie'pa a iché er buaë wa. E' tö ie'pa ttsë'wéne buaë.

### José blënewa

22 José ena iyé alikpö yamipa e'pa sene'ia Egipto. Ie' sene' döka duas cien eyök kî dabom eyök (110). 23 Ie' tö ilà Efraín talapa e' ala'r suéia. Nies ie' tö ilà Manasés e' alà kiè Maquir e' ala'r suéia.

24 Ká et ta ie' tö iché iëlpa a: “Ye' duökewa e' këwö kianeia tsir. Erë Skëköl wák tö a' kïmeraë. Ie' tö a' yelurdaë ká i' kî. Ká yé'bakitö mè Abraham a ena Isaac a ena Jacob a e' a a' tsemiraëitö.” 25 Etä ie' tö iëlpa kié as ie'pa ttè mù ie' a Skëköl wörkî. Ie' tö ie'pa a iché: “Skëköl tö a' yerattsä ká i' kî. Mik e' tka, etä ye' sik tso' blëule e' tsúmi e' ta.”

26 Mik ie' blënewa Egipto, etä ie' kî duas de cien eyök kî dabom eyök (110). Ie' nu kapeyanewa as kè inurwa e' iënewa s'nu kélkuö a.